

'Wuntaəsə

'ö -gban Yesu Klito -bha 'ö

Lukö

-ya =blee

1 ¹Ma me -wungbeezë Teofilö, medhevadhe =waa- kədhe =mæɛ'- kö 'wun -nu 'wo -kë yi -sɛ 'gü 'ö -gban Yesu Klito -bha bhë -waan -ya 'sëedhe 'gü. ²'Wun -nu 'wo -kë 'ma bhë -wo -nu 'wo- =blee yi -dhë =ne -kɔ 'ö me -nu 'wo -kë mü -a züdüyi 'ka, 'ö -kë -an 'yaan, 'ö -Zlan -wo pö -sü -yö -kë -an -bha yuö 'ka, 'wo- =blee -a 'dhö. ³=Dhe =ya kë 'dhö, ma -de 'pö a =dheɛ' -nu -kpɔ; 'ö ma =dheɛ' -nu -wo -gban pë -nu 'wo -kë -a züdüyi 'ka kpinngdhö -an -bha. 'Yö -dhe 'a- -ga -a 'gü bhë, n dë, n -ma 'ka, -yö -kë n -dhë -së kö 'aan- =blee'- ü -dhë, -a -ya 'sëedhe -ta -sü 'ka =ne -kɔ -de bhë -a 'dhö. ⁴-Yö -kë 'dhö kö 'üen- 'wun gia- dɔ me -daan' -wo 'wo ü -daan' 'ka bhë -a -bha.

-Zlan -bha bəme -yö Zan Batisö -bha bhɔ -sü -wun -blee

⁵'Töng 'ö Elɔdö -yö =kaa' -gludë 'ka Zude -sɛ 'gü, slabhome 'wo- -dhe Zakali -yö -kë mü, -yö -kë Abia -bha slabhome kpö 'ö bhë -a 'gü -mɛ do 'ka. -A -bha dheɔ Elizabetö -de 'pö -yö -kë Aalɔn 'yö -kë slabhome =va 'ka bhë -a =suu'- -ta 'në dhe do 'ka. ⁶=Dhe 'wo- -bha =ple -wo -kë -Zlan wö 'dhiö kpengdhö; 'wo 'wun ma -Zlan -bha tɔng -nu waa- -a -bha -dhiodɔwo -nu 'töüdhö -an -ta 'fɛfɛdhö. ⁷'Kɛɛ 'në gbe yaa kë -an -gɔ, bhii 'ö tɔɔ Elizabetö -yö -kë 'bhüödhe 'ka; yö do bhë 'zü, kö -dhe 'wo- -bha =ple =wa kë =klöö.

⁸Yi do 'ka Zakali -yö -kë yuö 'dhiö -Zlan -gba -a 'gü -kɔ 'gü, bhii -yö -kë slabhome -nu kpö mɛ 'ö -kë -a 'gü bhë -an -bha yi 'ka. ⁹-A yi bhë -a 'ka -wo 'töü- -bhö =ne -kɔ 'ö -an -bha slabhome -nu -bha wɔ 'dho -a 'ka -a 'dhö. 'Ö 'töü- -yö Zakali sü, 'yö dho -dhe 'slööslö -dhe 'gü pë 'tëë -sëëzë 'wo- -dhe ansaan bhë -a 'güö =dhia. ¹⁰Zuifö -nu gbung -wo -kë plaan =bhea' -dhia

'yasa 'gü 'lele 'yö ansaan -güö -a 'ka bhë -a 'ka. ¹¹Dhe -ya kë 'dhö, 'ö -Zlan -bha bome do -yö -wo Zakali 'dhiö mü, -Zlan -bha sla- -bho -a -ta -pë 'wo ansaan -güö -na -a -ta bhë -a 'pian 'ö -kwæe- 'gü -zian' -a 'ka. ¹²Dhe 'ö Zakali -ya yö, 'yö 'siö -yö -kan -a 'gluu, 'ö 'suö -ya -kë. ¹³Yö -Zlan -bha bome -ya -pö -a -dhë: «Kö -kun 'ü -suö, Zakali, bhii -Zlan -ya ü bha -bhea' -wo ma 'saadhö, ü bha dhebo Elizabetö -dho 'në gɔɔn- do kpɔ ü -gɔ; ü -dho -a -dhe Zan. ¹⁴-Yö -dho kë ü -zuögludhi -wun 'ka, 'go mü medhevadhe -wo -dho -a -bha bhɔ -sü 'gludhi kë, ¹⁵bhii -yö -dho kë me -va do 'ka -Zlan wö 'dhiö. Yö 'ka 'dho -drɔɔn 'iin müpë -nu 'dhiözë gbe mü; -yö -dho pa -Zuu 'slööslö 'ka, 'yö bhɔa. ¹⁶-Yö -dho nu Izlaelö 'në -nu -va 'ka Dëme wo -bha -Zlan 'piö; ¹⁷yö gia- -de -yö -dho 'ta -sü -a 'dhiö -Zuu 'slööslö waa- 'piigbeedhe 'ö -kë -Zlan -wodhiölome Eli 'gü 'pö bhë -a 'ka kö -yaan 'në -nu waa- wo dë -nu -an kë do, kö -yaan nu me -nu 'wo dɔ -Zlan -gɔ 'yënnng -me 'ka -an 'ka -waan kë 'kpaakpa -ne me kpengdhö -nu 'dhö. -Yö -dho 'següme -nu -ya 'yaan Dëme -bha 'ka.»

¹⁸Dhe -kë 'dhö, 'ö Zakali -ya -pö -Zlan -bha bome bhë -a -dhë: «-Yö -dho kë -kɔklë kö 'wun 'ö -ne 'aan- -dhe 'wun gia-, 'kɛɛ kö ma 'dhö, ma dhebo 'dhö 'yië kë -klöö 'saadhö -ne -ɛ?» ¹⁹Ö -Zlan -bha bome -ya -daa -kë -a -gɔ 'ö- pö: «N tɔɔ Gablielö, ma -ne a dɔ -sü 'ka -Zlan wö 'dhiö kö 'aan- -a -bha yuö kë; -yö n -bɔ kö -naɔ -së 'ö bhë 'aan- bɔ ü -gɔ. ²⁰Dhe -kë -ne 'wun -nu 'ö 'a -an -blee ü -dhë bhë, ü 'ka -an -dhe 'wun gia-, 'kɛɛ kö -a 'töng -ya -lo -sia, -an -de -dho kë bhë, -a -wun 'gü ü -dho kë 'tuunme 'ka; ü -kɔ yaa 'dho -mɔ -a -bha kö 'üien- 'wun -blee'- -yaan 'dho -yaan yöë pë -nu 'wo bhë -an kë -yi -bha.»

²¹Dhe kë -na 'pö zlöö kö me gbung -nu 'wo -kë -bhea' -dhia plaan 'yasa 'gü bhë -an 'te -ya tun -glɔɔ 'ö Zakali -yaa- wo -dhe 'slööslö -dhe 'gü bhë -a -wun 'gü. ²²Kɛɛ -dhe 'ö yö plaan, yaa -mɔ -a -bha kö -yö 'wun -blee'-, 'ö me -nu 'wo -kë mü 'wo- 'tei' dɔ -ne Zakali -ya 'yanpiöpë do 'bhaa yö -dhe 'slööslö -dhe bhë -a 'gü. 'Ö Zakali -yö 'wun -blee -an -dhë 'ö -kɔ 'gü, 'yö to 'tuunme 'ka.

²³Yi 'ö Zakali dho 'ö bha yuö kaa -Zlan -gɔ kɔɔ mü bhë, -dhe -ya yën, -yö -dho 'ö -gɔ kɔɔ. ²⁴Dhe 'töng 'bhaa -ya ziö, 'ö Elizabetö 'yö -kë -a bɔɔ 'ka bhë, 'ö 'gu sü, 'yö 'ö -de -bin 'su 'sɔɔdhu 'piö, -a -pö 'ö -de -dhë -sü 'ka -nɛɛ: ²⁵«Pë 'ö n Dëme -ya -kë n -wun 'gü bhë, -kaa -ga 'dhe: -Yö -kë -a -dhë -së kö pë 'ö -kë ma lë- -wun 'ka me 'bhee- -nu wö 'dhiö bhë -yaan -a bho n -ma.»

-Zlan -bha bome do -bha Yesu -bha bhɔ -sü -wun -blee' -sü

²⁶Dhe -ya kë 'dhö -a 'su kë 'slado -naa bhë, 'ö -Zlan -yö 'ö bha bome Gablielö -bɔ Galile -pö do 'wo- -dhe Nazaletë -a 'gü. ²⁷Yö dho 'nëdhezë 'ö yaa gɔɔn- -wun -tei' dɔ -kun, 'ö- -bha -zo -tën -a -dhë -me bhë 'wo- -dhe Zozefu, 'ö -kë -gludë Davidö -gɔ 'kɔɔme -nu -suu'- -ta do 'ka bhë -a 'piö.

'Nèdhezè 'yö bhè -a tɔɔ Mali. ²⁸Dhe 'ö -Zlan -bha bɔmɛ -yö -da -a -gɔ kɔɔ, 'yö- pö -a -dhè: «'Bha -büee! -Zlan -ya 'wun -sè -va kè ü -dhè! Dème -yö ü 'piö!»

²⁹'Ö 'siö -yö -kan Mali 'gluu -büödawo -suu- 'ö bhè -a -wun 'gü, 'yö- pö ö -zuö' 'piö: «-Büödawo -suu- 'ö -nɛ -a -gen tɔɔ -mè -ɛ?» ³⁰Dhe -ya kè 'dhö, 'ö -Zlan -bha bɔmɛ -ya -pö -a -dhè: «Kö -kun 'ö 'suö -yö ü -kè, Mali, bhii -Zlan -ya ö 'yan -sè bɔ ü 'piö. ³¹Ü -dho 'gu sü, 'ü 'nè gɔɔn- do kpɔ; 'ü -dho -a -dhe Yesu. ³²-Yö -dho kè -va, 'ö mɛ -nu dho -a -dhe -Zlan 'ö -ziö pè 'ple -ta bhè -a Gbö. Dème -Zlan -yö -dho -a kè -gludè 'ka -nɛ -kɔ 'ö- 'bhema Davidö -kaa' 'dhiö bhè -a 'dhö. ³³'Go mü -yö -dho Izlaelö -sɛ -kɔɔn =toëpö 'ka; -a -bha mɛkɔɔnsü 'ö bhè, -a 'dhiötodhe yaa 'dho kè -dhö.»

³⁴'Ö Mali -ya pö -Zlan -bha bɔmɛ bhè -a -dhè: «'Wun -nɛ -a kè -kɔ -dho kè -kɔklè, 'kɛɛ kò n 'ka gɔɔn- -wun -tei' dɔ -kun -nɛɛ?»

³⁵'Ö -Zlan -bha bɔmɛ -ya pö -a -dhè: «-Zuu 'slööslö -yö -dho nu ü 'gü, 'ö -Zlan 'ö -ziö pè 'ple -ta bhè, 'ö- -bha 'piigbeedhe dho kpa ü -ta -nɛ -dhebiëndhe 'dhö. Pè 'ö -kè 'ö 'nè 'ö 'dhoè- bhɔ bhè 'wo dho -a -dhe: Mɛ 'ö 'slööslö 'yö -Zlan Gbö 'ka bhè 'ö bhè. ³⁶Elizabetö 'ö ka -nu 'ka -mɛɛzè bhè, yö -de 'pö -yö 'guzè, 'kɛɛ kò -ya kè -klöö; 'ö yö do bhè 'zü, mɛ -nu -wa pö -be ö 'ka 'dho 'nè kpɔ bhè, -dɛɛ -nɛ -a 'gü -yö 'guzè -a 'su 'slado 'ö -nɛ. ³⁷Bhii -Zlan -kɔ -kun -a 'ka -pè gbe 'yaa 'dhö.»

³⁸'Ö Mali -ya pö: «=ɛɛ, a n Dème -bha yuökèdhe 'ka, kò ü -wo 'ö bhè -yö kè -nɛ -kɔ 'ü- pöè bhè -a 'dhö!»

-Dhe -ya kè 'dhö, 'ö -Zlan -bha bɔmɛ -yö go -a 'piö mü 'ö -ziö.

Mali -dho -büö -da -dhia Elizabetö -dhè

³⁹-Dhe 'ö -Zlan -bha bɔmɛ -yö go mü, -a -dhe yaa =glɔɔ, 'ö Mali -yö -da zian -ta, 'ö dho 'zozodhö pödhe do 'yö -tɔn 'piö Zude -sɛ 'gü bhè -a 'gü. ⁴⁰'ö dho, 'yö -da Zakali -gɔ kɔɔ, 'yö -büö -da Elizabetö -dhè. ⁴¹-Dhe 'ö -büödawo 'ö bhè Elizabetö -yaa- ma, 'ö 'nè 'yö- -guzè bhè, 'yö pa ö -deè. 'Ö -Zuu 'slööslö -yö Elizabetö pa, ⁴²'yö -we 'gbee- 'ka -nɛɛ: «-Zlan -ya 'dhuè- 'kpɔ ü -bha, dhoo -nu 'ple ziën, 'ö- -bha 'dhuè- 'dho -ya -sü 'ka 'nè 'ü 'dhoè- -a kpɔ bhè -a -ta! ⁴³Dö -mü n 'ka 'ö n Dème dhe -yö nu n -gɔ kɔɔ =ɛ? ⁴⁴Bhii -bhö -dhe -ga, ü -büödawo 'a- ma bhè, 'nè 'a- -guzè -nɛ -yö -pa ö -deè 'gludhi 'ka n 'guu. ⁴⁵Bhi 'ö 'wun 'ö go kwa Dème 'piö, 'ü- ma, 'yö 'ü- -dhe 'wun gia- -nɛ, -yö -dho kè bhè, 'dhuè- -yö ü -ta!»

Mali -bha 'tan

⁴⁶-Dhe -ya kè 'dhö, 'ö Mali -ya pö: «N nii -yö n Dème -bha -kè -va -sü 'tɔ bhɔ, ⁴⁷n -zuögludhi -sü 'ka n Dhame -Zlan -wun 'gü!

⁴⁸Bhii -yö ö 'yan -bɔ ma 'a- -bha yuökèdhe -de -dho sia- -sü -zè 'ka n 'piö.

'Ö =dɛɛ -nɛ -a 'gü mɛ 'bhee- -nu 'saadhö 'wo dho -a pö 'dhuè- -yö n -ta, ⁴⁹bhii -Zlan 'piigbeezè -ya 'wun -sè -va kè n -dhè; -a 'tɔ -yö 'slööslö!

⁵⁰Me -nu 'wo -suö -a -dhë -a -bhlë 'kpɔ -sü 'ka bhë, -yö -dho -an 'yena yö 'töng 'saadhö 'ka. ⁵¹Ya ö bha yuö kē ö -kɔ 'piigbeeze 'ka, 'ö me -nu 'ö -de -sü -va -yö -an -zuö' pa bhë -an -zuö ö -kɔ 'yan =taa.

⁵²Ya -gludë -nu bho -an -bha 'gɔ -gbloo 'gü, -ya -yadhë =bhlëzë nu -de -dho sia- -me -nu -dhë.

⁵³Ö me -nu 'ö din 'dho -an kē -na bhë, pë 'ö -an -bha -wun 'dho -a -bha, -yaa- nu -an -dhë =va 'ka, 'ö =ya =bhɔɔme -nu kē, =wa 'dho wo -kɔ 'kpaan 'ka.

⁵⁴⁻⁵⁵=Ya nu ö bha yuökëme Izlaelö -bha 'në -nu -dhë, bhii 'ö tɔɔ -a -zlö 'yaa trö Ablaamö =suu' -ta -me -nu 'yena yö -sü -wun 'ka =toëpö 'ka -ne -kɔ 'yö- =blëe -a 'ka kwa 'bhëma -nu -dhë bhë -a 'dhö.»

⁵⁶=Dhe =ya kē 'dhö, Mali -yö -to Elizabetö 'piö mü 'su -yaaga 'ka -yaan -tun 'dho -na ö =plöö.

Zan Batisö -bha bhɔ -sü

⁵⁷=Dhe 'töng 'ö Elizabetö dho 'bë bhoë =ya -lo, 'yö 'në gɔɔn- do kpɔ.

⁵⁸=Dhe 'ö -a dɔme -nu waa- -a -gɔ 'kɔɔme -nu -wa ma =ne, Dëme =ya 'glusë kē Elizabetö 'ka, 'wo nu 'ö wo 'plesen 'wo =zuögludhi -kë wo 'ko =bhaa mü.

⁵⁹=Dhe 'ö 'në bhë -a bhɔ -dhekpaɔyi =ya kē 'sleaga, 'wo dhoë 'wo- -kë 'bɔn 'ka; 'wo- -kë -bezë kö -a dë Zakali 'tɔ bhë -waan -a 'kpɔ -a -bha. ⁶⁰'Yö- dhe -ya -pö -an -dhë: «-Daa, -a tɔɔ Zan!»

⁶¹Ö 'wo- pö -a -dhë: «Me 'wo- -dhe Zan 'yaa ü -gɔ 'kɔɔme -nu 'gü!»

⁶²=Dhe -kë 'dhö, 'wo yö -a dë =dheɛ' 'kpɔ -sü -bha wo -kɔ 'gü kö -kɔ 'yö dho ö bha 'në bhë -a 'tɔ kpɔa kö -waan -a dɔ. ⁶³Ö Zakali -yö pë -been -a -ta -pë do -dhe -an -gɔ, 'ö Zan -tɔ bhë 'ö- -ya. 'Ö -an 'plë 'te -yö tun. ⁶⁴-Dhe do bhë -a 'gü, 'ö Zakali -wo -yö yö plaan 'zü -dëüwo; 'yö yö 'sabla -Zlan 'tɔ 'saa -blü -sü -bha. ⁶⁵=Dhe =ya kē 'dhö, 'ö 'suö -yö -da me 'plë 'gü, 'ö 'pian 'yö bɔ -tɔn 'gü =zian' Zude -se 'gü bhë -a 'ka, 'wun -nu 'wo -kë =ne 'wo- =blëe wo 'ko -nu -dhë. ⁶⁶Ö me -nu 'wo 'wun 'ö -kë bhë 'wo- ma, 'wo yö wo -zo 'ta -sü 'gü =neɛ: «'Në 'ö =ne -yö -dho kē dö 'ka -o?» Bhii Dëme -yö -kë -a 'piö 'sönggö -sönggö.

Zakali -bha 'tan

⁶⁷Zakali 'yö -kë 'në bhë -a dë 'ka bhë, -Zuu 'slööslö -ya pa, 'yö yö -Zlan -wo 'dhiö -lo -sü -bha 'ö- pö: ⁶⁸«Kwa Dëme 'tɔ -yö kē -va, bhi -yö Izlaelö 'segɔ -bha -Zlan 'ka! 'ö tɔɔ -yö ö -zo -kë ö bha 'segɔ bhë -a 'piö, 'ö- bho 'gan 'gü.

⁶⁹=Ya -gludë Davidö 'yö -kë -a -bha yuökëme 'ka bhë, -a =suu' -ta -me do 'ö kwa Dhame 'piigbeeze 'ka, -a nu kwa -dhë.

⁷⁰Pë 'ö- =blëe ö -wodhiölome 'slööslö -nu -dhë, 'yö- -dhe =ya =glɔɔ yö -mü.

⁷¹Yö gia- -ya 'tɔ -go kwa -dhë 'dhiö =ne ö -dho kwa dha kwa yaagüme -nu waa- kwa -sanzëme -nu -bha -kɔ -mɔ 'wuën- sü -gɔ.

⁷²Yö -dho kwa 'bhema -nu 'yena yö, 'ö- -zo dho -büö -a -bha -dhikuédhe 'slööslö 'ö- -da kwa -nu kwa ziën bhë -a 'ka.

⁷³Bhii -yö ö -wo -bhö kwa 'bhema Ablaamö -dhë -ne, ⁷⁴ö -dho kwa bho kwa yaagüme -nu -bha -kɔ -mɔ 'wun -bha -sü 'gü, kö 'kwa yuö kē -a -dhë -zogbandhe 'ka.

⁷⁵Yö kē 'dhö kö 'kwa kē 'slööslö 'iin kpengdhö -a wö 'dhiö -dhekpacyi 'saadhö 'ka, kwa -bha -tosiadhe kē -sü 'ka.

⁷⁶Dhe =ya kē 'dhö, ma 'në, -wo -dho ü -dhe -Zlan 'yö -ziö pē 'plē -ta -a -wodhiölome, bhii ü -dho 'ta sü Dëme 'dhiö, -a -bha zian -gblooga -nu -yuö kē -sü 'ka, ⁷⁷kö -yaan -a -zɔn -a -bha 'següme -nu -dhë =ne -yö -dho -an dha, -ziö -an -bha =sɔn yaa -nu -ta -sü 'ka.

⁷⁸Bhii kwa 'yena yö -sü 'gblüünzē bhë -a -wun 'gü, -Zlan -yö -dho -dhepuudhe 'yö go dhuö -a bhü kwa -ta =ne lan- =luu' -kɔ 'ö 'bhü -na 'ka bhë -a 'dhö ⁷⁹kö -yaan -dhe 'po me -nu 'wo -dhetiidhe 'gü waa- me -nu 'wo -suö ga -dhë -an -ta, kö -yaan kwa -da =zuöyagluu -zian -ta.»

⁸⁰Në 'ö bhë -yö -kē =kpea' -dhia kö 'wundɔdhe -yö kē -na -a -gɔ; 'yö -kē -dhe 'ö me gbe 'yaa- -bha -a -bha 'ö dho 'ö yöë yi 'yö ö -de -zɔn -a 'ka Izlaelö -següme -nu -dhë -a -bha.

Yesu bho -sü (Matiö 1.18-25)

2 ¹Töng 'dhö bhë -a 'ka, -gludē =va Ogitö -yö tɔng -da kö me -nu 'wo Wlɔmē -me -nu -bha tɔng =löö -wo -an 'plē 'tɔ -ya. ²Tɔyadhe 'ö 'dhö bhë -a -blëezē -yö -kē 'töng 'ö Kilinisö 'yö kē 'segɔ 'wo- -dhe Sili, -a -kɔɔnme do 'ka bhë -a 'ka. ³Me -nu 'töüdhö -wo -dho wo 'tɔ -ya -dhia, me 'ö -dhö -a 'kpɔ -pö 'gü.

⁴Zozefu -de 'pö -yö -go Nazaletē Galile -se 'gü, 'yö dho Zude -se 'gü, pödhe do 'wo- -dhe Betelemē 'ö -gludē Davidö -yö bho -a 'gü bhë -a -bha, bhii 'ö tɔɔ yö gia- -yö -go Davidö =suu' -ta 'gü. ⁵Yö 'dhö waa- ö bha -zo -tën -a -dhë -me 'wo- -dhe Mali bhë -wo -dho 'wo wo 'tɔ -ya kö -yö 'guzē. ⁶-Wo -kē Betelemē, 'ö- 'bëbhoyi -yö -lo, ⁷yö ö bha 'në -blëezē kpɔ; -yö -kē 'në gɔɔn- 'ka; 'yö sɔ =ploo -a 'ka, 'yö- -da -du -bha pē -bhö -a 'gü -pē 'gü, bhii 'ö tɔɔ waa wɔdhe yö -nia -nu -wɔ -a 'gü -kɔ 'gü.

-Zlan -bha bɔme -yö -wo -tuëmaakëme -nu -ta

⁸Pian gia- bhë -a -ta -tuëmaakëme -nu -wo -kē blöö mü gbeng wo -bha -tuë -maa kē -dhia. ⁹Ö -Zlan -bha bɔme do -yö -wo -an -ta, 'ö -Zlan 'bhü -yö -nië -an -zü. =Dhe =ya kē 'dhö, 'yö 'suö =va -yö -da -an 'gü. ¹⁰Yö -Zlan -bha bɔme bhë 'yö- pö -an -dhë: «Kö =kun 'ö 'suö -yö ka -kē, bhii a -nu 'wuntaɔsē 'yö dho Izlaelö -següme -nu 'plē =zuögludhi =va bhë -a 'ka ka -dhia: ¹¹Gbeng do =ne -a 'gü, Davidö -gɔ plöö, ka Dhame =ya bho, 'ö tɔɔ Dëme 'ö Klito 'ka. ¹²Pē 'yö dho kē =duaképē 'ka kö 'wun 'a- =blë' -na =ne

'kaan- -dhe 'wun gia- 'ö tɔɔ: 'Ka 'dho, ka -dho 'në 'puu 'wo sɔ =ploo -a 'ka -a yö kö -yö wɔ -sü 'ka -du -bha pë -bhö -a 'gü -pë 'gü.»

¹³'Yö 'kan 'wo- wo wo -ta kö -Zlan -bha bɔmɛ -gbaa =va =wa 'go dhang- 'gü, =wa nu -a -bha bɔmɛ 'ö =sia -a 'piö, 'wo yö 'tan bho -Zlan 'piö -sü -bha 'wo- pö: ¹⁴«'Tɔbhɔdhe -yö -Zlan 'yö dhang- 'gü 'ö -ziö pë 'plɛ -ta bhë -a -bha 'ka; -yö ö -bha =zuöyagluu -nu mɛ -nu 'ö -an -dho -ya -kë 'kpongtaa zö -an -dhë.»

-Tuëmaakëmɛ -nu -dho Betelëmɛ

¹⁵=Dhe 'ö -Zlan -bha bɔmɛ -nu =wa 'go -an 'piö =wa 'dho dhang- 'gü, 'ö -tuëmaakëmɛ -nu 'wo bhë 'wo- pö wo 'ko -nu -dhë: «Kö -kwa 'dho 'kwa -lo Betelëmɛ, pë 'bhle 'yö -kë 'ö Dëmɛ -ya -zɔn kwa -dhë bhë 'kwa kwa 'yan dɔ -a -bha!»

¹⁶'Wo =luu 'wo -ziö 'wo dho 'zozodhö 'wo -kpën Mali 'dhö, Zozefu 'dhö waa- 'në 'yö -kë wɔ -sü 'ka -du -bha pë -bhö -a 'gü -pë 'gü bhë -an -bha. ¹⁷=Dhe 'ö =wa -an yö, 'ö 'wun 'ö -Zlan -bha bɔmɛ -ya =blɛɛ -an -dhë 'yö -gban 'në bhë -a -bha bhë 'wo- =blɛɛ -an -dhë. ¹⁸'Ö mɛ 'saadhö 'wo -tuëmaakëmɛ -nu -wo bhë 'wo- ma, -an 'te -yö -tun 'wun 'wo- =blɛɛ bhë -a -wun 'gü. ¹⁹'Kɛɛ Mali -yö 'wun -nu 'wo =nɛ -an 'plɛ -kpɔ ö =zuö' 'piö, 'ö yö -a -yö 'ko 'dhiö kë -sü -bha. ²⁰=Dhe =ya kë 'dhö, -tuëmaakëmɛ -nu 'wo bhë 'wo -yɛ wo 'zü wo 'gbloo -ta, 'wo -Zlan 'tɔ -kë =va, 'go mü 'wo- 'tɔ 'saa -blü pë -nu 'wo- ma, 'wo -an yö bhë -an -wun 'gü, bhii -an 'plɛ -wo -kë =nɛ -kɔ 'ö -Zlan -bha bɔmɛ -ya =blɛɛ -a 'ka -a 'dhö.

Yesu 'tɔ 'kpɔ -sü

²¹=Dhe 'ö -dhɛkpaɔyi 'slɛaga -naa =ya -lo, 'wo- -kë 'bɔn 'ka; 'wo- Yesu -tɔ kpɔ, bhii 'tɔ bhë -Zlan -bha bɔmɛ -ya -zɔn 'dhiö Mali -dhë -yaan =tun -a -gu 'sü -na.

Yesu -zɔn -Zlan -gɔ kɔɔ -sü

²²=Dhe yi 'ö -an -bha -kë 'slööslö -yi 'ka bhë =waa- yö 'ko 'dhiö =nɛ -kɔ 'ö Moizö -yö tɔng -zɔn -a 'ka bhë -a 'dhö. 'Yö Zozefu waa- Mali -wo nu 'në 'ö bhë -a 'ka Zeluzalëmɛ kö -waan -a -zɔn -Zlan -dhë. ²³Bhii -yö =bɛɛn' -sü 'ka -Zlan -bha tɔng 'gü =nɛɛ: 'Në -blɛɛzë 'wo 'kpɔ -na 'në gɔɔn- 'ka bhë, -wo -dho -a -ya -de -ta -Zlan -bha 'ka. ²⁴'Ö 'wo slabhopë 'ö -Zlan -bha tɔng -ya -zɔn bhë 'wo- nu slabhome -dhë; -yö -kë -tönggö =plɛ 'iin -an =suu' -bhloo =plɛ 'ka.

²⁵Gɔɔn- do -yö -kë Zeluzalëmɛ 'wo- -dhe Simeɔn. Gɔɔn- 'ö bhë -yö -kë kpengdhö; 'yö -Zlan =bhlë -ya, 'ö -ya mɛ 'ö dho Izlaelö -sɛgümɛ -nu dha bhë -a -bha nu -sü -gɔ. -Zuu 'slööslö -yö -kë -a 'gü. ²⁶'Yö- pö -a -dhë =nɛ -yö -dho ö 'yan dɔ -Zlan -bha -Yamɛ 'ö dhoë- bɔ bhë -a -bha -yaan =tun ga -na. ²⁷-Zuu 'slööslö 'ö bhë -yö 'dhiö -sü Simeɔn 'ka, 'yö nu -Zlan -gɔ kɔɔ.

-Dhe Yesu -me -nu -wa nu -a 'ka, -yö kē 'dhö kö pē 'ö tɔng -ya pö -waan -a kē -a -wun 'gü, ²⁸Ö Simeɔn -ya sü 'ö- kun ö kwɛɛ 'ö -Zlan zuö pö =woë' -nɛɛ: ²⁹«-Dhe =ya kē 'dhö, n Dɛmɛ, pē 'ü- 'tɔ go bhē 'bha- -de kē, ü -kwaɛ' ma 'a ü bha yuökɛmɛ 'ka n -zü, kö 'ü n 'sü =zuöyagluu 'ka 'sabla, ³⁰⁻³¹bhii ü bha Mɛdhamɛ 'ö 'ü- -ya 'següme -nu 'plɛ 'dhiö 'ü- bɔ bhē, ma gia- n 'yan -ya -kpɛn -a -bha. ³²Yö 'ö tɔɔ -dhepuudhe 'yö dho ü -zɔn 'kpongtaamɛ -nu 'saadhö -an -dhē. 'Go mü, 'yö dho 'tɔvadhɛ nu ü bha 'sego Izlaelö -dhē.»

Simeɔn -bha -Zlan -wo 'dhiö -lo -sü

³³Yesu dē waa- dhe -an 'te -yö -tun 'wun 'ö Simeɔn -ya -blɛɛ -a 'kluë- bhē -a -wun 'gü. ³⁴Ö Simeɔn -yö 'dhuë- kpɔ -an -bha, 'go mü 'ö- pö Yesu dhe Mali -dhē: «-Zlan -yö 'nē -nɛ -ya -ya kö -yaan kē Izlaelö 'gü -me -nu -dhe =va -dhe -bha -püö -gɛn 'ka, 'go mü 'zü -yaan kē -an mɛdhevadhɛ -nu -luu' -me 'ka. -Yö -dho kē -Zlan -bha -duakɛpɛ do 'ö mɛ -nu dho dɔ -a -gɔ 'yɛnng -a 'ka. ³⁵Go mü 'yö dho mɛdhevadhɛ -bha -zo -ta -a 'gü -wun 'yö -bin -sü 'ka, -an 'plɛ yö -dhegbɛadhɛ 'gü. Bhi -zɛ, dhebɔ, =ya kē ü -bha 'ka, -zuö' 'klobhɔdhe -dho ü -zuö' pɛ =nɛ -blaan -bha mɛ 'pɛ -kɔ 'dhö.»

Anë -yö -Zlan -wo 'dhiö -lo

³⁶Dhebɔ do -yö -kē -dhö 'pö, 'yö -kē -Zlan -wodhiölodhe 'ka 'wo- -dhe Anë; -yö -kē Fanuelö 'yö go Aɛɛɛ -gɔ 'gunng 'gü bhē -a 'dhu 'ka. -Yö -kē mɛ -klöö 'ka. -Kwɛ 'slaple =nɛ 'ö waa- ö =gɔn 'wo -kē wo 'ko 'piö, ³⁷Ö to =geandhe 'ka, 'ö- -kwɛ -kē 'gɔɔ- 'slɛaga ö ga -yiisië -naa -yö =loë'. 'Yaa 'go -Zlan -gɔ kɔɔ 'gbɛɛdhö, 'yö yuö -kē -Zlan -dhē yi 'saadhö 'ka kö -yö ö -ben 'to -na kö -yö =bheɛ' -na. ³⁸Yö -de 'pö -yö -wo mü, 'ö yö -Zlan zuö pö -sü -bha. 'ö 'wun 'ö -gban 'nē bhē -a -bha 'yö- -blɛɛ mɛ -nu 'saadhö 'wo -ya kö -Zlan -yö Zeluzalemɛ -dhe bho 'gan 'gü bhē -an -dhē.

-An -bha -yɛ 'zü -sü 'wo dho Nazaletë

³⁹=Dhe 'ö Yesu -me -nu -wa yɛn pē 'ö Dɛmɛ -bha tɔng -ya pö bhē -a kē -sü -bha, 'ö 'wo dho wo -gɔ plöö Nazaletë, Galile -sɛ 'gü. ⁴⁰Nē bhē -yö -kpɛa 'wundɔdhe waa- 'kpaakpadhe -an 'ka; 'ö -Zlan -kɔ -sɛ -yö -kē -a -ta.

Yesu -bha 'dho 'ö- wo -Zlan -gba -a 'gü -kɔ 'gü kö -a -kwɛ =ya kē 'gɔɔ- do ö ga =plɛ

⁴¹-Kwɛ 'saadhö 'ka, Yesu -mɛ -nu -wo -dho Zeluzalemɛ Paakö 'wlaan- -ta. ⁴²=Dhe 'ö Yesu -kwɛ =ya kē 'gɔɔ- do ö ga =plɛ, -wo -dho Paakö 'wlaan- -ta =nɛ -kɔ 'wo- =kaa' -kplawo -a 'dhö. ⁴³=Dhe 'ö 'wlaan- =ya yɛn, 'ö Yesu -mɛ -nu -wo -yɛ wo 'zü; Yesu -zɛ 'pö -yö -to Zeluzalemɛ, 'kɛɛ -a mɛ -nu waa- =tei' dɔ. ⁴⁴Ö -an -bha -zotadhɛ -ya pö -bezɛ, Yesu -dho kē wo -ta 'kuë -mɛ -nu 'piö; 'wo -dhekpɔɔyi do =kaa' 'ta 'sü -sü 'gü. =Dhe -kē 'dhö, 'wo yö -a =mɛɛ' -sü -bha wo -mɛ -nu waa- wo dɔmɛ -nu ziɛn zian

-ta, ⁴⁵'kɛɛ waa- yō. 'Yō 'wo -yɛ wo 'zū 'wo nu Zeluzalemē -a =mɛɛ' -sū 'ka. ⁴⁶-Dhɛkpaɔyi kē -yaaga -naa bhē 'wo- yō kō -yō -ya -sū 'ka Zuifō -nu -bha mɛ =daan' -mɛ -nu ziɛn, -Zlan -gba -a 'gū -kō 'gū, ɔ 'to 'to -dhia -an -wo -bha kō -yō -dhɛɛ' -nu 'kpō -na -an -gɔ, kō yō -de 'pō, -yō -an -bha -dhɛɛ' -nu -yɛ 'zū kē -na. ⁴⁷Mɛ -nu 'wo- -bha 'wun -daa -kē -kō ma, -an 'te -yō -tun -a -bha 'kpaakpadhe waa- 'wun -daa -nu 'yō- kē -na -an -gɔ bhē -a -wun 'gū. ⁴⁸-Dhɛ 'ō- -mɛ -nu =waa- yō, 'ō- -wun -yō -an kun, 'ō- -dhe -ya pō -a -dhē: «Ma 'nē, -mē -kē 'ū- -kē yi -gɔ 'dhō e? Ü dē 'dhō, ma 'dhō, yi =zuō' =ya dɔ -gbɔudhō ü -mɛɛ' -sū 'ka!»

⁴⁹'Ö Yesu -ya pō -an -dhē: «-Mē -kē 'ka n =mɛɛ =ɛ? 'Kaa- dɔa -nɛ a -dho n -zo kē n Dē -bha yuō -nu 'piō a?»

⁵⁰'Kɛɛ 'wun 'yō- =blɛɛ 'dhō bhē waa- -gɛn dɔ.

⁵¹-Dhɛ -kē 'dhō Yesu -yō -luu, 'yō -ziō -an 'piō 'wo dho Nazaletē; -yō -kē 'wun -ma -an -ta -dhia. -A dhe -yō 'wun -nu 'wo =nɛ -an 'plɛ -kpō ɔ =zuō' 'piō -dhe =kpaɔ =dhia' -dhē. ⁵²'Ö Yesu -yō -kē =kpea =dhia 'kpaakpadhe 'ka; 'yō -kē -Zlan waa- mɛ 'bhee- -nu -an wō 'dhiō -sē.

Zan Batisō -yō -Zlan -wo -blɛɛ

(Matiō 3.1-12; Maakō 1.1-8; Zan 1.19-28)

3 ¹-Kwɛ 'gɔɔ- do ɔ ga 'sɔɔdhu -naa 'ō -kē -gludē =va Tibɛɛ =yɛnng 'gū bhē -a 'ka, Pɔnsō Pilatō -yō -kē Zude -sɛ =kɔɔn -dhia; Elɔdō -de 'pō -yō -kē Galile -sɛ =kɔɔn -dhia, 'ō- dheglu Filipō -de 'pō, -yō -kē Itule -sɛ waa- Trasonitō -sɛ -kpa 'kuē- -sū =kɔɔn -dhia; 'ō Lizania -yō -kē Abilenē -sɛ =kɔɔn -dhia, ²'Ö Anē waa- Kaifō 'wo -kē slabhome =va 'ka. -A 'tɔng gia- bhē -a 'ka 'ō Zan 'ō -kē Zakali gbō 'ka bhē, 'ō -Zlan -yō 'wun =blɛɛ -a -dhē 'yɛnng =taa. ³'Ö Zan -yō dho 'pian 'ō bɔ 'yiga 'wo- -dhe Zuuden ga bhē -a 'piō =zian', 'yō -dhoo bho 'ō- pō: «-Ka nu 'ka ka =zuō' -dhiē' -Zlan 'piō, 'ka bɔ yiō kō -yaan ziō kaa- =sɔɔn yaa -nu -ta!» ⁴-Kɔ bhē 'ō =kaa' -nɛ pē 'ō -Zlan -wodhiölome Ezai -ya =bɛɛn -a 'ka ɔ -gɔ 'sēɛdhe 'gū -a 'dhō: Mɛ -wo 'ō -dhoo bho -na 'yɛnng =taa bhē -ya -pō: -Ka Dɛmɛ -bha zian -gblooga -nu -yuō kē, 'ka -an dɔ kpɛngdhō! ⁵'Yi goo 'gū -dhe -nu 'plɛ 'gū -dho -blii; -tɔn -nu, goo -nu -wo -dho =wüü', 'ō -an -ta -yō -mɔ 'kuē. -Kpinng -kloo' -dhe -nu 'plɛ -dho dɔ 'trüün 'piō, 'ō zian -gblooga -nu 'waa -sē, 'ō- 'plɛ -dho kē -sē. ⁶Mɛ -nu 'saadhō -wo -dho kwa dha -kɔ 'ō -Zlan -yō kwa dhaa bhē -a -yō.

⁷Mɛ -gbaa -nu -wo -nu Zan 'piō kō -yō -an -bha -go =sɔɔn yaa 'gū -bɔyiödhe kē, 'kɛɛ Zan -ya -pō -an -dhē: «=Mɛɛziɛmɛ -nu 'ka =nɛ! -Yō -kē ka -zo 'piō =nɛ ka -dho dha -Zlan -bha za 'ō 'dhoɛ- nu bhē -a -gɔ -a? ⁸-Ka 'wun -nu 'yō dho -a -zɔn =nɛ 'ka ka =zuō' =dhiē -Zlan 'piō -an kē; kō -kun 'ka- pō ka -de -dhē =nɛɛ: 'Yi dē 'ō tɔɔ Ablaa mō, bhii a- -blɛɛ ka -dhē =nɛ -Zlan -kɔ -yō -mɔa kō -yaan -guō kpō -nu 'wo =nɛ -an kē mɛ 'ka -waan kē Ablaa mō =suu' -ta -nu 'ka! ⁹=Dua -yō -pē kē -sū 'ka kō mɛ -yaan 'lü bɔa. 'Lü 'ō 'yaa bha ɔ bhe -sē 'ka, -yō -dho bɔ 'yō -lo 'siō 'gū.»

¹⁰-Dhe =ya kë 'dhö, 'ö me gbung -nu 'wo bhë 'wo- pö -a -dhë: «=Dhe 'ö 'dhö =ne, kö -më 'yi dho -a kë =ε?»

¹¹'Yö- -daa -kë -an -gɔ 'ö- pö: «Me 'ö -da -bha -sɔ =plë 'dho -a -gɔ, -ya do nu me 'ö- gbë 'yaa- -gɔ -a -dhë. 'Go mü, me 'ö -bhöpë 'dho -a -gɔ, -ya -glu me 'ö 'yaa -an -gɔ -an 'ka!»

¹²'Ö 'nii- =sonng' 'kun -me -nu -de 'pö, 'wo nu Zan 'piö kö -yaan -an bɔ yiö, 'ö 'wo Zan =dhëe' kpɔ 'wo- pö: «Yi -Gɔme, yi -de 'pö, yi -dho -a kë =dhë =ε?»

¹³'Yö- -daa -kë -an -gɔ 'ö- pö: «Kö -kun 'ka bho -pë 'ö tɔng -ya pö 'kwa- bho bhë 'ö 'ka -lö -a -naa -zü!»

¹⁴'Ö 'dhasi -nu -de 'pö, 'wo- =dhëe' kpɔ 'wo- pö: «Yi -de 'pö 'dhee, -më 'yi dho -a kë =ε?»

'Yö- pö -an -dhë: «Kö -kun 'ka 'wëü- gbë kun me -nu -gɔ 'gügbeedhe 'ka, -kpla -ya -an -bha -sü 'ka; -ka ka -zo kë ka =saan' 'wo- bho -na bhë -a 'piö!»

¹⁵=Dhe -kë =ne 'següme -nu -wo -ya -Zlan -bha -Yame -bha nu -sü -gɔ 'yan -to zian- -sü 'ka bhë, -a -wun 'gü me 'ö -dhö 'yö -kë -a -zo 'piö =ne Zan 'ö tɔɔ -Zlan -bha -Yame. ¹⁶=Dhe =ya kë 'dhö, 'ö Zan -ya -pö -an -dhë: «Me 'ö- 'pii 'dhö 'gbee- 'ö =zië' n -ta, -yö -dho nu; yaa n -ma 'kun poo kö 'aan- -kloo'- -a 'dhiö 'aan- -a -bha -sakpa yun =bhüö' 'po. Ma -zë a ka -bɔ yiö, 'këe yö -zë -yö -dho ka pa -Zuu 'slööslö waa- 'siö -an 'ka. ¹⁷-Yö -dho 'dhaa- kun ö kwëe, pë -piö -pë 'ka kö -yaan -mlü -gbo bho -a 'flee- -nu ziën. -Yö -dho ö bha -mlü 'flee- -nu -lo ö -gɔ 'slëëdhö, 'yö -mlü -gbo -güö 'siö 'yaa =dhuu 'gbëedhö bhë -a 'gü.»

¹⁸-Kɔ do bhë -a 'ka, 'ö Zan -yö 'wuntaɔsë =blëe -a 'ka 'següme -nu -dhë, -an =faan' 'më -wo =plëëzë =blëe'- -an -dhë -sü 'ka. ¹⁹'Töng 'ö 'dhö bhë -a 'ka, Zan -yö za -kpa 'sedë Elɔdö -bha, Elɔdiadö 'yö -kë -a dheglu bɔɔ 'ka bhë -a 'kun 'ö- wo -a -gɔ waa- 'wun -nu 'ö 'waa -së 'yö -an -kë bhë -a -wun 'gü. ²⁰=Dhe =ya kë 'dhö, Elɔdö -yö ko 'zü, 'ö 'wun yaa 'bhaa do kë, 'ö tɔɔ Zan 'kun 'yö- wo 'yö- -da -kanso 'gü.

Yesu -bɔ yiö -sü

(Matiö 3.13-17; Maakö 1.9-11)

²¹'Següme -nu -wo -dho 'wo -an bɔ yiö. Yesu -de 'pö, 'yö dho, 'ö Zan -ya bɔ yiö. =Dhe 'ö -bhëa' -na, 'yö dhang- 'dhi -yö -po, ²²'Ö -Zuu 'slööslö -yö go dhang- 'gü; 'këe -yö -kë -tönggö 'ka 'ö nu 'ö =yɔɔ -a -ta dhuö; 'ö -wo -yö bɔ dhang- 'gü 'yö -we 'ö- pö: «Ü n Gbö 'ö- -dho -yö n -kë -a 'ka, bhi =ne 'ö n 'yi -kan -a -dhë -wun 'plë 'dho ü 'gü.»

Yesu 'bhema -nu

(Matiö 1.1-17)

²³=Dhe Yesu -kwe =tei' =ya kë =ne pë 'gɔɔ- -yaaga 'dhö, 'ö -ya ö bha yuö zü dɔ -sü -bha. Pë 'ö me -nu -wo wo -zo -ta -a 'gü 'ö tɔɔ Zozëfu gbö -mü

-a 'ka. Zozefu -yö -kë Eli gbö 'ka, ²⁴yö -de 'pö 'yö -kë Matatö gbö 'ka, yö -de 'pö 'yö -kë Levi gbö 'ka, yö -de 'pö 'yö -kë Melisi gbö 'ka, yö -de 'pö 'yö -kë Zanai gbö 'ka, yö -de 'pö 'yö -kë Zozefu gbö 'ka, ²⁵yö -de 'pö 'yö -kë Matatiasö gbö 'ka, yö -de 'pö 'yö -kë Amosö gbö 'ka, yö -de 'pö 'yö -kë Naomë gbö 'ka, yö -de 'pö 'yö -kë Esili gbö 'ka, yö -de 'pö 'yö -kë Nagai gbö 'ka, ²⁶yö -de 'pö 'yö -kë Maatö gbö 'ka, yö -de 'pö 'yö -kë Matatiasö gbö 'ka, yö -de 'pö 'yö -kë Semeinë gbö 'ka, yö -de 'pö 'yö -kë Zozesö gbö 'ka, yö -de 'pö 'yö -kë Zoda gbö 'ka, ²⁷yö -de 'pö 'yö -kë Zoana gbö 'ka, yö -de 'pö 'yö -kë Lesa gbö 'ka, yö -de 'pö 'yö -kë Zolobabelö gbö 'ka, yö -de 'pö 'yö -kë Salatielö gbö 'ka, yö -de 'pö 'yö -kë Neli gbö 'ka, ²⁸yö -de 'pö 'yö -kë Melisi gbö 'ka, yö -de 'pö 'yö -kë Adi gbö 'ka, yö -de 'pö 'yö -kë Kosamë gbö 'ka, yö -de 'pö 'yö -kë Elimadamë gbö 'ka, yö -de 'pö 'yö -kë Elö gbö 'ka, ²⁹yö -de 'pö 'yö -kë Yesu gbö 'ka, yö -de 'pö 'yö -kë Eliezeë gbö 'ka, yö -de 'pö 'yö -kë Zolimë gbö 'ka, yö -de 'pö 'yö -kë Matatö gbö 'ka, yö -de 'pö 'yö -kë Levi gbö 'ka, ³⁰yö -de 'pö 'yö -kë Simeon gbö 'ka, yö -de 'pö 'yö -kë Zuda gbö 'ka, yö -de 'pö 'yö -kë Zozefu gbö 'ka, yö -de 'pö 'yö -kë Zonamë gbö 'ka, yö -de 'pö 'yö -kë Eliakimë gbö 'ka, ³¹yö -de 'pö 'yö -kë Melea gbö 'ka, yö -de 'pö 'yö -kë Mena gbö 'ka, yö -de 'pö 'yö -kë Matata gbö 'ka, yö -de 'pö 'yö -kë Natan gbö 'ka, yö -de 'pö 'yö -kë Davidö gbö 'ka, ³²yö -de 'pö 'yö -kë Zese gbö 'ka, yö -de 'pö 'yö -kë Obädö gbö 'ka, yö -de 'pö 'yö -kë Boozö gbö 'ka, yö -de 'pö 'yö -kë Saala gbö 'ka, yö -de 'pö 'yö -kë Naason gbö 'ka, ³³yö -de 'pö 'yö -kë Aminadabö gbö 'ka, yö -de 'pö 'yö -kë Ademinë gbö 'ka, yö -de 'pö 'yö -kë Aani gbö 'ka, yö -de 'pö 'yö -kë Esilomë gbö 'ka, yö -de 'pö 'yö -kë Fale gbö 'ka, yö -de 'pö 'yö -kë Zuda gbö 'ka, ³⁴yö -de 'pö 'yö -kë Zakabö gbö 'ka, yö -de 'pö 'yö -kë Izaakö gbö 'ka, yö -de 'pö 'yö -kë Ablaamö gbö 'ka, yö -de 'pö 'yö -kë Tala gbö 'ka, yö -de 'pö 'yö -kë Nasoo gbö 'ka, ³⁵yö -de 'pö 'yö -kë Selusö gbö 'ka, yö -de 'pö 'yö -kë Lagau gbö 'ka, yö -de 'pö 'yö -kë Falekö gbö 'ka, yö -de 'pö 'yö -kë Ebelö gbö 'ka, yö -de 'pö 'yö -kë Saala gbö 'ka, ³⁶yö -de 'pö 'yö -kë Kainamë gbö 'ka, yö -de 'pö 'yö -kë Aafazadö gbö 'ka, yö -de 'pö 'yö -kë Semë gbö 'ka, yö -de 'pö 'yö -kë Noe gbö 'ka, yö -de 'pö 'yö -kë Lamekö gbö 'ka, ³⁷yö -de 'pö 'yö -kë Matuzala gbö 'ka, yö -de 'pö 'yö -kë Enokö gbö 'ka, yö -de 'pö 'yö -kë Zaledö gbö 'ka, yö -de 'pö 'yö -kë Maleleelö gbö 'ka, yö -de 'pö 'yö -kë Kainamë gbö 'ka, ³⁸yö -de 'pö 'yö -kë Enosö gbö 'ka, yö -de 'pö 'yö -kë Setö gbö 'ka, yö -de 'pö 'yö -kë Adan gbö 'ka, yö -de 'pö 'yö -kë Zlan gbö 'ka.

'Güandhe 'ö nu Yesu -ta
(*Matii 4.1-11; Maakö 1.12-13*)

4 ¹Yesu 'ö -Zuu 'slööslö -ya pa bhë -a -go Zuuden =bhaa -sü 'ka, 'ö -Zuu 'slööslö -yö yö -a -dhë 'dhiö, 'ö dhoë -dhe 'ö me gbe 'yaa- -bha bhë -a 'gü. ²-Dhekpacyi 'goo- -yiisië -ne 'yö- -kë mü. 'Töng 'ö 'dhö bhë yaa pë gbe

-bhö -a 'ka. =Dhe 'ö -dhekpacyi 'gɔɔ- -yiisië 'wo bhë 'ö =wa ziö, 'ö din -ya kun. 'Ö Satan -ya 'gü dan, ³'yö- pö -a -dhë: «Ya kë =ne -Zlan Gbö -mü ü 'ka, -bhö -guö 'ö =ne -a 'gla -bhöpë 'gü kö 'ü- -bhö!»

⁴'Ö Yesu -ya pö -a -dhë: «Abi', bhii pë 'ö =bëen' -sü 'ka -Zlan -bha 'sëédhe 'gü 'ö tɔɔ: *Më 'bhee- 'ka 'dho -tosiadhe kë -bhöpë -de 'sloo -ta!*»

⁵'Yö- -sü 'yö =daa' -tɔn tuö 'yö 'kpongtaa -gludëdhe -pö 'ple -zɔn -a -dhë, ⁶'Ö- pö -a -dhë: «A -dho ü gbaa -wogbiindhe waa- 'tɔbhɔdhe -an 'ka -gludëdhe -pö -nu -bha zö, bhii 'ö tɔɔ pë -nu 'wo zö -wo n -gbaa -a 'plë 'ka, a -dho -a nu më 'ö -dhi n -dhë -a -dhë. ⁷=Ya kë =ne 'bha 'gblü n 'dhiö, -a 'ple -dho kë ü -bha 'ka.»

⁸'Ö Yesu -ya pö: «Pë 'ö =bëen' -sü 'ka 'ö tɔɔ: -Bhö ü Dëme, ü -bha -Zlan dosen 'kpaan gba 'ü yuö kë yö dosen 'kpaan -a -dhë.»

⁹'Ö Satan -ya sü 'zü, 'yö dhoë Zeluzalemë, -Zlan -bha 'kɔ =va tuö, 'yö-pö -a -dhë: «Ya kë =ne -Zlan Gbö -mü ü 'ka, 'go dhuö zö 'ü -püö sia- -de, ¹⁰bhii pë 'ö =bëen' -sü 'ka -Zlan -bha 'sëédhe 'gü 'ö tɔɔ: *-Zlan -dho -a pö ö bha bɔmë -nu -dhë -wo wo -kɔ 'kpɔ ü -gɔ zian- kö -kun pë gbe dho kë ü 'ka. 'Go mü 'zü -wo -dho ü bun -së 'ka kö -kun ü -gen dho -zuö -guö -bha. »*

¹²'Ö Yesu -ya pö -a -dhë: «Pë 'ö =bëen' -sü 'ka 'pö 'ö tɔɔ: *Kö -kun 'ü ü Dëme ü -bha -Zlan 'gü dan! »*

¹³=Dhe =ya Yesu 'gü dan -kɔ =suu' -'saadhö -ta 'ö yaa- 'kundhe gbe yö, 'yö -ziö 'ö dho 'ö yöë yi gbe -bha.

Yesu -bha ö bha yuö zü -dɔ Galile -se 'gü -sü

(Matiö 4.12-17; Maakö 1.14-15)

¹⁴Yesu -yö -ye ö 'zü 'ö dho Galile, pa -sü 'ka -Zuu 'slööslö -bha 'piigbeedhe 'ka. -Wo -yö -a 'tɔ 'saa -blü -sü 'gü 'segɔ 'ö bhë -a -dhe 'saadhö 'gü. ¹⁵-Yö -kë më -nu =daan' =dhia Zuifö -nu -bha -bhɔkuëkɔ -nu 'gü. 'Ö më -nu -wa 'tɔ -kë =va -dhe 'saadhö -a -bha.

-Wo Yesu -kë Nazaletë

(Matiö 13.53-58; Maakö 6.1-6)

¹⁶Yesu -yö -go mü 'yö nu Nazaletë, -dhe 'ö =kpea -a -bha bhë -a -bha. 'Ö Zuifö -nu -bha =glooyi 'ka 'yö -da -an -bha -bhɔkuëkɔ 'gü =ne -kɔ =ya kë 'yö- -kaa' -kplawo bhë -a 'dhö; 'yö =luu kö -yaan pë 'ö =bëen' -sü 'ka -a pö. ¹⁷Wo nu -Zlan -wodhiölome Ezai -bha 'sëédhe -be 'ka -a -dhia. 'Sëédhe -be bhë, =dhe 'ö- 'dhi -po, 'ö- 'yan -yö -kpën pë 'ö -kë =bëen' -sü 'ka- -bha =ne: ¹⁸-Zuu 'slööslö 'ö go n Dëme 'piö -yö n 'piö, -yö n -sü 'yö n bɔ kö 'aan- nu 'wuntɔsë 'ka 'yename -nu -dhia. -Yö n -bɔ kö 'aan- më -nu bho 'gan 'gü, 'aan- 'yënngtiime -nu -dhe bo; 'go mü 'aan- më -nu 'wo 'klobhɔdhe 'gü -an bho -a 'gü, ¹⁹kö -kwe 'ö Dëme dho ö bha 'glusë kaa bhë, 'aan- -a -wun =blë' -an -dhë.

²⁰'Yö Yesu -yö 'sëédhe -be bhë -a kpa 'kuë-, 'yö -nu yuökëme -dhë, 'ö =yaannu kö -yaan -an =daan'. Më -nu 'töüdhö 'wo -kë -bhɔkuëkɔ 'gü mü 'saadhö, -an 'yan -yö

-dhië Yesu 'piö dosen. ²¹Dhe -ya kë 'dhö, 'yö- pö -an -dhë: «Wun -dhe 'ö -been' -sü 'ka, 'ka 'go -na ma -dhia bhë, -a -de -ya kë -dæ 'töng gia- 'ka- -maa bhë -a 'ka.»

²²Me -nu 'wo kë mü -wo -we -a -wo -bha, 'ö -an 'te -yö tun 'wun -sæbo 'yö 'go -na -a dhiö bhë -a -wun 'gü, 'wo- pö wo 'ko -nu -dhë -næ: «'E! Zozefu gbö -næ 'yaa -mü -a?»

²³Ö Yesu -ya pö -an -dhë: «Ka -dho 'wun -zuan' 'ö -næ -a -zön n -dhë: «Dhöngrö, -bhö ü -de dha!» 'Ka dho -a pö 'zü n -dhë: «Pë -nu 'ü- -kë Kapænaomë 'saadhö 'yi- -ma bhë, -bhö -an 'ple kë ü -de -gö plöö zö!» »

²⁴Go mü 'zü 'yö- pö: «A- -pö ka -dhë 'wun gia- 'ka: 'Waa -Zlan -wodhiölome gbe -bhlë -ya ö -de -gö plöö. ²⁵A -yöön -a -ta dhuö ka -dhë 'zü -næ kö Eli -yö -tun -dhö bhë, -gæandhoo -nu -wo -kë -dhö -va Izlaelö -se 'gü zö, 'töng 'ö dha yaa ban -a 'ka -kwe -yaaga waa- 'su 'slado -an -bha. 'Yö- 'töng bhë -a 'ka 'yö din -va -yö -da 'sæ -næ -a -ta, ²⁶'kæ -Zlan yaa Eli bə -gæandhoo -nu 'wo 'dhö bhë -an mæ gbe 'piö -a 'ke yaa kë -gæandhe do 'yö -kë Saleta, Sidön -se 'ö 'se gbe 'ka bhë -a 'gü -a 'ka. ²⁷Go mü 'zü, 'ö -weemæ -nu -wo -kë -va Izlaelö -se 'gü 'töng 'ö -Zlan -wodhiölome Elize -yö -kaa' mü -a 'ka, 'ö -an mæ gbe -dhe yaa bo -a 'ke yaa kë Naama 'yö go Sili -dhe 'ö 'se gbe 'ka bhë -a 'gü -a 'ka.»

²⁸Me -nu 'wo -kë -bhöküëkö 'gü mü 'töüdhö bhë, 'wun -yö -na -an -zuë 'wun 'ö- -blæ bhë -a -wun 'gü. ²⁹Wo -luu 'wo- kun 'wo- -gboö gbö 'wo baa woë- pödhe 'ö -kë -tön 'kluë- bhë -a -bha, 'wo dhoë -tön gia- bhë -a tuö kö -waan -a -zuö goo 'gü. ³⁰'Kæ Yesu -yö -bə -an ziën 'yö dho.

Yesu -bha göön- 'ö -zuu yaa -yaa- 'tu bhö, -a -dhe bo -sü

(Maakö 1.21-28)

³¹Dhe -ya kë 'dhö, Yesu -yö dho Kapænaomë plöö, Galile -se 'gü, 'ö yö mæ -nu -daan' -sü -bha Zuifö -nu -bha -glooyi 'ka. ³²Ö -an 'te -yö -tun -a -bha mæ -daan' -kö bhë -a -wun 'gü, bhii 'ö tön -yö 'wun -blæ -wogbiindhe 'ka.

³³Göön- do 'ö -zuu yaa -yö -kë -a 'gü bhë, -yö -kë -bhöküëkö 'gü mü 'pö, 'ö yö 'we -sü 'gü 'gbee- 'ka -næ: ³⁴«'Aa! -Më -mü -i, Yesu 'go Nazalet? Ü -nu kö 'üën- yi 'gü -siö' -a? A- -döa' -næ, ü mæ 'slööslö 'ö -Zlan -ya bə -a 'ka!»

³⁵Ö Yesu -yö 'wun -blæ -zuu yaa bhë -a 'ka 'gbee- 'ka 'ö- pö -a -dhë: «Ü 'dhi yö 'kuë- 'ü 'go göön- 'ö -næ -a 'gü!»

'Yö -zuu yaa -yö göön- 'ö bhë -a -zuö sia- mæ 'plë wö 'dhiö mü 'ö go -a 'gü; yaa pë yaa gbe kë -a 'ka. ³⁶Ö mæ -nu 'wo -kë mü -an 'te -yö tun, 'ö 'wo- pö wo 'ko -nu -dhë: «'Wun -blæ' -wo -suu' -mlë 'ö -næ -æ? 'E, göön- 'ö -næ -yö 'wun -blæ -zuu yaa -nu 'ka -wogbiindhe waa- 'piigbeedhe 'ka, 'ö 'wo go mæ -nu 'gü 'dhö e?»

³⁷Ö Yesu 'tə -yö -pen 'pian 'ö 'dhö bhë -a -ta mæ 'plë 'dhi.

Yesu -yö 'yuamæ -nu -plëezë -dhe -bo

(Matiö 8.14-17; Maakö 1.29-34)

³⁸Yesu -yö -go -bhöküëkö 'gü mü 'ö dho Simö -gö köö. Simö -da -ta yaa kë 'po -sü 'ka, 'ö tön 'gii- -kö -yö -kë -a -bha 'gbee- 'ka; 'ö mæ -nu -wo -bheä

Yesu -dhë kö -yaan -a -dhe bo. ³⁹Ö Yesu -yö -yɔɔn -a -bha, 'yö 'wun -blee 'gbee- 'ka 'gii- bhë -a 'ka, 'ö go -a 'gü, 'ö to mü 'ö -luu 'ö yö -an -bhöpë -yuö kē -sü -bha -an -dhë.

⁴⁰Dhe lan- =ya -püö, 'ö 'wo nu me -nu 'ö 'yua =suu- 'oo =suu- -yö -an -kē -an 'ka Yesu 'piö; yö -an -dhe bo ö -kɔ -kpa -an -ta dhuö -sü 'ka. ⁴¹Ö -zuu yaa -nu -wo go me -nu =plëzë 'gü -gblaa 'gbla -sü 'ka =nɛ: «-Zlan Gbö -mü ü 'ka!» 'Kee Yesu -yö 'wun -blee -an 'ka, kö -kun 'wo dho 'wun gbe =blee-, bhii 'ö tɔɔ wo gia- -wa =dɔa' =nɛ -Zlan -bha -Yame -mü -a 'ka.

Yesu -yö -Zlan -wo -blee Zude -se 'gü
(Maakö 1.35-39)

⁴²Dhe 'ö- -dhe =ya 'po, Yesu -yö -go plöö 'yö dho ö -de 'sloo 'ka -dhe do 'bhaa -bha. 'Ö me -gbaa =va -wo yö -a =mɛɛ' -sü 'gü. =Dhe 'ö =waa- yö, 'wo-kuënnu kö -yaan 'to wo 'piö mü. ⁴³Kee Yesu -ya -pö -an -dhë: «A -dho 'wuntaɔsë 'ö -gban -Zlan -bha -gludëdhe -bha, -a =blee pödhe me -nu 'wo to -an 'gü; bhii pë 'ö -Zlan -yö n bɔ -a -wun 'gü bhë 'ö bhë.»

⁴⁴Yö -Zlan -wo =blee Zuifö -nu -bha -bhöküekɔ -nu 'gü Zude -se 'gü.

Yesu -bha -guë' -nu -bleezë 'sü -sü
(Matiö 4.18-22; Maakö 1.16-20)

5 ¹Yi do 'ka Yesu -yö -kë Zenezaletö 'yipuë 'kpong 'dhiö, 'ö me -gbaa =va -wo nu 'wo =nië -a -zü zian 'ple 'ka kö -waan wo 'to -to -Zlan -wo -bha. ²Dhe bhë -a 'gü 'yitagɔ =ple -wo -kë 'yi 'kpong 'dhiö kö me -nu 'wo 'yiblükëme -nu 'ka, =wa 'go -a 'gü =wa 'dho wo -bha 'kplö 'zlu -dhia. ³Ö Yesu -yö -da 'yitagɔ me 'ö -kë Simɔ -bha 'ka bhë -a 'gü, 'ö- pö -a -dhë -ya 'bhe 'tee =yɔɔn 'yi -ta; 'ö =yaannu -a 'gü 'ö yö -an -daan' -sü -bha.

⁴Dhe =ya yën 'wun =blee' -sü -bha, 'ö- pö Simɔ -dhë: «-Bhö =yɔɔn 'yitagɔ 'ka 'yi ziëndhe gia- -bha kö bhi 'dhö, ü 'bhame -nu 'dhö 'ka ka -bha 'kplö -zuö yiö 'kaan- 'yuö- 'sü!»

⁵Ö Simɔ -ya pö -a -dhë: «N -Gɔmɛ, yi 'yi -bliü -kë gbenggbeng, 'kee yiëë pë gbe yö. =Ao', -dhe -kë =ne bhi gia- 'ü- pö 'a- kë bhë kö a -dho -a kë ü -wo 'ka.»

⁶Dhe =ya kë 'dhö, 'wo 'kplö -zuö yiö, 'ö 'yuö- -yö -an -bha 'kplö pa, -dhe 'to -na zlöö kö -yö =kaan' -na. ⁷Ö 'wo =üü- -bliü wo 'bhame -nu 'wo -kë 'yitagɔ gbe 'gü bhë -an -gɔ kö -waan nu wo -dhë. 'Ö 'wo nu 'wo 'yitagɔ =ple bhë 'wo -an 'ple pa 'yuö- 'ka, -dhe 'to -na zlöö kö 'yitagɔ -nu 'wo bhë -wo 'dho -na 'yi -löö.

⁸Dhe 'ö Simɔ Pieɛ =ya pë -nu 'wo bhë -an yö, 'yö nu 'yö -lo ö kɔɔn 'gü Yesu 'dhiö, 'ö- pö -a -dhë: «N Dëme, -bhö =yɔɔn 'ma 'ü 'go n 'sɔɔ; ma 'a =ne 'wunyaakëme -mü n 'ka!»

⁹Pë 'ö -kë 'ö- pö 'dhö bhë 'ö tɔɔ 'suö -yö -da yö gia- waa- me -nu 'wo to -an 'gü 'yuö- =va 'wo- sü bhë -a -wun 'gü. ¹⁰-Kɔ do bhë -a 'ka 'ö -kaa' Simɔ

'bhamε -nu Zakö waa- Zan 'wo -kë Zebede gbö -nu 'ka bhë -an -gɔ 'pö. 'Kεε Yesu -ya -pö Simɔ -dhë: «Kö -kun 'ö 'suö -yö ü -kë! 'Go -dεε -bha zlöö a -dho ka kë 'kplö -zuö mε -nu -gɔ -mε 'ka kö 'ka nu -an 'ka n -dhia.»

¹¹-Dhe -kë 'dhö 'wo nu wo -bha 'yitagɔ 'ka 'yi 'kpong 'dhiö, 'ö 'wo pë 'plε to mü 'wo -ziö Yesu 'piö.

Yesu -yö -weeme do -dhe -bo
(Matiö 8.1-4; Maakö 1.40-45)

¹²Yesu -yö -kë pödhe do 'bhaa 'gü, 'ö mε do 'ö -wee -ya -kë bhë 'yö nu. -Dhe -ya Yesu yö, 'yö -gblü -a 'dhiö 'yö -bhea -a -dhë 'ö- pö: «N -Gɔmε, 'ö -ya kë -nε -yö ü -dhi -a -dhë -wun 'ka, -bhö n bun kë 'slööslö!»

¹³'Ö Yesu -yö ö -kɔ -po 'ö pa -a 'ka 'ö- pö -a -dhë: «A -we -a -bha, ü bun kë 'slööslö!»

-Dhe do bhë -a 'gü, 'ö -wee -yö go gɔɔn- 'ö bhë -a -bha. ¹⁴'Ö Yesu -ya pö -a -dhë: «'Wun 'ö -nε kö -kun 'ü- -blεε mε gbε -dhë, 'kεε -bhö 'dho 'ü ü -de -zɔn slabhome -dhë 'ü ü bun -kë 'slööslö -sü sla- bho -nε -kɔ 'ö Moizö -ya -blεε -a 'ka bhë -a 'dhö kö -yaan -a -zɔn mε 'plε -dhë -nε ü -dhe -ya bol!»

¹⁵'Ö Yesu 'tɔ -yö -pen -dhe 'saadhö 'gü; mε -gbaa -va -wo -kë -nu -a 'piö -dhia mü kö -waan wo 'to 'to -a -wo -bha, kö -yö mε 'bhaa -nu dha -na -an -bha 'yua -nu -gɔ. ¹⁶'Kεε Yesu -yö -go -an ziën mü, 'yö dho ö 'sloo 'ka -dhe -nu -bha kö -yaan -bhea'.

Yesu -yö 'tinngme do -dhe -bo
(Matiö 9.1-8; Maakö 2.1-12)

¹⁷Yi do 'ka Yesu -yö -kë mε -nu -daan' -dhia. -Dhe bhë -a -bha Falizi -mε -nu waa- tɔnggɔmε -nu 'wo go Galile waa- Zude -pö -nu 'gü 'iin Zeluzalemé plöö -wo -kë -yaannu -sü 'ka -a 'sɔɔ mü. Dëme -bha 'piigbeedhe -yö -kë Yesu 'gü, 'yö- -kë 'ö mε -nu -bha 'yua bo -a 'ka. ¹⁸Mε -nu -wo gɔɔn- do 'yö 'tinng -yua' -ya -kë -a bun 'nuu 'gü 'wo nuë; 'wo- kédhe -mεε kö 'waan- dhoë Yesu 'dhiö kɔɔ. ¹⁹'Kεε bɔdhe gbε yaa kë -dhö -an -gɔ mε gbung 'wo -kë 'kɔ 'dhiö bhë -a -wun 'gü. 'Yö 'wo -da -a 'ka 'kɔ tuö, 'wo -dhe 'dhi do bho 'wo- to ö -bha 'nuu 'gü, 'wo- -yɔɔ mε -nu gbung 'gü kɔɔ mü Yesu 'dhiö -dhe gia- -bha. ²⁰-Dhe 'ö Yesu -ya mε -nu 'wo bhë -an -bha -zo -yö ö -bha -sü yö, 'yö- pö 'yuame bhë -a -dhë: «N 'bhamε, 'ma ziö ü bha -sɔɔn yaa -nu -ta.»

²¹'Ö tɔnggɔmε -nu waa- Falizi -mε -nu -wo yö wo 'ko -dheε' 'kpɔ -sü -bha -nεε: «Dö -mü gɔɔn- -nε -a 'ka 'yö 'wun -blεε -Zlan -gɔ -nëdhö e? Dö dho -mɔ -a -bha kö -yaan ziö mε -nu -bha -sɔɔn yaa -nu -ta -a 'ke yaa kë -Zlan dosen 'kpaan 'ka ε?»

²²'Kεε -zotadhe 'yö -kë -an 'gü bhë, Yesu -ya -dɔ; -dhe -kë 'dhö, 'ö- pö -an -dhë: «-Më -kë 'ö -zotadhe -suu' -nu 'wo -nε 'wo -kë ka 'gü i? ²³-A pö -sü 'ma ziö ü -bha -sɔɔn yaa -nu -ta' 'iin -bhö -luu' -ü 'ta 'sü' bhë -a -mlë 'ö

'pëpë -ε? ²⁴'Kee a- 'piö kö 'ka- dɔa -ne -kɔ -mɔ 'wuën- -sü -yö ma 'a Mɛgbö 'ka n -gɔ 'kpongtaa zö kö 'aan- zïö mɛ -nu -bha -sɔɔn yaa -nu -ta.»

=Dhe =ya kē 'dhö, 'ö- pö 'tinngme bhē -a -dhē: «A- pö ü -dhē, -bhö -luu- 'ü ü bha 'nuu 'sü 'ü 'dho ü -gɔ kɔɔ!»

²⁵-Dhe do bhē -a 'gü, gɔɔn- 'ö bhē 'yö -luu 'ö dɔ ö -gean mɛ 'kpekpe wö 'dhiö mü, 'yö ö bha 'nuu sü 'yö dhoë ö -gɔ kɔɔ 'tan -bho -Zlan 'tɔ 'piö -sü 'ka. ²⁶-An 'te -yö -tun, 'wo yö -Zlan 'tɔ 'saa -blü -sü -bha, 'kee 'suö -yö -da -an 'gü 'wo- pö: «'Yië pē 'gblüünzē yö -dɛɛ!»

Yesu -yö Levi -dhɔɔ -kē
(Matiö 9.9-13; Maakö 2.13-17)

²⁷-Dhe =ya kē 'dhö, Yesu -yö -go pödhe bhē -a 'gü; -a -bha 'dho -sü 'ka, -yö 'nii- sɔɔnng' 'kun -mɛ do 'wo- dhe Levi -a -yö kö -yö -ya -sü 'ka 'nii- sɔɔnng' -kun -a 'gü -kɔ 'gü. 'Ö Yesu -ya pö -a -dhē: «-Bhö -luu- 'ü zïö n 'piö!»

²⁸'Yö Levi -yö -luu, 'yö pē 'ple to sia-, 'yö -ziö -a 'piö.

²⁹-Dhe =ya kē 'dhö, 'ö Levi -yö Yesu -bhlē -kē ö -gɔ kɔɔ. 'Nii- sɔɔnng' 'kun -mɛ -dhe =va -dhe waa- mɛ 'waa gbe -nu, -wo -kē -an 'piö pē -bhö -dhia mü. ³⁰Mɛ -nu 'wo -kē Falizi -mɛ -nu 'ka waa -tɔnggɔmɛ -nu -wo 'wun -bleɛ -wo -löö wo 'ko -dhē, 'ö 'wo- pö Yesu -bha -guë' -nu -dhē: «-Mē -kē 'ö 'ka pē -bhö, 'ka müpē mü 'nii- sɔɔnng' 'kun -mɛ -nu waa- 'wunyaakēmɛ -nu -an 'piö e?»

³¹'Ö Yesu -ya -daa -kē -an -gɔ 'ö- pö: «Mɛ -nu 'ö 'yua 'yaa -an -bha bhē, -an -bha -wun 'yaa -dhɔngtrɔ -bha, 'kɛɛ mɛ -nu 'ö 'yua 'dho -an -bha -ne 'wo -dhɔngtrɔ -mɛɛ. ³²N 'ka nu mɛ -nu 'wo kpengdhö -an 'piö, 'kɛɛ mɛ -nu 'waa kpengdhö -ne 'a nu -an 'piö kö -waan wo -zuö' -dhië' -Zlan 'piö.»

Yesu -yö 'wun 'ö -gban -ben 'to -sü -bha -a -wun -bleɛ
(Matiö 9.14-17; Maakö 2.18-22)

³³Yi do 'ka, mɛ -nu -wa -pö Yesu -dhē 'zü: «-Ya kē Zan -bha -guë' -nu -wo wo -ben -to, 'ö =ya kē 'wo -bheɛ. -Kɔ do bhē -a 'ka, 'ö Falizi -mɛ -nu -bha -guë' -nu -wa -kaa'; 'kɛɛ ü bha -guë' -nu 'waa wo -ben 'to.»

³⁴'Ö Yesu -ya -daa -kē -an -gɔ 'ö- pö: «Ka -dho -mɔɔ kö mɛ -nu 'wo -an -dhɔɔ kē -na dhe 'sü 'wlaan- -ta bhē 'kaan- pö -an -dhē kö -kun 'ö 'wo pē -bhö, 'kɛɛ kö dhe -gɔɔn -yö -an 'piö a? -Yö -dho kē ka -de 'gü 'dhö! ³⁵'Kee -abi', yi 'ö dhe -gɔɔn dho go -a 'ka -an 'piö =ya -lo, 'ö 'wo dho wo -ben to.»

³⁶'Ö Yesu -yö 'wun -bleɛ -an -dhē 'zü 'wun =zuan' 'ka 'ö- pö: «Mɛ gbe yaa 'dho -mɔɔ kö -yaan sɔ -dëü 'klu 'kan -yaan yö sɔ zii 'blédhe -bha -yaan -a -wɔ. =Ya kē 'dhö kö =ya sɔ -dëü -siö'; 'go mü sɔ -dëü waa- -a zii waa dhi wo 'kuë-. ³⁷Iin 'zü mɛ gbe 'ka 'dho yɔ 'gbee- yö =puu' 'wɔɔnwɔɔn 'gü -yaan -a 'dhi -ta. =Ya kē 'dhö yɔ -dho =puu' 'ö 'dhö bhē -a wü 'ö 'daawo 'ö -an 'ple 'gü- siö. ³⁸'Kee -abi'! -Ka yɔ 'gbee- yö =puu' -dëü 'gü! ³⁹'Ö mɛ gbe 'yaa -dho kē

yo 'slëenslën 'ka kö -ya 'go yo 'gbee- mü -dhia, bhii -wa pö: «Yo 'gbee- -ne 'ö -së!» »

Yesu -yö 'wun 'ö -gban -glooyi -bha -a -blee

(*Matiö 12.1-8; Maakö 2.23-28*)

6 ¹=Glooyi do 'ka Yesu waa- ö -bha -guë' -nu -wo -kë bɔ -dhia 'blee- 'wo -bluu'- kë -na -a 'ka -a -bhlö -nu 'gü. 'Ö- -bha -guë' -nu -wo -bluu'- -kpa 'bhaa -nu bho 'wo- -sii si wo kwëe 'ö 'wo- ga -nu -bhö. ²Falizi -me 'bhaa -nu -wo -kë mü, 'wo- pö -an -dhë: «-Më -kë 'ö pë kwaa- tɔng -ya pö kö -kun 'kwa- -kë -glooyi 'ka 'ö 'ka- -kë -ε?»

³Ö Yesu -ya -daa -kë -an -gɔ 'ö- pö: «Pë 'ö -bëen' -sü 'ka -Zlan -bha 'sëedhe 'gü -nëe, yi do 'ka Davidö waa- ö bha me -nu din -yö -an -kun bhë kaa- pö =a?»

⁴Ya -pö yi bhë -a 'ka -yö -dho 'yö -da -Zlan -gɔ ɔɔ, 'yö -bluu'- 'wo- -ya -Zlan -bha 'ka bhë 'ö slabhome -va -ya nu -a -dhë 'yö- -bhö 'yö- 'bhaa nu ö bha me -nu -dhë, 'këe kö kwa -bha tɔng -ya -pö sla- -bho -Zlan -dhë -me -nu -de 'sloo -në 'wo dho -bluu'- bhë -a -bhö. =Ya kë 'dhö kö pë ma -guë' -nu -wa -kë bhë, 'yaa 'wun yaa =va 'kpaan 'ka.»

⁵Ö Yesu -ya pö 'zü -nëe: «Ma Mëgbö, 'a tɔɔ =glooyi -de gia- bhë -a -gɔmë.»

Më -gbiö -yö ga -a -bha

(*Matiö 12.9-14; Maakö 3.1-6*)

⁶=Glooyi do 'bhaa 'ka Yesu -yö -da Zuifö -nu -bha -bhökuëkɔ do 'gü, 'ö yö -an -daan' -sü -bha. Gɔɔn- do -yö -kë mü, 'ö- -kwëe- 'gü -gbiö -yö ga -a -bha. ⁷Tɔnggɔmë -nu waa- Falizi -më -nu 'yan -yö -kë Yesu -bha, kë -në -yö -dho më -dhe bo -glooyi 'ka kö -waan -a dɔ, bhii pë 'wo -kë -a -mëe' -dhia 'ö tɔɔ 'wun 'wo dho -a dɔ -a -bha -në =ya 'wun yaa kë. ⁸=Dhe -kë -në Yesu -yö -an -bha -zotadhe -dɔ bhë, 'yö- pö më 'yö- -gbiö -yö ga -a -bha bhë -a -dhë: «-Bhö -luu'- 'ü dɔ ü -gean më 'plë 'dhiö zö!»

Më 'ö bhë 'yö -luu 'yö dɔ ö -gean mü. ⁹=Dhe -ya kë 'dhö, 'ö Yesu -ya pö -an -dhë: «A -dho ka -dhe' kɔɔ: -Më 'ö kwa -bha tɔng -ya pö 'kwa- kë -ε? -Wo 'wun -së kë -glooyi 'ka i 'iin -wo 'wun yaa kë e? -Wo më dha -i 'iin -wo më 'gü -siö'- e?»

¹⁰=Dhe 'yö -an 'plë -ta -ga, 'yö- pö më 'ö bhë -a -dhë: «-Bhö ü -gbiö 'po!»

'Yö ö -gbiö -po 'ö- -gbiö -yö to mü 'ö bo. ¹¹Ö 'wun -yö -na me -nu 'wo -kë mü -an -zuë 'sönggö -sönggö, 'wo yö pë 'wo dho -a kë Yesu 'ka -a -blee' -sü -bha wo 'ko -nu -dhë.

Yesu -bha ö bha bɔme -nu 'gɔɔ- do ö ga -ple 'sü -sü

(*Matiö 10.1-4; Maakö 3.13-19*)

¹²Töng 'ö 'dhö bhë -a 'ka, Yesu -yö -dho -tɔn tuö kö -yaan -bheä'-; 'ö gbeng -yi do sü 'ö -bheä -a 'ka -Zlan -dhë. ¹³=Dhe 'ö- -dhe -ya 'po, 'yö ö

bha =guè' -nu =dhɔɔ -kè, 'yö -an 'gɔɔ- do ö ga =ple sü -an 'gü; 'yö -an 'tɔ kpɔ bɔmɛ -nu 'ka. ¹⁴Mɛ 'wo 'dhö bhè -an 'tɔ 'ö -nɛ: Simɔ 'yö- 'tɔ kpɔ Piɛɛ 'ka waa- ö dheglu Andre, Zakö, Zan, Filipö, Baatelemi, ¹⁵Matiö, Toma, Zakö Alefe gbö, Simɔ 'wo- 'tɔ kpɔ 'yënngsiömɛ 'ka ö -bha 'sɛgɔ -wun 'gü. ¹⁶Zakö gbö Zudè waa- Zuda Ikalitö 'yö dho zlöö 'yö -kè Yesu 'dhɔɔdɔmɛ 'ka.

Yesu -bha mɛ -nu -daan' -sü waa- -a -bha 'yuame =plëzè -dhe bo -sü
(Matiö 4.23-25)

¹⁷Yesu waa- mɛ -nu 'wo bhè -wo -go -tɔn tuö 'wo dho 'wo =gbaannu -dhe 'kpekpe -dhe do -bha. -A -bha =guè' -nu -gbaa =va -wo -kè mü. 'Go mü 'zü 'ö mɛ -gbaa =va 'wo go Zude -sɛ -nu, Zeluzalemè plöö -dhe -nu 'iin pödhe -nu 'wo -an -zütodhe -nu 'gü -nu, Tii -dhe waa- Sidɔn -dhe -nu 'wo 'yoo 'kpong 'dhiö, ¹⁸-wo -nu -a 'piö mü kö 'waan- wo 'to 'to -a -wo -bha, 'iin kö -yö -an -bha 'yua -nu bho -an 'gü. 'Ö mɛ -nu 'ö -zuu yaa =ya -an 'tu bɔ bhè 'yö -an -dhe bo 'pö. ¹⁹Mɛ 'plɛ -wa kédhe -mɛɛ kö 'waan- pa -a 'ka, bhii 'ö tɔɔ =ya kè 'dhö 'piigbedhe -yö -go -a 'gü, 'yö -an 'plɛ -dhe bo.

Yesu -yö mɛ -daan -tɔn do tuö
(Matiö 5.1-12)

²⁰-Dhe Yesu =ya ö bha =guè' -nu -ga, 'ö- pö -an -dhè: «=Zuögludhi -yö kè mɛ -nu 'ka 'yenazè ka -gɔ, bhii 'ö tɔɔ -Zlan -bha -gludédhe -yö -dho kè ka -bha 'ka.

²¹=Zuögludhi -yö kè mɛ -nu 'ö din 'dho ka kè -na bhè ka -gɔ, bhii 'ö tɔɔ -bhöpè -nu -dho kè ka -gɔ =va.

=Zuögludhi -yö kè mɛ -nu 'ka 'gbo bɔ -na bhè ka -gɔ, bhii 'ö tɔɔ ka -dho 'yee to 'dhiö =zian'.

²²=Zuögludhi -yö kè ka -gɔ, 'kö -kè -nɛ mɛ -nu -wo -ya ka -san 'ka, 'ö 'wo -kan ka -bha, 'iin 'wo 'si -nu bho ka -gɔ, 'ö 'wo ka bho yunng, ma 'a Mɛgbö 'ka n 'tɔ -wun 'gü 'dhee!

²³-Ka =zuögludhi kè yi 'ö pè -nu 'wo bhè 'wo dho kaa ka 'ka -a 'ka; -ka -lö =zuögludhi 'ka, bhii 'ö tɔɔ ka 'kian =va -yö -ya -sü 'ka ka -gɔ dhang- 'gü. -Kɔ do 'ö bhè -a 'ka, 'ö -an 'bhema -nu -wa =kaa' -Zlan -wodhiölomɛ -nu 'ka 'pö 'dhiö -be.

²⁴'Kɛɛ 'yena -wun -yö -dho kè =bhɔɔmɛ -nu 'ka, bhii 'ö tɔɔ 'ka ka -bha 'wun -sè -nu 'plɛ yö 'saadhö.

²⁵'Yena -wun -dho kè pëyagɔmɛ -nu 'ka, bhii 'ö tɔɔ din -yö -dho ka kè! 'Yena -wun -yö -dho kè mɛ -nu 'ka 'yee 'to -na ka 'ka, bhii 'ö tɔɔ ka -dho kè =zuö' 'klobhodhe waa- 'gbo bɔ -sü -an 'gü!

²⁶'Yena -wun -yö -dho kè mɛ -nu 'ö mɛ 'plɛ 'dho 'wun -sè =blɛɛ' -na ka -gɔ bhè ka 'ka, bhii 'ö tɔɔ -kɔ do 'ö bhè -a 'ka 'ö -an 'bhema -nu -wa =kaa' -Zlan -wodhiölomɛ =suazè -nu -gɔ!

(Matiö 5.38-48; 7.12a)

²⁷'Kɛɛ mɛ -nu 'ka ka 'to 'to -na n -ma =nɛ, a- -pö ka -dhè: -Ka ka yaagüme -nu -dho kè, 'ka 'wun -sè kè mɛ -nu 'wo ka -san zè -na bhè -an -dhè. ²⁸-Ka

'dhuë- 'kpɔ mə -nu 'wo 'wun 'kpöü -ya -na ka -bha bhë -an -bha, 'ka -bhea'- mə -nu 'wo 'wun 'gbee- wɔ -na ka -ta bhë -an -wun 'gü. ²⁹Ya kë -nɛ mə -ya ü 'to -ma, -bhö -a kë -plɛ -naa -zɔn -a -dhë, 'iin mə -ya ü bha gblang 'sü, -bhö ü -kwaä' -a -zü -yö ü bha -dasɔ 'sü 'pö. ³⁰Mɛ -ya pë -dhe ü -gɔ, -bhö -a nu -a -dhë, 'ö -ya kë -nɛ mə -ya pë 'sü ü -gɔ, kö -kun 'ü- -dhe -a -gɔ gbɔ. ³¹Pë 'ka- 'piö kö mə -ya kë ka -dhë bhë, -kaa kë 'pö -an -dhë.

³²Ya kë -nɛ 'ka- -dho kë mə 'ö ka -dho -kë -a 'ka, -a -truën -dho kë ka -gɔ -më 'ka ɛ? 'Kɛɛ kö 'wunyaakëmə -nu -wa -dho -kë mə -nu 'wo -an -dho -kë -an 'ka -nɛ -kɔ do bhë -a 'dhö 'pö. ³³'Ö -ya kë -nɛ 'ka 'wun -së kë mə 'ö 'wun -së -kë ka -dhë -a -dhë, -a -truën -dho kë ka -gɔ -më 'ka ɛ? 'Kɛɛ kö 'wunyaakëmə -nu -wa -kë -nɛ -kɔ do bhë -a 'dhö! ³⁴'Ö -ya kë -nɛ 'ka 'pë do mə 'ka- -dɔä' -nɛ, -yö -dho ka -bha 'pë bho -a -bha, -a -truën -dho kë ka -gɔ -më 'ka ɛ? 'Wunyaakëmə -nu -wo 'pë -dɔ wo 'ko -nu -bha. -Yö -kë 'dhö kö 'pë -nu 'wo- dɔ wo 'ko -nu -bha bhë, -waan -a -yɛ 'zü kë wo 'ko -nu -dhë! ³⁵'Abi! 'Ka -bha 'ka, -kaa -dho kë ka yaagüme -nu 'ka, 'ka 'wunsë kë -an -dhë. 'Go mü 'ka pë -nu nu -an -dhë, kö -kun 'ka ka -zo -kë -a -yɛ 'zü 'piö. -Ya kë 'dhö ka -dho ka 'kian -va yö, 'ö 'ka dho kë -Zlan 'ö -ziö pë 'plɛ -ta bhë -a -bha 'në -nu 'ka, bhii -a këwun -yö -së mə -nu 'waa mə -ya 'ti kë waa- 'gluyaame -nu -an 'ka. ³⁶'Ka 'pö, -ka pa mə -nu 'yena yö -sü 'ka -nɛ -kɔ 'ö ka Dë -Zlan 'dho pa -sü 'ka mə -nu 'yena yö -sü 'ka bhë -a 'dhö!

(Matiö 7.1-5)

³⁷Kö -kun 'ka za dɔ mə gbe -bha, -yö -kë 'dhö kö -kun 'ö -Zlan -dho za dɔ ka -bha. Kö -kun 'ka za -lo mə gbe tuö, -yö -kë 'dhö kö -kun 'ö -Zlan dho za -lo ka tuö. -Ka ziö mə -nu -bha 'wun -zaa' -sü -nu -ta, -ya kë 'dhö, -Zlan dho ziö ka -bha 'wun -zaa' -sü -nu -ta 'pö. ³⁸-Ka pë nu mə -nu -dhë, -ya kë 'dhö -Zlan -yö -dho pë nu ka -dhë 'pö; -yö -dho pë dan papasü 'ö- -lo ka -bha gblang 'yuö- 'gü, bhii 'ö tɔɔ -yö -dho ö bha gbaɔ dan 'yö- nu ka -dhë -nɛ -kɔ 'ka- nuë ka 'ko -nu -dhë bhë -a 'dhö.»

³⁹'Ö Yesu -yö 'wun -zuan' do -zɔn -an -dhë 'zü 'ö- pö: «-Ya kë -nɛ 'yënnngtiime -nu -wa 'dhiö -sü wo 'ko 'ka, -dhe 'wo- -bha -plɛ wo 'ka 'dho -püö -glu 'kpa 'dhi do 'gü a? ⁴⁰-Guë' gbe 'yaa -va yaa zië ö -gɔmə -ta, 'kɛɛ -guë' mə 'ö -ya pë dɔ -duö -së 'ka, -yö -dho kë -nɛ ö -gɔmə 'dhö.

⁴¹-Më 'yö- -kë 'ö -blëë' 'yö ü dheglu 'yënnngdhö bhë 'ü- -ga, 'kɛɛ kö ü -bha 'lü -gba -yö ü 'yënnngdhö -e? ⁴²Ü -dho -a pö -kɔklë ü dheglu -dhë: «N dheglu, dɔ! 'A -blëë' bho ü 'yënnngdhö», kö bhi -de 'pö ü -bha 'lü -gba -yö ü 'yënnngdhö -e? Mɛ 'yan -ta -wun kë -mɛ, -bhö ü -bha 'lü -gba 'yö ü 'yënnngdhö bhë -a bho mü -kun kö 'ü -dhe yö -së 'ka 'üën- -tun ü dheglu -bha -blëë' bho -a 'yënnngdhö -süë.

(Matiö 7.16-20; 12.33-35)

⁴³'Lü -së 'yaa bha ö bhe yaa 'ka 'iin 'lü yaa -de 'pö 'yaa bha ö bhe -së 'ka. ⁴⁴'Lü 'ö -dhö -wa -dɔ ö bhe -bha. 'Waa figö bhe bho 'ginng -kpɔɔ 'gü 'iin

'waa lezen -kpa bho dankpɔɔ 'gü. 45-Kɔ do bhë -a 'ka 'ö me këwunsëëzë -yö ö -bha pë -së sü ö =zuö' 'gü, 'ö me këwunyaazë -de 'pö 'yö ö bha 'wun yaa sü ö =zuö' 'gü, bhii 'wun 'yö me =zuö' pa, ö 'dhi -ya -bleë.»

'Wun 'ö -gban 'kɔ -ple -bha

(Matiö 7.24-27)

46'Ö- pö: «-Më 'ö -kë 'ka n -dhe ka Dëmë, 'ö pë 'a- pö ka -dhë 'kaa- kë =ε? 47A -dho me 'yö n -wo ma 'yö- kun -së 'ka, -a -bhɔa -zɔn ka -dhë: 48-Yö -bhɔ me 'ö dho ö bha 'kɔ dɔ =dhia, 'yö 'se pɔn =gbiin, 'yö dho 'ö yöë -guö -bha -a zü -luu'- -sü 'ka -a -bha. 'Kö -kë -ne 'yiga -nu -wo -pa, 'wo -ma 'kɔ 'dhö bhë -a -bha, -dɔ gɛnngdhö -sü -ya -gɔ, bhii 'ö tɔɔ 'kɔ bhë -yö -dɔ -së 'ka. 49'Këe me 'yö ö 'to to n -wo -bha 'ö yaa- 'kun, -yö -bhɔ me 'ö dho ö bha 'kɔ dɔ =dhia, 'yö- zü -gban 'se -ta dhuö -dhe gia- -bha 'ö 'yaa 'seidhö -a -bha. =Dhe 'ö 'yiga -nu =wa pa, 'ö 'yi -nu -wo -ma -a -bha 'ö to mü 'ö -lo; 'yö-ple -yö =wüü 'töüdhö.»

Yesu -yö Wlɔmë 'dhasi -gɔme -bha yuökëme -dhe -bo

(Matiö 8.5-13)

7 1=Dhe Yesu =ya yën 'wun 'ö bhë -a =bleë' -sü -bha 'següme -nu -dhë, 'yö dho Kapɛnaɔmë. 2=Dhe bhë -a -bha, Wlɔmë 'dhasi -gɔme do -yö -kë mü, 'yö- -bha yuökëme do -wungbeezë -yö -kë -a -gɔ. Yuökëme 'ö bhë 'yua -yö -kë -a kë =dhia, 'ö- -wun 'gü =ya 'to 'tee kö -yaan ga. 3=Dhe 'ö 'dhasi -gɔme 'ö bhë =ya Yesu 'tɔ ma, 'yö Zuifö -nu -bha me zii 'bhaa -nu bɔ kö -waan pö Yesu -dhë -yö nu -yaan ö bha yuökëme bhë -a -dhe bo. 4'Wo dho 'wo -lo Yesu 'piö, 'wo yö -bhea -a -dhë -sü -bha =naazë 'ka, 'wo- pö -a -dhë: «Gɔɔn- 'ö bhë, -nu -a -dhë -sü -ya -ma -kun, 5'ö tɔɔ yië- 'següme -nu -dho -ya -kë, 'go mü 'zü yö =ne 'yö yië- -bhɔküëkɔ dɔ.»

6=Dhe =ya kë 'dhö, Yesu -yö -ziö -an 'piö. =Dhe 'ö =wa yö 'kɔ 'ka -klöö', 'ö 'dhasi -gɔme bhë 'yö ö 'bhame -nu bɔ kö -waan pö -a -dhë ö -wo 'ka =neë: «N -Gɔme, kö =kun 'ü ü -de =sëë' bho 'kpaan, 'ö tɔɔ yaa n -ma 'kun kö 'üën- -da n -gɔ kɔɔ. 7-A -wun 'gü =ne 'a n -de yö =ne yaa n -ma 'kun kö 'a nu ü 'dhiö, 'këe -bhö ü -wo 'kpaan pö, =ya kë 'dhö ma yuökëme -dho dha. 8Ma -de gia- n =kɔɔnme -nu -wo -dhö, 'ö go mü ma 'dhasi -nu 'a -an =kɔɔn 'wo -dhö. 'Ö 'ma- pö -a me do -dhë: «-Bhö 'dho!» 'ö dho n -wo 'ka; 'ö 'ma- pö -a me do 'bhaa -dhë 'zü: «-Bhö nu!» 'ö nu n -wo 'ka; 'ö 'ma- pö yuökëme -dhë: «Pë 'ö =ne, -bhö -a kë!» 'ö- -kë n -wo 'ka.»

9=Dhe 'ö Yesu =yaa- -wo 'ö =ne -a ma, 'yö 'dhasi -gɔme -wun -ya 'te tun, 'ö =dhië me -gbaa -nu 'wo -ziö -a 'piö bhë -an 'piö =zian, 'yö- pö -an -dhë: «A- pö ka -dhë n 'ka -zo yö n -ma -sü 'ö =suu'- 'dhö =ne -a yö do, -abi', -a me gbe 'yaa 'dhö Izlaelö -se -de 'ö =ne -a 'gü!»

10=Dhe =ya kë 'dhö, bɔme -nu -wo -ye wo 'zü 'wo dho 'dhasi -gɔme bhë -a -gɔ kɔɔ, 'ö 'wo yuökëme 'ö =sia 'wo- yö kö -a -bha 'yua =ya bo.

Yesu -yö =geandhe do -bha 'në -bho ga 'gü

¹¹-Dhe =ya kë 'dhö, Yesu -yö -dho pödhe do 'wo- -dhe Nainë bhë -a 'gü. -A -bha -guë' -nu waa- me -gbaa =va -wo -ziö -a 'piö. ¹²-Dhe 'wo =yɔɔn -na -da plöö -dhe 'sɔɔ kö me -nu -wo 'dho -na me do 'ö ga bhë -a -bin -dhia. Gɔɔn- 'ö bhë -yö -kë dhe 'ö =geandhe 'ka -a -bha 'në dosen 'kpaan 'yö- -gɔ -a 'ka. Me -gbaa =va 'wo go pödhe 'ö bhë -a 'gü, -wo -kë dhe bɔ 'ö bhë -a 'piö mü. ¹³-Dhe 'ö dhe bɔ 'ö bhë Dëme =yaa- yö, 'ö- 'yena -ya -kë 'ö- pö -a -dhë: «Kö -kun 'ü 'gbo bɔ gbo!»

¹⁴-Dhe =ya kë 'dhö, 'ö Yesu -yö =yɔɔn =glöö -bun -a 'gü -pë bhë -a -bha 'yö pa -a 'ka 'ö me =glöö bun -me -nu 'wo bhë 'wo =gbaannu, 'ö Yesu -ya pö: «Në gɔɔn- 'ü =ne, a- -pö ü -dhë, -bhö =luu'!»

¹⁵'Ö me 'ö ga bhë 'yö =luu 'ö -ya ö -gean 'ö yö 'wun =blee' -sü -bha, 'ö Yesu -ya nu ö dhe -dhë.

¹⁶'Suö -yö -da me -nu 'wo -kë mü -an 'ple 'gü, 'ö 'wo yö -Zlan 'tɔ 'saa -blü -sü -bha 'wo- pö: «Zlan =ya ö -wodhiölome do =va bɔ kwa -dhë!» 'Go mü 'wo- pö 'zü: «Zlan =ya nu -dɔ ö bha 'següme -nu -gban -gɔ =dhia!»

¹⁷'Ö 'wun 'ö Yesu -ya -kë bhë 'ö -pen Zude -se waa- -a -zütodhe -nu 'saadhö 'gü.

Zan Batisö -bha bɔme -nu (Matiö 11.2-19)

¹⁸Zan Batisö -bha =guë' -nu -wo -nu, 'ö 'wun -nu bhë 'wo- 'ple =blee -a -dhë. 'Ö Zan -yö -an me =ple =dhɔɔ -kë, ¹⁹'yö -an bɔ Dëme 'piö kö -waan -a -dhe' 'kpɔ =ne: «Ü me 'yi- dɔa =ne -yö -dho nu bhë -a 'ka i, 'iin 'yi -ya me gbe -gɔ e?» ²⁰-Dhe 'ö =wa 'dho =wa -lo Yesu 'piö, 'ö 'wo- pö -a -dhë: «Zan Batisö 'ö yi bɔ kö 'yiën- ü -dhe' 'kpɔ =ne ü me 'yi -ya -a -bha nu -sü -gɔ bhë -a 'ka i, 'iin yi -dho -ya me gbe -gɔ e?»

²¹-Dhe do bhë -a 'gü, 'ö Yesu -yö yö 'yuame =plëézë waa- 'tɔsiöme -nu -an -dhe bo -sü -bha, kö -yö -zuu yaa bho -na me -nu 'gü, kö -yö 'yëngtiime -nu =plëézë 'yan 'po -na. ²²-Dhe -kë 'dhö 'ö Yesu -ya pö Zan -bha bɔme -nu -dhë: «-Ka 'dho, pë 'ka- yö 'iin 'ka- ma =ne 'ka- =blee Zan -dhë =ne: 'Yëngtiime -nu -wo -dhe yö -na, -gentɔsiöme -nu -wo 'ta -na, =weeme -nu -bha =wee -yö 'go -na -an -bha, 'totame -nu -wo 'wun ma -na, game -nu -wo 'go -na ga 'gü, 'wuntaɔsë -yö =blee' -na 'yename -nu -dhë. ²³=Ao! -Zuögludhi -yö kë me 'ö yaa 'dho go -zo -yö n -ma -sü 'gü -a -gɔ!»

²⁴-Dhe 'ö Zan -bha bɔme -nu =wa 'ye wo 'zü =wa 'dho, 'ö 'wun 'ö -gban Zan -bha, 'ö Yesu -yö yö -a -blee me gbung 'wo bhë -an -dhë -sü -bha 'ö- pö: «'Yëngtaadhe 'ö Zan -yö -kë -a -bha bhë, 'dho 'ö 'ka- wo -a -bha bhë, -më 'ö 'ka dho -a -ga =dhia 'ma e? 'Lü 'në 'ö 'tëë 'dho -a =tuun' -na bhë 'ö 'ka dho -a -ga =dhia =a? ²⁵'Yaa 'dhö, -më 'ka dho -a -ga =dhia =e? Gɔɔn- do 'ö sɔ -së 'dho -a -bha yö -mü -a? 'Kee =dhe 'a -ga -a 'gü bhë, -yö -kë =ne me -nu 'ö

sɔ -sɔnnŋ' 'gbeezë 'dho -an -bha bhë, -an kédhe 'ò tɔɔ -dhe -së -dhe 'gü, -wo -kë -gludë -nu -bha wɔ -a 'gü -kɔ 'gü. ²⁶Dhe 'ò 'dhö -nɛ, -më 'ka dho -a -ga -dhia 'sa? -Zlan -wodhiölomɛ do -mü -a? A- pò ka -dhë 'wun gia- 'ka -nɛɛ: -li-, 'ò -de, mɛ 'ka- yò bhë, -yò -ziö -Zlan -wodhiölomɛ -ta, ²⁷bhii Zan 'ò bhë pë 'ò -bɛɛn' -sü 'ka -Zlan -bha 'sëédhe 'gü 'ò -gban -a -bha -ya -pò: -Zlan -ya -pò: 'Ma ma bɔmɛ do bɔ ü 'dhiö, kö -yaan ü bha zian -gblooga -pë kë. »

²⁸'Ö Yesu -ya pò -an -dhë 'zü -nɛɛ: «A- pò ka -dhë: Mɛ 'ö- 'tɔ dho kë =va -yaan -zië' Zan -ta 'yaa 'dhö, 'kɛɛ kë- wo 'dhö bhë, mɛ 'ò 'gügaazë -Zlan -bha -gludëdhe 'gü, -yö =va 'yö -zië' -a -ta.»

²⁹'Segümɛ -nu waa- 'nii- -sɔnnŋ' 'kun -mɛ -nu -wo -nu, 'ò 'wo wo 'to to -a -wo -bha; 'ò 'wo- dɔa -nɛ -Zlan 'ò bhë -yö kpengdhö, 'ò 'wo nu Zan 'piö, 'yö -an -go -sɔɔn yaa 'gü -bɔyiödhe -kë. ³⁰'Kɛɛ Falizi -mɛ -nu waa- Züfö -nu -bha tɔnggɔmɛ -nu waa 'we -a -bha kö Zan -yaan wo bɔ yiö. -A -kë 'dhö -sü 'ka, pë 'ò -Zlan dho -a kë -an -dhë -be bhë, -wa -bhɔ wo -dhë =taa'.

³¹'Ö Yesu -ya pò -an -dhë: «=Dhe 'ò 'dhö -nɛ, a -dho mɛ -nu 'wo -dɛɛ -yi -nɛ -a 'gü, -an -zɔn dö 'ka ɛ? -Wo -bhɔ dö -bha -ɛ? ³²-Wo -bhɔ 'në -nu 'wo -ya -sü 'ka pö- 'dhëë ziën 'wo 'we -na wo 'ko -nu 'piö -an -bha: <'Ö 'yië 'truu 'piö kö 'kaan- 'tan kë -a -bha 'ò 'kaa 'tan kë! 'Ö 'yië gaa- 'tan bho kö 'kaan- 'gbo bɔ 'ò 'kaa 'gbo bɔ =nɛ!> ³³-A -gen 'ò tɔɔ: Zan Batisö -yö -nu, 'ò 'yaa -bhöpë 'waa gbɛ -bhö, 'iin 'yaa -drɔɔn mü, 'ò 'ka- pö =nɛɛ: <-Zuu yaa -ya 'gü!> ³⁴'Ö ma 'a Mɛgbö 'ka, 'a nu 'a pë -bhö 'ò 'a -drɔɔn mü 'ò 'ka- pö: <Gɔɔn- 'ò -nɛ -yö 'nii- -sɔnnŋ' 'kun -mɛ -nu waa- 'wunyaakëmɛ -nu -an 'bhamɛ 'ka; yö do bhë -yö -siözë!> ³⁵'Kɛɛ -Zlan -bha 'kpaakpadhe bhë mɛ -nu 'ò =waa- -dhe 'wun gia- -wa dɔ -nɛ -yö kpengdhö.»

Yesu -yö -dho Simɔ 'ò -kë Falizi -mɛ 'ka bhë -a -gɔ kɔɔ

³⁶Falizi -mɛ do -yö Yesu -dhɔɔ -kë yi do 'ka kö 'waan- pë -bhö wo 'ko -bhaa, 'ò Yesu -yö dho gɔɔn- 'ò bhë -a -gɔ kɔɔ kö 'waan- pë -bhö. ³⁷Pödhe 'ò bhë -a 'gü -sɔɔnkédhe do -yö -kë mü. =Dhe 'ò =yaa- ma -nɛ Yesu -yö pë -bhö -dhia Falizi -mɛ bhë -a -gɔ kɔɔ, 'yö dho -guö -kpo 'lü 'bhlöngbhlöng 'ò pë 'yi 'tëë -sëëzë -ya pa bhë -a 'ka, ³⁸yö bɔ Yesu -zlöö -zian' 'yö dho -a -gen 'piö 'ò 'gbo bɔ, 'ö- 'yënnŋ -yö -lo Yesu -gen 'dheadhö. =Dhe =ya kë 'dhö, 'yö 'ò bha wun -ta -a -gean 'yö 'ò -ben -yɛ -a -gen -bha -nɛ -kɔ 'wo mɛ 'kpeng mü -na -a 'ka bhë -a 'dhö, 'yö pë 'yi 'tëë -sëëzë bhë 'yö- -kpenng -a -gen -ta dhuö. ³⁹=Dhe 'ò Falizi -mɛ 'ò Yesu -dhɔɔ -kë bhë 'ò pë -nu 'wo -nɛ =yaa- yö, 'yö- pö 'ò -de -zuö' 'piö -nɛɛ: «'Ö =ya kë =nɛ gɔɔn- 'ò =nɛ -Zlan -wodhiölomɛ -mü 'gbödhö, kö -yö -dho dhebɔ 'yö paa =nɛ -a dɔ, 'go mü 'ò mɛ 'ò- 'ka 'yö- dɔ, bhii -yö -sɔɔnkédhe 'ka.»

⁴⁰=Dhe =ya kë 'dhö, 'ò Yesu -ya pö Falizi -mɛ bhë -a -dhë: «Simɔ, 'wun do 'bhaa -yö n -gɔ kö 'aan- -blɛɛ' -ü -dhë.» 'Ö Simɔ -ya pö: «N -Gɔmɛ, -bhöë =blɛɛ'!»

⁴¹'Ö Yesu -ya pö -a -dhë: «'Pëdɔmɛ do -bha 'wëü- -yö -kë mɛ =plɛ -bha, mɛ do -bha 'ò tɔɔ dönïe =këng' 'sɔɔdhu, 'ò mɛ do -bha -yö -kë 'pö -a 'gɔɔ-

'sɔɔdhu 'ka. ⁴²=Dhe 'ö -kë =ne me =ple 'wo bhë -an -kɔ yaa 'dho -mɔ -a bho -sü -bha, 'yö ö bo -dhe 'wo- -bha =ple ö bha 'pë 'yö -an -bha bhë -a 'ka. =Ya kë 'dhö me =ple 'wo 'pë dɔ -an -bha bhë, dö 'ö dho -a -dho kë 'pëdɔme 'ka -duö =e?»

⁴³Ö Simɔ -ya -daa -kë 'ö- pö: «A n -zo -ta =ne, me 'ö -a -bha 'wëü- -yö -kë =va, 'ö ö -kwa -a -wun -zü bhë =ne, 'yö dho -a -dho kë -a 'ka -duö.»

'Ö Yesu -ya pö -a -dhë: «'Wun gia- 'ü- =blee.»

⁴⁴=Dhe =ya kë 'dhö, 'ö =sië dhebo 'ö bhë -a 'piö, 'yö- pö Simɔ -dhë =ne: «Dhebo =ne ü- -yö -a? Nu 'a- wo ü -gɔ kɔɔ =ne, ü 'ka 'yi nu n -dhë kö 'aan- n -gen 'zlu -a 'ka (-ne -kɔ 'ö kwa -bha wɔ -kɔ 'dhö -a 'ka bhë -a 'dhö), 'këe yö 'pö -yö n -gen -zlu ö 'yënnɔ 'ka, 'yö ö bha wun -ta -a -bha. ⁴⁵Ü 'ka nu n -gɔ zian- n 'kpeng mü -sü 'ka, 'këe 'yö sü n -ma -da ü -gɔ kɔɔ -sü -bha =sia, yaa ö bo ö -ben -ye n -gen -bha -sü 'ka =ne -kɔ 'wo me 'kpeng mü -na -a 'ka bhë -a 'dhö; ⁴⁶ü 'ka 'yɔn gbe -lo n tuö, 'këe yö 'pö -yö pë 'yi 'tëë -sëëzë -lo n -gen -ta dhuö. ⁴⁷-A -wun 'gü 'a- pö ü -dhë: -Dho =va 'yö- -zɔn bhë -ya -zɔn =ne -Zlan =ya ziö -a -bha =sɔɔn yaa =plëëzë -nu 'ple -ta, 'këe me 'ö -Zlan =ya ziö -a -bha 'wun yaa 'bhe 'tee -ta, -a -bha -Zlan -dho =yö 'tee.»

⁴⁸=Dhe =ya kë 'dhö, 'ö Yesu -ya pö dhebo bhë -a -dhë: «'Ma ziö ü bha =sɔɔn yaa -nu -ta!»

⁴⁹Ö me -nu 'wo -kë -a 'piö pë -bhö =dhia bhë, 'wo- pö wo -de =zuö' 'piö =ne: «Dö -mü gɔɔn- 'ö =ne -a 'ka 'yö ziö -na me -nu -bha =sɔɔn yaa -nu -ta =ne?» ⁵⁰Yesu -yö -to mü 'yö- pö dhebo bhë -a -dhë: «Ü -bha -zo -yö n -ma -sü -ya ü dha, -bhö 'dho =zuöyagluu 'ka!»

Dhoo -nu -wo -ziö Yesu 'piö

(Maakö 15.40-41)

8 ¹=Dhe =ya kë 'dhö, Yesu -yö -dho pö- =vava waa- pö- 'sensen 'gü -dhe -nu -bha -Zlan -wo =blee' -sü 'ka; 'yö 'wuntaɔsë 'ö -gban -Zlan -bha -gludëdhe -bha, 'yö- =blee me -nu -dhë. -A -bha =guë' -nu 'gɔɔ- do ö ga =ple 'wo bhë -wo -kë -a 'piö. ²-Kɔ do bhë -a 'ka 'ö dhoo -nu 'bhaa -nu 'yö -zuu yaa -nu bho -an 'gü waa- -a me -nu 'yö -an -bha 'yua -nu bho -an 'gü bhë, 'wo -ziö -a 'ka -a 'piö 'pö. -A me 'bhaa -nu 'tɔ 'ö =ne: Mali 'ö go Madala 'ö Yesu -yö -zuu yaa 'slaple bho -a 'gü 'dhiö -be bhë, ³Zanë 'yö -kë Elɔdö -bha yuökëme -nu -gɔme Suza bɔɔ 'ka bhë oo, Sizanë waa- dhoo -nu =plëëzë 'ö 'wo pë -nu 'wo -kë -an -gɔ, 'wo- nu Yesu waa- ö bha =guë' -nu -dhë, -nu -an -dhë -sü 'ka.

'Wun =zuan' 'yö -gban pëgatame -bha

(Matiö 13.1-9; Maakö 4.1-9)

⁴Pö- 'saadhö -a 'gü -me -nu -wo -go mü, 'wo nu Yesu 'piö. =Dhe me -gbaa =va =wa nu wo 'ko =bhaa -a 'piö mü bhë, Yesu -yö 'wun =blee -an -dhë 'wun =zuan' 'ka 'ö- pö: ⁵«Me do -yö -dho ö bha pëga -pen =dhia ö -gɔ =bhlöö-. -Yö

-kë ö bha pëga -pen -dhia, 'ö -a ga 'bhaa -nu -wo -püö zian -gbloo 'piö, 'ö me -nu -wo =taa -a -ta, 'ö -ma -nu -wa -bhö. ⁶'Ö- ga 'bhaa -nu -wo -püö 'se 'ö gwa -ta dhuö -a -ta. =Dhe 'ö -a 'plüün -nu -wa bho 'dhö, 'wo 'kpea kun, 'ö tɔɔ -dhe bhë 'yaa -saa. ⁷'Ö- ga 'bhaa -nu -wo -püö 'zü -blëë' 'ginngzë 'plüün 'gü, 'ö waa- pëga -së -sia 'wo -kpea wo 'ko -yië', 'ö -blëë' 'ginngzë -yö sɔ -a -ta. ⁸'Këe -a ga 'bhaa -nu -wo -püö 'se -dhe -së -dhe 'gü; 'wo bho 'wo -kpea, 'ö- -kpa -yö -ya; -a 'bhaa -nu -kpa ga -wo -kë -këng' do.»

=Dhe -ya kë 'dhö, 'ö Yesu -ya pö 'zü =nëe: «-Ka ka 'to 'to -së 'ka, -ya kë =ne ka 'wun ma -to -yö -dhö, kö 'wun =ne, -kaa -gen dɔ!»

Yesu -bha 'wun =zuan' -zɔn -gen
(Matiö 13.10-17; Maakö 4.10-12)

⁹=Dhe -ya kë 'dhö, 'ö -bha =guë' -nu -wa =dhe' kpo, 'wun =zuan' 'yö -zɔn bhë -a -gen 'ka. ¹⁰'Yö- -daa -kë -an -gɔ 'ö- pö: «Ka 'pö, 'wundɔdhe 'yö -gban -Zlan -bha -gludëdhe -bha 'yö -bin -sü 'ka, 'ma -dhe 'po -a -ta kö 'kaan -gen dɔ; 'këe me -nu 'wo to -an -bha 'ka, a -blëe -an -dhë -a -zɔn 'wun =zuan' 'gü -sü 'ka; -yö kë 'dhö kö -waan -a -ga 'këe kö -waan 'kun -a yö -sü 'ka, 'iin kö -waan -a ma 'këe kö -waan 'kun -a -bho 'kou dɔ -sü 'ka.»

'Wun =zuan' 'ö -gban pëgatame -bha bhë -a -gen

¹¹'Ö- pö: «'Wun =zuan' 'a- -zɔn bhë -a -gen =ga =ne: Pëga 'wo- -pen -na bhë 'ö tɔɔ -Zlan -wo. ¹²Me 'bhaa -nu -wo -bho zian -gblooga 'ö pëga -yö -püö -a -ta bhë -a -bha; 'wo -Zlan -wo -ma, 'këe dü -yö nu 'yö -Zlan -wo bho -an =zuö' 'piö. -Yö kë 'dhö kö -kun 'wun -dhe 'wun gia- -sü waa- dha -sü dho kë -an -gɔ.

¹³Me 'bhaa -nu -wo -bho gwatadhe 'ö pëga -nu -wo -püö -a -ta bhë -a -bha. =Wa -Zlan -wo ma 'wo- kun =zuögludhi 'ka, 'këe -an yun 'yaa 'dhö; -wo 'wun -dhe 'wun gia- 'töng 'bhaa 'ka; -ya kë =ne 'güidandhe -ya nu -an -ta, 'wo wo =kwaa -zo -yö -Zlan -bha -sü -zü.

¹⁴-Dhe =blëë' 'ginngzë 'dho -a -bha, 'ö pëga -nu -wo -püö -a -bha bhë -ya -zɔn me -nu 'wo -Zlan -wo ma 'wo wo =kwaa wo -de -zü wo -bha -zo -ta -a 'gü -wun, =bhɔpë -wun, waa- -de =dhɔɔbhaapë 'ö 'kpongtaa -a -wun 'gü, 'wo =nëng 'ö- -kpa -nu 'waa kë -dhö.

¹⁵'Se -dhe -së -dhe 'ö pëga -nu -wo -püö -a -ta bhë, -ya -zɔn me -nu 'wo -Zlan -wo ma, 'wo- -da wo =zuö' 'gü, -a -kun -së -sü 'plë 'ka, 'wo to wo -wo 'gü 'ö -an -kpa -yö -kë -dhö.»

'Wun =zuan' 'ö -gban =labang -bha
(Maakö 4.21-25)

¹⁶'Ö- pö: «Me gbe 'yaa =labang dɔ, 'yaa 'gbonggbo 'gblü -a -ta, 'iin 'yaa- dɔ =gba -löö, 'waa- kë 'dhö. Pë -ya kë 'wo- -kë 'ö tɔɔ -a dɔ 'wo- wo -a -dɔ -a -ta dhuö -pë -ta. -Yö kë 'dhö me 'kpekpe 'wo -da -na kɔɔ kö

-waan -dhepuudhe yö. ¹⁷Ö pë 'ö -dhö 'ö -bin -sü 'ka, 'yö dho kun -yö -dhegbeadhe -bha -sü 'ka 'yaa 'dhö. Yö do bhë 'zü, 'sloo 'ka -wun 'yö dho kun -yö -dhegbeadhe -bha -sü 'ka 'yaa 'dhö.

¹⁸-Ka ka -zo kë ka -de 'piö ka -bha 'wun ma -kɔ -wun 'gü! Bhii me 'ö pë 'dhoë- kë -a -gɔ -a 'bhaa -dho -da -a -ta; 'kɛɛ me 'ö pë gbe 'yaa- -gɔ, -a pë 'bhe 'tee 'ö 'ö -zo 'ta -na -a -wun 'gü bhë, -yö -dho kë -kun -a -gɔ -pë 'ka.»

Yesu dhe waa- -a dheglu 'në gɔɔn- -nu -wo -nu -a 'piö
(Matiö 12.46-50; Maakö 3.31-35)

¹⁹Yesu dhe waa- -a dheglu 'në gɔɔn- -nu -wo -nu wo 'yan dɔ -a -bha -dhia, 'kɛɛ -a këdhe gbe yaa kë -dhö -an -gɔ kö -waan -lo -a 'piö me gbung -va 'wo -kë mü bhë -a -wun 'gü. ²⁰Ö me -nu -wo -an -bha nu -sü -wun -bleɛ Yesu -dhë 'wo- pö: «Ü dhe waa- ü dheglu 'në gɔɔn- -nu -wo plaan, -wa 'piö kö -wo wo 'yan dɔ ü -bha.»

²¹'Yö Yesu -ya -pö -an -dhë: «N dhe waa- n dheglu 'në gɔɔn- -nu 'wo tɔɔ me -nu 'wo wo 'to to -Zlan -wo -bha 'ö 'wo- -wo -kë.»

Yesu -yö 'buu 'gbee- -dho sia-
(Matiö 8.23-27; Maakö 4.35-41)

²²Yi do 'ka Yesu waa- ö bha -guë' -nu -wo -da 'yitagɔ do 'gü, 'yö- pö -an -dhë: «-Kwa 'yipuë 'kan 'kwa 'dho -a -zlöö -zian'!» 'Ö 'wo dho.

²³-An -bha 'dho -sü 'ka, Yesu -yö yi zë. 'Kan 'wo- wo wo -ta -nɛ kö 'buu 'gbee- -yö ziö -sü 'gü 'yipuë bhë -a -ta; 'yitagɔ -yö -kë pa -dhiadhö 'yi 'ka, 'ö- -dhe -yö to 'tee kö -wo -dho 'yi -löö. ²⁴Ö- -bha -guë' -nu -wo -yɔɔn -a -bha 'wo pa -a -bha, 'wo- pö -a -dhë: «Yi -Gɔme! Yi -Gɔme! Kwa 'dhoë- ga -ɔ!» 'Ö Yesu -yö -büö, 'yö 'wun -bleɛ 'buu waa- 'yikpö -vava -nu 'wo bhë -an 'ka 'gbee- 'ka, 'ö 'buu -yö dho sia-, 'ö 'yi -yö -gbaannu, 'ö -dhe -yö ga diindhö. ²⁵Ö Yesu -ya pö ö bha -guë' -nu -dhë: «Öö! Ka -bha -zo -yö n -ma -sü -yö 'më -ɛ?»

'Kɛɛ 'suö -yö -da -an 'plɛ 'gü 'ö -an 'te -yö tun 'wo- pö wo 'ko -nu -dhë: «Dö -mü gɔɔn- 'ö -nɛ -a 'ka, 'ö 'wun -bleɛ 'buu waa- 'yi gia- -de -an -dhë, 'ö 'wo 'wun ma -a -wo -ta -nɛɛ?»

Yesu -yö -zuu yaa -nu -bho me do 'gü
(Matiö 8.28-34; Maakö 5.1-20)

²⁶=Dhe -kë 'dhö 'wo -lo Zelazeni -se 'ö -ya -sü 'ka Galile -se wöödhö 'yi -zlöö =zian' bhë -a -bha. ²⁷=Dhe Yesu -yö -yɔɔ, me do -yö -go plöö -zian' 'yö nu -a -gɔ zian-. Me 'ö bhë -zuu yaa -nu -wo -kë -a 'gü. =Dhe 'ö yaa sɔ kë ö -bha -a -dhe -ya -gɔɔ. 'Yaa wɔ kɔɔ gbɔ, -a këdhe -nu 'wo tɔɔ blɔɔn- -taa -dhe -nu. ²⁸=Dhe -ya Yesu yö, -yö -gbla 'gbee- 'ka 'yö nu 'yö -gblü -a -gɛɛndhö 'ö- pö 'gbee- 'ka -nɛɛ: «-Më -mü -i, -Zlan 'ö -ziö pë 'plɛ -ta -a Gbö Yesu? -Bheä'- 'a- wo ü -dhë kö -kun 'ü n -dɔ -gbɔudhö!»

29Pë -kë 'yö- pö 'dhö bhë -a -gen tɔɔ Yesu -ya -pö -zuu yaa 'ö me 'ö bhë -a 'gü bhë -a -dhë 'dhiö -yö 'go -a 'gü. Më bhë -ya kë -wa -kɔ -nu -lö, 'ö 'wo -gen -nu -lö -yɔɔ' 'ka kö -waan kuënnu, 'këe -zuu yaa -ya nu -a -ta, -yö -yɔɔ' bhë -ya 'plë -kaan 'ö- sü 'ö dhoë -dhe -nu 'ö më gbe 'yaa- -bha -a -bha. 30'Ö Yesu -ya =dhe' kɔɔ 'ö- pö: «Ü tɔɔ dö poo =e?» 'Yö- -daa -kë -a -gɔ 'ö- pö: «N tɔɔ yi -va!» Pë -kë 'yö- pö 'dhö bhë 'ö tɔɔ -zuu yaa -nu -plëezë -wo -kë -a 'gü. 31'Ö -zuu yaa -nu 'wo bhë 'wo -bheä Yesu -dhë kö -kun 'yö dho wo kë -waan 'dho -glu 'kpa 'dhi -va 'gü.

32-Bhotii -gbaa -nu -wo -kë wo -bha -bhöpë -nu -mëe' -dhia -tɔn 'piö mü. 'Ö -zuu yaa -nu 'wo bhë 'wo -bheä Yesu -dhë kö -yö 'we -a -bha -an -gɔ 'wo 'dho -bhotii -nu 'wo bhë -an 'gü. 'Yö -we -a -bha -an -gɔ. 33=Dhe -ya kë 'dhö, 'ö -zuu yaa -nu 'wo bhë 'wo go gɔɔn- bhë -a 'gü, 'wo dho -bhotii -nu -an 'gü. 'Ö -bhotii -gbaa -nu -blazë 'wo -yɔɔ -tɔn -bha, 'yö -an 'plesen -wo dho 'wo -lo yiö 'töüdhö.

34=Dhe -bhotii -nu -maakëme -nu =wa 'wun 'ö bhë -a yö, 'yö -an 'plë -wo =duë 'wo dho 'wuntɔɔ 'yö bhë -a 'ka =plöö, 'ö 'wo dho bhlö- -gbaa 'gü -dhe -nu -bha -a =blëe' -sü 'ka. 35'Ö më -nu -wo -ziö, 'wo dho pë 'ö -kë bhë -a -ga -dhia. =Dhe 'wo dho, 'wo -lo Yesu 'piö -dhe gia- bhë -a -bha, 'ö më 'ö -zuu yaa -nu -wo go -a 'gü bhë, 'wo- yö kö -yö -ya -sü 'ka Yesu -gëendhö kö -ya ö bha sɔ -nu -da ö -bha, kö =ya ö -de dɔ, 'ö 'suö -yö -da -an 'gü. 36Pë -nu 'wo -kë bhë më -nu 'wo -kë mü -a 'töng 'ka, -wo gɔɔn- 'ö bhë -a -bha -zuu yaa -nu -bho -a 'gü -kɔ bhë, -a -wun -blëe më -nu 'wo bhë -an -dhë.

37=Dhe =ya kë 'dhö, më -nu 'wo go Zelazeni -se 'gü bhë, 'suö -yö -da -an 'gü 'wo -bheä Yesu -dhë kö -yö 'go wo =plöö. 'Ö Yesu -yö -da 'yitagɔ 'gü 'yö dho.

38'Ö gɔɔn- 'ö -zuu yaa -nu -wo go -a 'gü -sia bhë, 'yö -bheä Yesu -dhë kö -yö 'we -a -bha 'yö 'to -a 'piö, 'këe Yesu -ya -pö -a -dhë: 39«-Bhö 'ye ü 'zü 'ü 'dho ü -gɔ kɔɔ kö pë 'ö -Zlan -ya -kë ü -dhë -ne 'ü- -blëe' -an -dhë.» 'Ö gɔɔn- bhë 'yö dho, 'ö pë 'ö Yesu -ya -kë -a -dhë bhë 'yö- -blëe plöödhe bhë -a -dhe 'saadhö -a 'gü.

Zailusö 'dhu -bho ga 'gü -sü waa- dhebo 'yö -pa Yesu -bha sɔ 'to 'dhiö 'ka
(*Matiö 9.18-26; Maakö 5.21-43*)

40=Dhe 'ö Yesu -yö -lo 'yipüë -zlöö zian gbe 'ka bhë, më -gbaa -nu 'wo -kë -dɔ -a -gɔ =dhia, 'yö 'wo -nu -a -gɔ zian- -kpe 'ka. 41'Yö më do 'wo- -dhe Zailusö 'yö -kë Zuifö -nu -bha -bhökuëgɔmë do 'ka bhë, 'yö nu 'yö -püö Yesu -gëendhö 'yö =bheä -a -dhë kö -yö nu ö -gɔ kɔɔ, 42'Ö tɔɔ -a 'dhu 'yö -kë -a -bha 'në do 'ka, 'ö- -kwe =ya -mɔ 'gɔɔ- do ö ga =plë -bha, -yö 'dhoë- ga.

=Dhe Yesu 'dhö 'dho -na -a -gɔ kɔɔ, më -gbaa -nu -wo -ziö -a 'piö -glüü -a -bha -sü 'ka zian 'plë 'ka.

43Dhebo do 'ö fei yën =yua' =yaa- 'yënnng bhö -kwe 'gɔɔ- do ö ga =plë 'piö -yö -kë mü. Pë -nu 'wo =naɔpë 'ka -a -gɔ kɔɔ, =yaa- 'plë 'gü -siö' =dhongtrɔ

-nu 'piö, 'keε me gbe -kɔ yaa -mɔ -a -dhe bo -sü -bha. 44'Ö bɔ Yesu -zläö -zian, 'yö pa -a -bha sɔ 'to 'dhiö 'ka, 'yö- -bha 'yua -yö bo -dhe do bhë -a 'gü. 45'Ö Yesu -yö -an -dheε' kɔ 'ö- pö: «Dö 'yö pa n 'ka bhë -ε?»

'Yö -an 'ple -wa pö 'waa -mü. 'Ö Pieε -ya pö: «N -Gɔme, bhi 'ö me 'ple -wa -nië' ü -zü, -wa ü -nëng zian 'saadhö -a 'ka bhë 'ö 'ü -dheε' kɔ a?»

46'Yö Yesu -ya -pö: «Mε do -ya pa n 'ka, bhii a- -dɔa' -ne 'piigbeedhe do 'bhaa -ya 'go n 'gü.»

47=Dhe dhebo 'ö bhë -yaa- yö -ne ö -ta 'ka 'dho -bin, 'yö nu 'yö -püö Yesu -gεendhö -zluun -sü 'ka. Pë 'ö -kë 'ö pa Yesu -bha sɔ 'to 'dhiö 'ka, 'iin -kɔ 'yö- -bha 'yua -yö to mü 'ö boë bhë, 'yö- 'ple =bleε me -nu wö 'dhiö mü. 48'Ö Yesu -ya pö -a -dhë: «N 'dhu, ü -bha -zo -yö n -ma -sü -ya ü dha, -bhö 'dho -zuöyagluu 'ka!»

49Yesu -yö -to 'wun bhë -a -bleε' -sü 'gü, 'ö bɔme do -yö -go Zuifö -nu -bha -bhɔkuëkɔ -gɔme -gɔ kɔɔ, 'yö- pö -a -dhë: «Kö -kun 'ü -Gɔme -sëë' bho 'kpaan, ü 'dhu -ya ga 'saadhö.»

50Yesu -yö -wo bhë -a -ma; -dhe -kë 'dhö 'ö- pö Zailusö -dhë: «Kö -kun 'ö 'suö -yö ü -kë, -bhö ü -zo yö n -ma dosen, pë gbe 'ka 'dho ü 'dhu kë.»

51=Dhe 'ö -ya 'dho -ya -lo kɔɔ, yaa 'we -a -bha kö me gbe -yaan ziö ö 'piö -a 'ke yaa kë Pieε 'dhö, Zan 'dhö, Zakö 'dhö waa- 'në bhë -a dë waa- -a dhe -an 'ka. 52Mε 'ple -wo -kë 'gbo bɔ -sü 'gü -wo -de =maa 'ma -sü 'ka 'në bhë -a -wun 'gü. =Dhe -ya kë 'dhö, Yesu -ya pö -an -dhë: «Kö -kun 'ka 'gbo bɔ, 'në bhë yaa ga; 'keε yi -ne 'ö- zë -na bhë.»

53'Ö 'wo wo -wo -lo -a 'ka, bhii 'ö tɔɔ -an 'ple -wa -dɔa' -ne 'në bhë -ya ga 'saadhö. 54=Dhe -kë 'dhö Yesu -yö -ya -a -kɔ -bha 'ö- pö -a -dhë 'gbee- 'ka -nεε: «Nëdhezë, -bhö -luu'!»

55'Ö- -zuu -yö -ye ö 'zü 'yö nu -a 'gü, 'yö to mü 'ö -luu. 'Ö Yesu -ya pö -a -mε -nu -dhë: «-Kaa gbaa -bhöpë 'ka!» 56'Ö 'në bhë 'ö -a -mε -nu 'te -yö tun. 'Ö Yesu -ya pö -an -dhë kö -kun 'wo 'wun 'yö- -kë bhë 'wo- -bleε me gbe -dhë.

Yesu -yö ö bha -guë' -nu 'gɔɔ- do ö ga -ple -bɔ

(Matiö 10.5-15; Maakö 6.7-13)

9 1Yesu -yö ö bha -guë' -nu 'gɔɔ- do ö ga -ple 'wo bhë -an -dhɔɔ -kë, 'yö -kɔ -mɔ 'wun -bha -sü waa- -wogbiindhe nu -an -dhë kö -waan -zuu yaa -nu 'ple bho -a 'ka me -nu 'gü, 'go mü kö -waan me -nu -dhe bo. 2=Dhe -ya kë 'dhö, 'yö -an bɔ kö 'wun 'ö -gban -Zlan -bha -gludödhe -bha bhë -waan -a -bleε' -iin kö -waan 'yua -nu bho me -nu 'gü. 3'Yö- pö -an -dhë: «Kö -kun 'ka -taatalü -nu, 'tasübhɔɔ -nu, 'bluu- -nu, 'wëüga -nu, -dabhasɔ kë =ple -naa -nu, -an gbe sü ka -bha 'ta 'sü -pë 'ka! 4=Dhe 'saadhö -bha, 'kɔ 'wo 'dhoë- ka -nia kun -a 'gü bhë, -ka 'to 'kɔ do bhë -a 'gü -yö 'dho -yö yöë ka -go mü -yi -bha. 5'Ö pö- 'oo pö- 'ö 'wo 'ka dho ka -nia kun -a 'gü bhë, -ka 'go -a 'gü. 'Go mü, ka 'dho -na, -ka ka -gen =kpënnng -büö -bi -yö 'go ka

-gen -nu -bha, -yö -dho kë -an -zo -büö -an -de -wun 'ka -sü -duakëpë do
-zɔn -an -dhë -sü 'ka.»

⁶'Ö -bha -guë' -nu -wo dho 'wo bɔ 'wuntaɔsë -blëe' -sü waa- mɛ -nu -dha
'yua -gɔ -sü 'ka pödhe 'saadhö 'plë 'gü.

Elödö -bha -dɔ -de -zɔnng' -ta -sü

(*Matiö 14.1-12; Maakö 6.14-29*)

⁷Töng 'dhö bhë -a 'ka, Elödö 'ö -kë 'sëdë 'ka, -yö pë -nu 'wo- -kë 'töüdhö
bhë -a -ma; 'yö -ya ö -zo 'ta -sü -bha, bhii 'ö tɔɔ mɛ 'bhaa -nu -wa -pö: «Zan
Batisö =ya 'go ga 'gü!»

⁸'Ö mɛ 'bhaa -nu -wa pö =nɛ: «Eli 'ö -kë -Zlan -wodhiölome 'ka 'kpa bhë
yö =nɛ 'ö nu bhë!»

'Ö mɛ 'bhaa -nu -wa pö 'zü =nɛ: «-Zlan -wodhiölome -nu 'wo -kë 'dhiö
bhë 'ö- mɛ do -yö go ga 'gü bhë!»

⁹'Yö Elödö -ya -pö: «Zan 'pö 'ma- -gɔ 'kan 'saadhö, =dhe -kë 'dhö =nɛ
gɔɔn- -mlë 'wo- -bha 'wun -nu =blëe' -na -kplawo =nɛ =ɛ?» =Dhe -kë 'dhö 'yö-
këdhe =mɛe kö -yaan -kpën Yesu -bha.

Yesu -bha mɛ -vuu 'sɔɔdhu 'dhi -gba -sü

(*Matiö 14.13-21; Maakö 6.30-44; Zan 6.1-14*)

¹⁰Yesu -bha =guë' -nu -wo -yɛ wo 'zü, 'ö pë -nu 'wo- -kë 'ma 'töüdhö bhë
'wo- =blëe -a -dhë. 'Yö -an sü 'wo -ziö, 'wo dho wo -de 'sloo 'ka pö- do 'wo-
-dhe Betesaida -a -zian 'ka. ¹¹'Kɛ mɛ -gbaa -nu -wa -bha 'dho -sü -wun
-ma, 'wo nu 'wo -ziö -a 'piö. 'Ö -an nu -sü 'yi -yö -kan Yesu 'dhi; 'yö yö
-Zlan -bha -gludëdhe -wun -blëe -an -dhë -sü -bha, 'ö mɛ -nu 'ö 'yua =ya -an
=sëë' bho, 'yö -an -dhe bo.

¹²=Dhe 'ö- -bha =guë' -nu 'gɔɔ- do ö ga -plë 'wo bhë =waa- yö =nɛ 'bin -yö 'më
-na, 'wo =yɔɔn -a -bha, 'wo- pö -a -dhë: «-Bhö ü -kwa' mɛ gbung 'wo =nɛ -an
-zü kö -wo 'dho pödhe -nu waa- bhlö- -gbaa 'gü -dhe -nu -bha kwa -zü 'to kö
-waan wɔdhe -nu waa- -bhöpë -nu =mɛe', bhii -dhe 'ö =nɛ mɛ gbe 'yaa- -bha.»

¹³'Ö Yesu -ya -pö -an -dhë: «Ka gia, -ka -bhöpë nu -an -dhë!»

'Wo- pö -a -dhë: «Pë 'ö yi -gɔ zö 'ö tɔɔ =bluu' -bhe 'sɔɔdhu waa- 'yuö- =plë.
Ü- 'piö kö 'yi 'dho mɛ gbung 'ö =nɛ -an -bha -bhöpë 'dho -dhia =a?»

¹⁴Gɔɔn- -nu 'wo -kë mü -an =tɛi' -kë =nɛ mɛ -lü -vuu 'sɔɔdhu 'dhö. 'Ö
Yesu -ya pö ö bha =guë' -nu -dhë: «-Kaa -an -ya kpöë -an dan -sü 'ka 'gɔɔ-
'sɔɔdhu 'gɔɔ- 'sɔɔdhu!»

¹⁵'Ö 'wo- -kë 'dhö, 'wo -an 'plë =yaannu. ¹⁶=Dhe -kë 'dhö 'ö Yesu -yö
=bluu' -bhe 'sɔɔdhu waa- 'yuö- =plë 'wo bhë -an sü, 'yö ö 'yan =luu dhang-
'gü =bhe' -sü 'ka, 'yö -Zlan zuö pö -bhöpë bhë -a -ta, 'yö -an 'klu =kaan,
'ö- nu ö bha =guë' -nu -dhë kö -waan -a -glu mɛ gbung bhë -an 'ka. ¹⁷-An
'plë -wa -bhö 'ö -an 'gu -yö dɔ. -A 'kluklu -nu 'wo to, 'wo =kpasen 'gɔɔ- do ö
ga =plë pa, 'wo dho -a 'ka.

Piɛɛ -ya -pö -Zlan -bha -Yame -mü Yesu 'ka
(Matiö 16.13-28; Maakö 8.27-9.1)

¹⁸Yi do 'ka Yesu waa- ö -bha -guë' -nu -wo -dho wo 'sloo 'ka, 'ö Yesu -yö -bhea. 'Yö ö -bha -guë' -nu -dheɛ' kpɔ 'ö- pö: «Me -nu -wa -pö dö -mü n 'ka ɛ?»

¹⁹Wo -daa -kë -a -gɔ 'wo- pö: «Me 'bhaa -nu -wa pö Zan Batisö -mü ü 'ka; mɛ 'bhaa -nu -wa -pö Eli -mü ü 'ka, 'ö mɛ 'bhaa -nu -wa pö 'zü -Zlan -wodhiölome -nu 'wo 'dhiö bhë -a mɛ do 'yö go ga 'gü yö -mü ü 'ka.» ²⁰Ö Yesu -yö -an -dheɛ' kpɔ 'zü 'ö- pö: «Kɛɛ ka 'pö 'dhee, ka- -pö dö -mü n 'ka ɛ?»

'Ö Piɛɛ -ya -daa -kë 'ö- pö: «-Zlan -bha -Yame -mü ü 'ka!»

Yesu -bha ö bha ga -sü waa- ö -go ga 'gü -sü -wun -bleɛ' -sü

²¹Ö Yesu -yö -an 'paan bho 'gbee- 'ka -nɛ kö -kun mɛ 'ö- 'ka 'wo- =bleɛ mɛ gbe -dhë. ²²'Yö- pö 'zü -nɛɛ: «Ma 'a Mɛgbö 'ka n 'yënnɔ -dho bhɔ =va, 'ö tɔɔ mɛ ziizii -nu, slabhome -gɔmɛ -nu waa- tɔnggɔmɛ -nu waa 'dho 'we n -wun -bha; -wo -dho n zë; 'ö- -dhekpɔɔyi kë -yaaga -naa bhë 'a goë ga 'gü.»

²³=Dhe =ya kë 'dhö, 'yö- pö -an 'plɛ -dhë: «Me 'ö- 'piö kö 'ö ziö n 'piö, kö -yö ö -kwaä' -zo -ta ö -de -wun 'gü -sü -zü, -yö ö -bha -gaatalü 'sü -dhekpɔɔyi 'saadhö 'ka, -yö ziö n 'piö. ²⁴Bhii mɛ 'ö- 'piö kö 'ö ö -de -bha -tosiadhe kë ö -de -ta, -yö -dho -a 'gü -siö' -'kpaan, 'kɛɛ mɛ 'ö 'dhoë- ö bha -tosiadhe 'gü -siö' -n -wun 'gü, -yö -dho dha -sü yö. ²⁵-A -truën -dho kë -më 'ka kö 'kpongtaapë 'plɛ -yö -kë mɛ -gɔ, 'kɛɛ kö -an 'gü -yö -siö' -sü 'ka ɛ? ²⁶-Ya kë -nɛ mɛ =ya lë- kë n -gɔ 'iin n -wo -nu -gɔ, ma 'a Mɛgbö 'ka, ma -de 'pö a -dho lë- kë -a -gɔ yi 'a 'dhoë- nuë ma 'tɔbhɔdhe waa- n Dë waa- -a -bha bɔmɛ -nu 'slöösLö 'wo n 'piö -an -bha 'tɔbhɔdhe 'ka -a 'ka. ²⁷A- -bleɛ ka -dhë 'wun gia- 'ka: Mɛ -nu 'wo zö -nɛ, -an 'bhaa -nu waa 'dho ga kö waa -Zlan -bha -gludëdhe yö -kun.»

Yesu -bha -dhië bun gbe 'gü -sü

(Matiö 17.1-8; Maakö 9.2-8)

²⁸-Dhe 'ö- -dhekpɔɔyi -kë -nɛ pë 'slɛaga 'dhö kö =ya yën 'wun -nu 'wo -nɛ -an -bleɛ' -sü -bha bhë, 'ö Yesu -yö Piɛɛ 'dhö, Zan 'dhö waa- Zakö 'dhö -an kpa ö -bha, 'wo dho -tɔn tuö =bhea' -dhia. ²⁹-Wo -kë -bhea' -dhia, 'ö- wöödhɛ -yö -dhië -kwaä, 'ö- -bha sɔ -nu -wo -kë 'puu 'ö -zië' -naa 'gü. ³⁰-Dhe 'wo- -ga kö mɛ =plɛ -wa nu Yesu 'piö mü, kö wo -nu -wo 'wun -bleɛ' -na wo 'ko -bhaa. Mɛ =plɛ 'wo bhë 'wo tɔɔ Moizö waa- Eli 'wo dhang- 'gü 'wo nu -a 'piö mü. ³¹Ö 'wo nu -dhepuudhe 'bhü -sü 'ö go dhang- 'gü bhë -a 'gü. Waa- Yesu -nu -wo 'wun -bleɛ wo 'ko -bhaa -kɔ 'ö Yesu dho ö bha yuö 'dhiö -mɔä' 'kuë -a ga -kɔ 'ka Zeluzalemë bhë -a -wun 'gü. ³²Yö Piɛɛ waa- ö 'bhamɛ -nu -wo -piü yië -ziögüüstüzë. 'Kɛɛ =dhe -wa -büö, -wo Yesu -bha -dhepuudhe 'bhü waa- mɛ =plɛ 'wo -kë -a 'piö mü bhë -an -yö. ³³-Dhe mɛ -nu 'wo

bhë 'wo 'go -na Yesu 'piö (kö waa 'dho -gbiin -kun), 'ö Piεε -ya pö Yesu -dhë: «N -Gome, -yö -së kö 'kwa 'to zö, 'kwa sɔ 'ko -yaaga dɔ, -a do- kë ü -bha 'ka, -a do- kë Moizö -bha 'ka, -a do- kë Eli -bha 'ka!» 'Wun -nu 'yö- -blεε bhë yaa- gbe dɔ ö -de -go.

³⁴-Yö -to 'wun 'ö bhë -a -blεε' -sü 'gü, 'yö dha kpö -yö -nu -an -ta dhuö, 'yö- 'bin -yö sɔ -an -zü. 'Ö 'suö -yö -da -a -bha -guë' -nu 'gü, dha kpö 'ö sɔ -an -ta bhë -a -wun 'gü. ³⁵-Wo do 'bhaa -yö -we dha kpö bhë -a 'gü, 'ö -we -nεε: «Mε 'ö -nε 'ö tɔɔ n Gbö (do 'ö n -gɔ,) 'a- -ya; -ka ka 'to kë -a -wo -bha!»

³⁶-Dhe 'ö -wo 'ö bhë -ya yën, Yesu dosen 'kpaan -ne 'wo- yö zlöö; 'yö -an 'dhi -yö kun. 'Ö go 'töng 'ö 'dhö bhë -a -bha, 'ö pë 'wo- yö bhë waa- -blεε' -mε gbe -dhë.

Yesu -bha -zuu yaa -bho 'në do 'gü -sü

(Matiö 17.14-18; Maakö 9.14-27)

³⁷-Dhekpacyi mε 'ö yö -a 'piö, -wo -yɔɔ 'wo go -tɔn bhë -a tuö, 'ö mε -gbaa =va -wo nu Yesu -gɔ zian-. ³⁸Mε do -yö -kë mε -gbaa -nu ziën mü, 'ö yö 'gbla -sü -bha =woë' -nεε: «N -Gome, =bhea' -a- wo ü -dhë, -bhö ma 'në 'ö -nε -a -ga, ma 'në ga do 'kpaan -mü! ³⁹=Ya kë -zuu yaa -yö -piü -a -ta, 'ö -gbla gbla, 'go mü 'yö- =zaan zan 'gbee-, 'yö- 'dhee 'vuu -yö dɔ -gboudhö; 'yö- 'yënnng bhɔ; 'ö -a -go -a 'gü -sü -yö -kë 'gbee-. ⁴⁰A- -bhea ü bha =guë' -nu -dhë kö -waan -a bho -a 'gü, 'kεε -an -kɔ yaa -mɔ -a -bha.»

⁴¹'Ö Yesu -ya pö: «Mε -nu 'ö -zo -yö n -ma -sü 'yaa ka -gɔ, 'ö ka këwun 'dhö ya, 'töng -dhë 'a dho -a sü 'zü 'kwaan- kaa- kwa 'ko =bhaa =ε? 'Töng -dhë 'a dho -a sü 'zü 'aan- dɔ -a 'ka ka -gban -gɔ -ε?» =Dhe -ya kë 'dhö, 'ö- pö mε 'ö bhë -a -dhë: «-Bhö nu ü bha 'në bhë -a 'ka!»

⁴²-Dhe 'ö 'në bhë 'ö =yɔɔn -na Yesu 'sɔɔ, 'ö -zuu yaa -ya -zuö sia-, 'yö- =zaan zan 'gbee- 'ka. 'Ö Yesu -yö 'wun =blεε 'gbee- 'ka -zuu yaa bhë -a 'ka, 'yö go 'në bhë -a 'gü, 'yö dha, 'yö- nu ö dë -dhë. ⁴³'Ö -an 'te -yö tun -Zlan -bha 'piigbeedhe -kë =va -sü -wun 'gü.

Yesu -yö ö bha ga -sü waa- ö bha -go ga 'gü -sü -wun -blεε 'zü -dëüwo

(Matiö 17.22-23; Maakö 9.30-32)

=Dhe -kë -nε -an 'plε 'te -ya 'tun pë 'saadhö 'ö Yesu -ya -kë -a -wun 'gü bhë, 'ö Yesu -ya -pö ö bha -guë' -nu -dhë: ⁴⁴«-Ka ka -zo kë 'wun -nu 'a- -blεε' -na ka -dhë -nε -a 'piö: Ma 'a Mεgbö 'ka, -wo -dho n dɔ mε -nu kwεε.»

⁴⁵'Kεε 'wun 'ö Yesu -ya -blεε bhë, waa- -gen gbe dɔ; -a -gen giagia 'wo dho -a dɔ -yö -kë -bin -sü 'ka -an -gɔ; 'ö 'suö -yö -an -kë Yesu -dheε' 'kpö -sü 'ka 'wun 'yö- -blεε bhë -a -gen -wun 'ka.

Yesu -bha -guë' -nu -bha wo 'ko 'kun -sü mε 'ö dho kë mε =va 'ka wo ziën -a -wun 'gü -sü

(Matiö 18.1-5; Maakö 9.33-37)

⁴⁶Yesu -bha -guë' -nu -wo -yö za -ya wo 'ko -bha -sü 'gü mε 'ö dho kë mε =va 'ka wo ziën -a -wun 'gü. ⁴⁷'Kεε -an -bha -zotadhe bhë Yesu -ya -dɔ.

-Dhe -kë 'dhö, 'yö 'në 'tee do sü 'yö- dɔ ö 'sɔɔ, ⁴⁸'yö- pö -an -dhë: «Me 'ö 'dhoë- 'në 'tee 'ö -kë -nɛ mɛ -nɛ -a 'dhö -a kun -sɛ n -wun 'gü, kö -ya ma gia- n 'kun -sɛ; 'ö mɛ 'yö 'dhoë- n kun -sɛ, kö -ya mɛ 'ö n bɔ, -a 'kun -sɛ 'pö; bhii mɛ 'ö -de -sü 'tee -mɛ 'ka ka 'plɛ ka ziën bhë -nɛ 'ö tɔɔ kaa- mɛ -va -Zlan wö 'dhiö.»

Me 'ö yaa nu ka -gɔ kö kaa- mɛ -mü
(Maakö 9.38-40)

⁴⁹Zan -ya pö -a -dhë: «N -Gɔmɛ, yi mɛ do -yö kö -yö -zuu yaa -nu bho -na mɛ -nu 'gü ü 'tɔ 'ka, 'ö 'yi- pö -a -dhë kö -kun 'ö- -kë 'dhö gbɔ, bhii 'yaa kwa 'piö.»

⁵⁰'Ö Yesu -ya -pö -a -dhë: «-Ka ka -kwaá' -a -zü, bhii mɛ yaa nu kwa -gɔ kö kwaá- mɛ -mü.»

Samali pö- do 'gü -mɛ -nu -bha -kɔ Yesu -bha -da plöö -sü 'ka -sü

⁵¹-Dhe 'ö Yesu -bha -dho dhang- 'gü -yi 'dho yö -na -klöö, kö -dho Zeluzalemé -sü -yaa- -kaan wo; 'yö -da zian-. ⁵²-Dhe -kë 'dhö, 'yö mɛ -nu bɔ ö 'dhiö, 'wo dho 'wo -da Samali -pö do 'gü kö -waan -a -bha wɔdhe -wun 'yan bhɔ. ⁵³'Kɛɛ pö- bhë -a 'gü -mɛ -nu waa 'we -a -bha -an -gɔ kö -wo wɔ -an -gɔ plöö, bhii -wo -kë 'dho -dhia Zeluzalemé -zian!. (Kë- wo 'dhö bhë -a -gen 'ö tɔɔ Samali -mɛ -nu waa- Zuifö -nu 'waa wo 'ko -dhë -sɛ.) ⁵⁴-Dhe -kë 'dhö, Zakö waa- Zan 'wo- -bha -gué' -nu 'ka bhë 'wo- pö: «Yi Dɛmɛ, ü- 'piö kö 'yi 'siö -dhe 'yö go dhang- 'gü kö -yaan -an 'gü -siö'- -a?»

⁵⁵Yesu -yö -dhië -an 'piö 'ö 'wun -bleɛ -an 'ka giagiawo, (('ö- pö: «-Zuu 'ö ka 'gü 'ö 'ka pë kë -na -a -kwaá' bhë 'kaa- dɔ. ⁵⁶'Ö tɔɔ ma Mɛgbö, n 'ka nu kö mɛ -nu 'gü -yaan -siö; 'kɛɛ a -nu kö -waan dha -zian!.»)) 'Ö 'wo go mü, 'wo dho pödhe gbɛ 'gü.

-Ziö Yesu 'piö -sü -dho
(Matiö 8.19-22)

⁵⁷-Wo -kë zian -gbloo 'piö, 'ö mɛ do -ya -pö Yesu -dhë: «-Dhe 'saadhö 'ü dho -a -bha, a -dho ziö ü 'piö.»

⁵⁸Yesu -ya pö -a -dhë: «Ü- -dua' -nɛ diɔng -wɔ -a 'gü -du -yö -dhö, 'ö -ma -nu -wɔ -a 'gü -kɔ 'dhö -dhö, 'kɛɛ ma 'a Mɛgbö 'ka, ma -dhe do 'a dho wɔ -a -bha kö 'aan- n 'tɛɛ pa 'yaa -dhö.»

⁵⁹'Ö Yesu -ya pö mɛ do 'bhaa -dhë: «-Bhö ziö n 'piö!»

'Kɛɛ mɛ 'ö bhë -ya -pö -a -dhë: «N Dɛmɛ, -bhö 'we -a -bha n -gɔ, 'a 'dho poo -kun 'a -ya n dɛ 'sɔɔ kö -yaan 'dho n 'yaan!»

⁶⁰'Ö Yesu -ya -daa -kë -a -gɔ 'ö- pö: «-Bhö ü -kwaá' game -nu -zü, -wo wo 'ko -bin, bhi 'pö 'ü 'dho 'ü -Zlan -bha -gludédhe -wun -bleɛ'- mɛ -nu -dhë!»

⁶¹Me do 'bhaa -ya pö 'zü -nɛɛ: «A -dho ziö ü 'piö, n Dɛmɛ; 'kɛɛ -bhö 'we -a -bha n -gɔ, 'a 'dho 'a n -wo -da n -mɛ -nu -dhë.»

⁶²Ö Yesu -ya pö -a -dhë: «Mε ö =ya -ya -dhe -ya -sü -bha, 'go mü ö -dhe -ga -na ö zlöö bhë, yaa -mɔa kö -yö yuö kē -Zlan -bha -gludëdhe -bha 'ka.»

Yesu -yö ö bha =guë' -nu 'gɔɔ- 'slaple ö ga =ple -bɔ

10 ¹Dhe =ya kē 'dhö, 'ö Yesu -yö ö bha =guë' -nu 'bhaa -sü; -wo -kē 'gɔɔ- 'slaple ö ga =ple, 'yö -an dan =ple =ple, 'yö -an bɔ ö 'dhiö pödhe -nu 'saadhö waa- -dhe -nu 'töüdhö 'ö yö gia- 'ö dho bɔ -a -bha -a 'gü. ²'Yö- pö -an -dhë: «-Mlü =ya ga =va, 'kεε -a 'kanme -nu -wo 'tee. -Ka =bhea' -bhlö- dëme -dhë kö -yö yuökëme 'bhaa bɔ kö -waan -a -bha -mlü 'kan. ³-Ka 'dho! A ka -bɔ =ne 'bhlanë -nu 'dhö -tɔn -bha gbën- -nu ziën. ⁴Kö =kun 'ka 'wëüga -nu gbë sü; kö =kun 'ka 'ta 'sü =bhɔɔ' -nu gbë sü; kö =kun 'ka -sakpa gbë sü; kö =kun 'ka =gbaannu 'ka -mεε -kë mε gbë 'ka zian -gbloo -nu -ta. ⁵'Ö =ya kē =ne 'ka -da 'kɔ do 'gü, -kaa -a pö -bleézë 'ka: =Zuöyagluu -yö kē 'kɔ 'ö =ne -a 'gü! ⁶'Ö =ya kē =ne mε 'bhaa 'ö dho we ka -bha 'dhuë- -wun -bha =ya kē mü, ka -bha 'dhuë- -yö 'to -a -ta; 'yaa 'pö ka -bha 'dhuë- bhë -yö 'to ka -gɔ. ⁷-Ka wɔ ka -nia -kun -a 'gü -kɔ 'gü 'ka -bhöpë -nu 'ö mε -nu 'dhoë- nu ka -dhë bhë 'ka- -bhö, bhii -yö yuökëme -bha 'ka kö -waan -a =saan' bho. Kö =kun 'ka -nië kɔɔtodhe -nu -bha! ⁸=Ya kē =ne 'ka -da pödhe do 'gü, 'ö =wa ka -nia 'kun, -ka -bhöpë -nu 'ö mε -nu dho nuë ka -dhia bhë -an -bhö. ⁹-Ka mε -nu -dhe bo pödhe bhë -a 'gü, 'go mü 'ka- pö pö- 'ö bhë -a 'gü -mε -nu -dhë: -Zlan -bha -gludëdhe =ya yö ka 'ka -klöö'. ¹⁰'Kεε =ya kē =ne 'ka -da pödhe 'bhaa 'gü 'ö waa 'we -a -bha kö -wo ka -nia 'kun, -ka -da zian -ta 'ka- pö -an -dhë: ¹¹'Sε -de 'yö to yi -gen -bha bhë 'yi- bho -na yi -gen -bha pë 'ka- -kë bhë -a -wun 'gü =ne, 'kεε -kaa dɔa =ne -Zlan -bha -gludëdhe =ya yö ka 'ka -klöö'. ¹²A- -blεε ka -dhë: -Zlan -bha zakanyi 'ka, pö- 'ö 'dhö bhë -a -bha 'klobhɔdhe -yö -dho kē =va 'giasü 'ö =zië' Sodɔmë -mε -nu 'ö 'wo -kë 'kpa -zuö' yaa -mε -nu 'ka bhë -an -bha -ta!»

Pödhe -nu mε 'ö -an 'gü -mε waa 'we Yesu -wun -bha

(Matiö 11.20-24)

¹³'Yö Yesu -ya pö 'zü: «'Yena -wun =ya kē ka 'ka, Kolazen -mε -nu! 'Yena -wun =ya kē ka 'ka, Betesaida -mε -nu! Bhii -dhidhaapë -nu 'wo -kë ka =plöö =ne, -wo -kë Tii -dhe waa- Sidɔn -dhe -nu -an -bha -bezë, kö pödhe -nu bhë -an 'gü -mε -nu =wa wo -bha -kë -a 'gü -sü -dhië' -kwaa -a -dhe =ya =glɔɔ 'saadhö, 'iin kö =wa =bhɔɔ' 'kaazë -da wo -bha 'iin =wa 'yoo -lo wo -bha.

¹⁴-A -wun 'gü, -Zlan -bha zakanyi 'ka, ka -bha 'klobhɔdhe -yö -dho kē =va 'giasü 'ö =zië' Tii -dhe waa- Sidɔn -dhe -an -bha -ta. ¹⁵=Dhe -kë 'dhö bhi 'dhee, Kapεεnaɔmë, -yö -kë ü -de 'gü =ne ü -gɔ -dho yö dhang- -bha! 'Kεε -abi! Ü -gɔ -dho =yɔɔ- =glöötiaandhö 'siö 'gü.»

¹⁶'Ö Yesu -ya pö ö bha =guë' -nu -dhë 'zü: «Mε =ya ö 'to kē ka -wo -bha, kö =ya ö 'to kē n -wo -bha; mε yaa bɔ ka 'ka kö yaa bɔ n 'ka =ne bhë; 'ö mε yaa bɔ n 'ka, kö mε 'ö n bɔ bhë =ne yaa bɔ -a 'ka bhë.»

-Guë' -nu 'wo bhë -an -bha -ye 'zü -sü

17=Guë' -nu 'gɔɔ- 'slaple ö ga =plɛ 'wo bhë -wo -ye wo 'zü 'wo nu -zuögludhi 'ka, 'ö 'wo- pö Yesu -dhë: «Yi Dëmɛ, -zuu yaa -nu -de 'yië 'wun -blɛɛ'- -an 'ka ü 'tɔ 'gü, -wo 'wun -ma yi -ta 'wo go mɛ -nu 'gü.»

18'Ö Yesu =ya -daa -kë -an -gɔ 'ö- pö: «A Satan -bha -go dhang- 'gü -sü 'yö -püö bhë -a -yö =ne pë -bha 'yan bɔ -sü 'dhö. 19'Kɛɛ -ka ka 'to 'to: A -kɔ -mɔ 'wun -bha -sü -nu ka -dhë kö 'kaan- =taa'- =mɛɛ -nu, gian -nu -an -ta, 'iin 'kaan- dü -bha 'piigbeedhe 'plɛ 'gü =siö'-; 'go mü pë gbe yaa 'dho pë 'dhiö- kë ka 'ka. 20'Kɛɛ kö =kun 'ö ka =zuö' 'glu -yö 'dhi, -zuu yaa -bha 'wun -ma ka -ta -sü -wun 'gü; ka =zuögludhi =zian' ka 'tɔ -bha -ya -Zlan -bha 'sëedhe 'gü -sü -wun 'gü!»

Yesu -bha =zuögludhi -wun*(Matiö 11.25-27; 13.16-17)*

21'Töng gia- 'ö 'dhö bhë -a 'ka, Yesu -yö -pa =zuögludhi 'ka -Zuu 'slööslö -kwaaw' 'yö- pö: «O n Dë, 'ü dhang- waa- 'kpongtaadhe -kɔɔnmɛ 'ka, a ü zuö -pö pë 'ü- -bin mɛ -nu 'wo 'kpaakpa waa- 'wundɔmɛ -nu -an -gɔ, 'ü- -zɔn mɛ -nu 'wo wo -de -sü 'tee -an -dhë bhë -a -wun 'gü; -ii, n Dë, -yö -kë =ne -kɔ bhë -a 'dhö, bhii 'ö tɔɔ bhi gia- ü 'yi -kan -a -dhë -wun -mü.»

22'Go mü 'yö- pö: «N Dë -yö pë 'plɛ -lo n kwɛɛ; mɛ gbe 'yaa ma 'a- Gbö 'ka n dɔ -a 'ke yaa kë n Dë 'ka. 'Ö go mü mɛ gbe 'yaa n Dë dɔ -a 'ke yaa kë ma 'a- Gbö 'ka waa- mɛ -nu 'ö 'a- -zɔn -na -an -dhë bhë -an 'ka.»

23=Dhɛ Yesu waa- ö bha =guë' -nu =wa 'to wo 'sloo 'ka, 'yö- pö -an -dhë: «=Zuögludhi -yö kë ka -gɔ, pë -nu 'ö 'ka -an yö bhë -an -wun 'gü, 24bhii a- -pö ka -dhë mɛdhevadhɛ 'wo -kë -Zlan -wodhiölome -nu 'ka waa- -gludɛ -nu 'wo 'dhiö -be, -wa -dho -kë kö n këpë -nu 'ö 'ka -an yö -na -nɛ 'waan- -an yö 'kɛɛ waa -an yö; 'iin pë -nu 'ka -an ma -nɛ 'waan- -an ma 'ö waa -an ma.»

'Wun =zuan' 'yö -gban Samali mi këwunsëëzë -bha

25=Dhɛ =ya kë 'dhö, tɔnggɔmɛ do -yö -luu 'yö Yesu 'gü dan -a -dhɛɛ' 'kpɔ -sü 'ka 'ö- pö: «N -Gɔmɛ, a -dho -a kë -dhë kö -toëpö -këdhösü -yaan kë n -gɔ -ɛ?»

26'Ö Yesu -ya pö -a -dhë: «=-Më 'ö =bɛɛn' -sü 'ka -Zlan -bha tɔng 'gü i? 'Bha -a pö, ü- -ma -kɔklɛ =ɛ?»

27'Ö gɔɔn- bhë 'ö- pö -a -dhë: «Pë 'ö =bɛɛn' -sü 'ka 'ö tɔɔ: -Bhö ü Dëmɛ ü -bha -Zlan -dho kë ü =zuöga 'plɛ 'ka, ü nii 'plɛ 'ka, ü =faan' 'plɛ 'ka, ü -zo -ta 'gü -wun 'plɛ 'ka! 'Go mü, -bhö ü -ya 'yɔɔ -dho kë =ne ü -de 'dhö!»

28=Dhɛ =ya kë 'dhö, 'ö Yesu -ya -pö -a -dhë: «Ü- -daa -kë -së, -bhö -a kë =nɛ -kɔ 'ö bhë -a 'dhö, ü -dho kë -dho =toëpö 'ka!»

29'Kɛɛ tɔnggɔmɛ 'ö bhë 'yaa- 'piö kö za -yö 'ö 'kun. =Dhɛ =ya kë 'dhö, 'yö Yesu =dhɛɛ' 'kpɔ 'zü =nɛɛ: «Dö tɔɔ n -ya 'yɔɔ =ɛ?»

³⁰Ö Yesu -ya -daa -kë -a -go 'wun -zuan' -zön -a -dhë -sü 'ka, 'ö-pö: «Göön- do -yö -go Zeluzalemë, 'yö -kë 'dho -dhia Zeliko. -Dhe 'ö këpëyaame -nu -wa -lo -a -ta zian-, 'wo- -bha pë -nu 'plë kun -a -go 'wo-ma, 'ö to -an kwæ 'ö -fuë. 'Wo- to sia- mü 'wo -ziö. ³¹-Zlan -bha slabhome do -yö -kë zian bhë -a -ta 'pö ziö -dhiadhö. -Dhe -ya göön- bhë -a yö, 'yö bō -kpinng 'to 'pian gbe -ta, 'ö -ziö.

³²-Kö do bhë -a 'ka 'ö mē do 'yö go Levi -nu -suu' -gü 'yö nuë. -Dhe -ya yö -a -tëi' 'ka, 'yö -yöön göön- bhë -a -bha. -Dhe 'ö -yaa- yö, 'yö saan 'yö bō -kpinng 'to gbe -ta 'ö -ziö.

³³'Kë Samali (-së 'ö- 'gü -mē -nu waa- Zuifö -nu 'waa wo 'ko -dhë -së bhë -a) mi do 'yö -kë 'dho -dhia 'ta 'gü; -yö -kë zian -gblooga do bhë -a -ta; 'yö -wo -a -ta mü. -Dhe 'ö -yaa- yö, 'yö- 'yena -yö -da -a 'gü, ³⁴'yö -yöön -a -bha, 'yö -dröön waa- 'yön yö -a -bha bhüö -nu 'gü, 'yö -an -lö sō 'pën 'ka. -Dhe -ya kë 'dhö, 'yö- -ya ö bha -soofang -taa 'yö dhoë -wō -a 'gü -kö 'wo-saan' bho -na bhë -a do 'gü. -Dhe bhë -a 'gü, 'yö ö -zo -kë -a 'piö. ³⁵-Dhe 'ö -a -tadhe -ya 'po, 'yö dönne =plë sü 'yö- nu -wō -a 'gü -kö bhë -a -gōmē -dhë -a pö -a -dhë -sü 'ka -nē: (-Bhö ü -zo kë mē 'ö -nē -a 'piö; -ya kë -nē a 'yē -na n 'zū a 'dho -na n =plöö, pë -nu 'ü 'dhoë- kë -a -wun 'gü 'töüdhö bhë a -dho ü -bha -yē 'zū kë.) »

³⁶'Yö Yesu -ya pö -a -dhë 'zū: «-Ya kë 'dhö kö mē -yaaga 'wo bhë -a dö -zë 'yö tö mē 'ö këpëyaame -nu -wa -ma bhë -a -ya 'yö -e?»

³⁷Ö tōngōmē -ya -daa -kë -a -go 'ö- pö: «'Ö tö mē 'ö- 'yena yö bhë.» -Dhe -kë 'dhö Yesu -ya pö -a -dhë: «Kö -bhö 'dho 'ü- kë -nē -kö bhë -a 'dhö!»

Yesu -bha -dho Maatö waa- Mali -an -go kö -sü

³⁸-Dhe Yesu waa- ö bha -guë' -nu -wa -da zian -ta, -wo -dho 'wo -da pödhe do 'gü. Dhe bō do -yö -kë mü, 'wo- -dhe Maatö; 'yö Yesu -nia kun ö -go kö.

³⁹-A dheglu 'nëdhe 'wo- -dhe Mali, -yö -kë -yaannu -süë' Dëmē -geendhö ö 'to -to -a -bha -mē -daan' -wo -bha -dhia. ⁴⁰Maatö -yö -kë yuö -plëézë kë -dhia, 'yö nu 'ö- pö: «N Dëmē, kö n dheglu -yö yuö -nu 'wo -nē -ya 'plë 'to n -kö -ta -nëdhö -nē, 'yaa ü -dhë pë gbe 'ka a? -Bhöë pö -a -dhë -yö nu n -dhë!»

⁴¹'Yö Dëmē -ya -pö -a -dhë -nē: «Maatö, Maatö, -zo -ta 'wun 'gü -sü waa- pë -plëézë kë -dho -yö ü -kë, ⁴²'kë 'wun do -yö mü, 'ö- -wun 'dhö 'gbee-. Yö -nē 'ö Mali 'dhoë- 'piö bhë; yaa 'dho 'go -a -go gbō.»

'Wun 'ö -gban -bheä' -kö -bha -a -blë' -ö Yesu -ya wo

(Matïö 6.9-13; 7.7-11)

11 ¹Yi do 'ka Yesu -yö -dho -bheä' -dhia -dhe do 'gü. -Dhe -ya yën -bheä' -sü -bha, 'yö- -bha -guë' -nu mē do -ya pö -a -dhë: «N Dëmē, -bhö yi -daan' -bheä' -kö 'ka -nē -kö 'ö Zan -yö ö bha -guë' -nu -daan -a 'ka bhë -a 'dhö!»

2'Ö Yesu -ya pö -an -dhë: «Ka 'dhoë- -bhea', -kaa pö:

Yi Dë, ü 'tɔ 'slööslö bhë, mɛ -nu -wa -bhlë -ya.

Ü -bha -gludëdhe -yö kè 'kpongtaa.

3-Dhekpaoyi 'saadhö 'ka, -bhöpë 'ö -mɔ yi -tian' -a nu yi -dhë!

4-Bhö ziö yi -bha 'wun =zaa' -sü -nu -ta =nɛ -kɔ 'yi =zië' mɛ -nu -bha 'wun =zaa' -sü -nu -ta bhë -a 'dhö.

Kö -kun 'ü ü -kwaa yi -zü 'ö dü -yö yi -püö!»

5'Ö Yesu -ya pö -an -dhë 'zü =nɛ: «-Ka ka -zo 'ta 'wun 'ö =nɛ -a 'gü, -ya kè =nɛ mɛ do -ya kè -dhö ka ziën, -a 'bhamɛ =ya kè -dhö, =ya 'dho -a 'piö gbeng ziën -yaan pö -a -dhë: «N 'bhamɛ, -bhö 'bluu- bhe -yaaga 'pè dɔ n -ma, 6bhii 'ö tɔɔ n 'bhamɛ do 'yö go 'ta 'gü, 'yö -wo n -ta =nɛ, pè gbe 'yaa n -gɔ kö 'aan- nu -a -dhë.» 7'Ö =ya kè =nɛ, -a 'bhamɛ =ya bɔ kɔɔ =yaa- pö -a -dhë: «-Bhö ü -kwaa' n -zü 'sengdhö! 'Ma 'kwɛɛ ta 'saadhö -lakele 'ka, yië- ma 'në -nu 'yië =waannu, n -kɔ yaa -mɔ -a -bha kö 'a -luu' -aan- 'bluu- nu ü -dhë!»

8=Ao', a- -pö ka -dhë yaa 'dho =luu' -yaan 'bluu- nu -a -dhë, -an -bha -kè 'kobaɔngzë 'ka -sü -wun 'gü, 'kɛɛ -yö -dho =luu' -'ö pè 'ö -dho =kaa' bhë 'ö- nu -a -dhë 'kwɛɛ -ta 'ö -ma -na -kplawo bhë -a -wun 'gü. 9=Dhe -kè 'dhö ma -zë a- -pö ka -dhë: «Ka pè -dhe -Zlan -gɔ, -yö -dho -a nu ka -dhë; -ka pè =mɛɛ' -Zlan 'piö, ka -dho -a yö; -ka 'kwɛɛ -ta -ma, -Zlan -yö -dho 'kwɛɛ po ka -gɔ. 10Bhii mɛ 'oo mɛ 'ö pè -dhe -Zlan -gɔ, -ya -nu -a -dhë; 'ö mɛ 'ö pè =mɛɛ -a 'piö, 'yö- yö; 'ö 'kwɛɛ -po mɛ 'yö 'kwɛɛ -ta -ma -a -gɔ. 11'Ö =ya kè =nɛ ka ziën mɛ do -yö -dhö 'ö- -bha 'në 'dho -dhö, =ya 'yuö- -dhe -a -gɔ, -yö -dho =mɛɛ nu -a -dhë -a? 12'Iin =ya pè -yan -dhe -a -gɔ, -yö -dho gian nu -a -dhë -a? 13'Wunyaakëmɛ -nu 'ka dɔ =nɛ, ka pè -së -nu kaa- 'në -nu -dhë -dhe -dɔ. =Dhe 'ö 'dhö, -më 'yö -kè 'ö ka Dë 'yö -ya -sü 'ka dhang- 'gü, yaa 'dho -Zuu 'slööslö nu mɛ 'ö- -dhe -a -gɔ -a -dhë =ɛ?»

'Wun 'wo- dɔ Yesu -bha bhë -a -daa 'yö- -kè -an -gɔ

(Matiö 12.22-30; Maakö 3.22-27)

14Me do -yö -kè 'tuunzë, bhii -zuu yaa -yö -kè -a 'gü. =Dhe 'ö Yesu -ya bho -a 'gü, 'yö yö 'we -sü -bha. 'Ö mɛ gbung 'wo -kè mü bhë 'ö -an 'te -yö tun. 15'Kɛɛ mɛ 'bhaa -nu -wo -kè mü 'wo- pö: «Bɛɛzebilö 'ö tɔɔ dü 'ö -zuu yaa -nu -gɔmɛ 'ka bhë, 'yö -kɔ -mɔ 'wun -bha -sü nu -a -dhë, 'ö -zuu yaa -nu kè -na -a 'ka bhë!»

16'Ö mɛ 'bhaa -nu -wa -kè kö 'waan- -a 'gü dan 'wo- pö -a -dhë: «-Bhö -dhidhaapë do 'yö dho -a -zɔn =nɛ ü bha -kɔ -mɔ 'wun -bha -sü bhë -yö -gɔ -Zlan 'piö -a kè!» 17Yesu -yö -an -bha -zotadhe -dɔ. =Dhe -kè 'dhö, 'yö- pö -an -dhë: «'Sɛgɔ =suu' -'oo =suu' -'wo 'ko zë -na wo 'ko 'ka -an 'dhiötodhe 'ö tɔɔ -an 'gü =siö' -sü, -an -bha 'kɔ -nu -wo -dho -lo. 18=Ya kè =nɛ dü =ya 'ko zë 'ö -de 'ka, -a -bha 'sɛgɔ -dho =glɔɔ -kɔklë =ɛ? Bhii ka- -pö =nɛɛ a -zuu yaa -kè mɛ -nu 'gü, 'ö tɔɔ Bɛɛzebilö =nɛ 'ö -kɔ -mɔ 'wun -bha -sü nu n -dhë.

19-Ya kë 'dhö kö dö 'ö -kɔ -mɔ 'wun -bha -sü nu ka -bha me -nu -dhë 'wo -zuu yaa -kë -a 'ka e? Ka -de -bha me -nu -wa -zɔn =ne za yaa -yö ka 'piö.

20'Wun gia- 'ka, -Zlan -bha 'piigbeedhe =ne 'a -zuu yaa -kë -a 'ka, kö -Zlan -bha -gludëdhe =ya nu ka 'piö 'saadhö.

21Bhii =ya kë =ne gɔɔn- 'gügbeezë 'ö 'ko =zaa' -piö 'dhoë- -gɔ, =ya ö -zo kë ö bha 'kɔ 'piö, -a -bha kɔɔpë 'ple -dho =waannu -së 'ka.

22'Ö gɔɔn- do 'yö- 'gü 'dho 'gbee- 'yö -ziö -a -ta, =ya -wo 'ö =ya 'to -a 'gbee- 'ka -a -ta, -ya -bha 'ko =zaa' -piö 'yö ö -zo yö -a -bha bhë -ya 'ple -sü -a -gɔ; 'go mü 'yö- -bha pë -nu 'yö- sü bhë, 'yö- -glu ö -bha me -nu 'ka.

23A- -pö ka -dhë: Me 'yaa n 'piö, kö ma me 'yaa -mü; 'go mü me 'ö yaa nu n -dhë ma pë -kpɔ 'kuë- -sü 'gü, kö -yö -nu n -ma pë 'pen -dhia.»

**'Wun 'ö -gban -zuu yaa -bha -ye 'zü -sü -bha -a -blee' -'ö Yesu -ya wo
(Matiö 12.43-45)**

24'Yö Yesu -ya pö: «-Zuu yaa =ya 'go me -nu 'gü, 'yö dho 'ö =nië nië -dhe 'ö me gbe 'yaa- -bha -a -bha kö -yaan ö -yadhe =mæe'. =Ya kë =ne 'yaa- yö -na, 'yö- pö ö -de -dhë =næ: 'A -dho ye n 'zü 'a dho n -yadhe 'a go -a -bha bhë -a -bha.» 25'Ö -ye ö 'zü 'yö nu; 'yö -dhe me 'ö -kë -a -bha 'dhiö bhë -a yö kö =ya kë =ne 'kɔ 'ö -a 'gü -dhe 'dho go -sü 'ka, 'ö pë 'ple 'dho -dho 'kuë- -sü 'ka -a 'gü bhë -a 'dhö. 26=Ya kë 'dhö 'ö -zuu yaa 'slaple 'ö -an këwun 'dho ya 'ö =ziö' -a -ta bhë 'yö -an kpa ö -bha, 'ö wo 'ple 'wo nu 'wo wo -yadhe kun -dhe bhë -a -bha. =Ya kë 'dhö zlöö kö gɔɔn- 'ö bhë -a -bha 'wun kë -kɔ =ya kë ya, =ya ziö -a me 'ö 'dhiö -a -ta.»

-Zuögludhi -wun giagia

27=Dhe Yesu =ya yën 'wun 'ö bhë -a -blee' -sü -bha, 'ö dhebo do -yö -bo me gbung 'gü, 'yö- pö: «-Zuögludhi -yö kë dhebo 'yö ü -gu sü 'yö ü gbaa 'yɔn 'ka bhë -a -gɔ!»

28'Ö Yesu -ya -pö -a -dhë: «-Zuögludhi -yö kë =zian' me 'wo -Zlan -wo ma 'ö 'wo- =bhlë -ya -an -gɔ.»

**-Dhidhaapë do -dhe -sü
(Matiö 12.38-42)**

29=Dhe 'ö me -nu 'dho bhɔ -na 'kuë- =va Yesu -zü, 'yö- pö -an -dhë: «Me 'bhee- -nu 'wo =dæe =ne -a 'gü =ne -an këwun 'yaa -së; wo 'ö 'wo 'dhö bhë, 'wo -dhidhaapë 'yö dho kë =duakëpë 'yö go -Zlan 'piö 'wo- =mæe, 'kæe -dhidhaapë gbe 'ka 'dho kë -a 'ke yaa kë Zonasö -bha -dha ga -gɔ -sü 'ka; ('kæe kö =ya -dhekpacyi -yaaga kë 'yuö- 'guu). 30-Kɔ do 'ö Zonasö -yö =kaa' =duakëpë do 'ka, me -nu 'wo Ninivö -an -bha 'ka 'dhiö -be bhë, -kɔ do bhë -a 'ka 'ö ma 'a Megbö 'ka 'a dho kaa me -nu 'wo =dæe =ne -an -bha =duakëpë do 'ka. 31-Zlan -bha zakanyi 'ka, -gludhe 'yö -kë Seba -se =kɔɔnmæ 'ka bhë -yö -dho -luu' -me 'bhee- -nu 'wo =dæe =ne -a 'gü -an -gɔ, 'yö za -lo -an

tuö; bhii 'ö tɔɔ -yö -go 'se -gbiin gbe -ta, 'yö nu 'yö ö 'to to Salomɔ -wo 'ö 'kpaakpadhe 'ö -Zlan -ya nu -a -dhë bhë -a -bha. Yö do bhë 'zù, -dhe 'ö -ne -a 'gü me do 'yö =va 'ö -zië' Salomɔ -ta -yö zö. ³²'Go mü -Zlan -bha zakanyi 'ka, me -nu 'wo Ninivö -wo -dho -luu' -me 'bhee- -nu 'wo =dɛɛ -ne -an -gɔ, 'wo za -lo -an tuö, bhii 'ö tɔɔ =dhe Zonasö -ya -Zlan -wo =bleɛ' -an -dhë, -wo wo -bha -kë -a 'gü -sü =dhië -kwaa -Zlan 'piö, 'kɛɛ kö me 'yö =va 'yö =zië' Zonasö -ta 'yö zö.»

Bun -bha -dhepuudhe

(Matiö 5.15; 6.22-23)

³³'Ö- pö: «Waa =labang dɔ kö -waan -a -bin, 'iin kö -waan 'gbonggbo 'gblü -a -ta. -Abi! -Wa -dɔ =zian' ö -dɔ -a -ta dhuö -pë -ta; -yö -kë 'dhö kö me -nu 'wo -da -na kɔɔ bhë -waan -dhepuudhe yö. ³⁴Me 'yan -yö -kë =ne me bun -bha =labang 'dhö. 'Ö =ya kë =ne -potaasü =ya kë -an -gɔ, kö bun -yö -dhepuudhe 'gü; 'kɛɛ =ya kë =ne -potaasü 'yaa -an -gɔ kö bun -yö -dhetiidhe 'gü. ³⁵=Dhe 'ö 'dhö kö -ka ka -zo kë ka -de 'piö, kö -kun 'ö -dhepuudhe 'yö ka 'gü bhë 'yö -kë ka -gɔ -dhetiidhe 'ka. ³⁶'Ö =ya kë =ne ka bun -dhe 'saadhö =ya 'bhü, 'ö -a -dhe gbe yaa 'to -dhetiidhe 'gü, -dhepuudhe -dho -a pa =ne -kɔ 'ö =labang 'dho ö bha 'bhü -sü yö -na -a 'ka kɔɔ bhë -a 'dhö 'papadhö.»

Yesu -yö Falizi -me -nu waa- tɔnggɔme -nu këwun -nu -bleɛ

(Matiö 23.1-36; Maakö 12.38-40)

³⁷=Dhe Yesu =ya yën 'wun =bleɛ' -sü -bha 'dhö, 'ö Falizi -me do -ya -dhɔɔ -kë ö -gɔ kɔɔ kö 'waan- pë -bhö. Yesu -yö -dho -a -gɔ kɔɔ, 'yö- -nia kun kö -waan pë -bhö. ³⁸Falizi -me bhë -a 'te -yö -tun -kɔ 'ö Yesu yaa- 'zlu -ne -an -bha wɔ 'dhö -yaan -tun pë -bhö -na bhë -a -wun 'gü. ³⁹'Ö Dëme -ya pö -a -dhë: «Pë 'ö Falizi -me -nu, 'ka -a 'ka, =ga 'ö =ne: Ka 'yi mü -kɔɔ -nu waa- 'tia- -nu -an bun 'kpaan -zlu 'kɛɛ 'kaa -an 'gü -dhe 'zlu; ka -de =zuö' 'piö, ka -ya -sü 'ka -kwaan -sü waa- 'glu yaa -an -wuën! ⁴⁰'Wun -yö 'yaan -me -nu 'ka =ne! -Zlan 'yö pë plaan -dhe -pë -kë bhë, yö do kun 'ö pë 'gü -dhe -yuö -kë 'pö a? ⁴¹-Ka pë -nu nu ka =zuöga 'plɛ 'ka =zian', 'ka pë -nu 'wo ka -gɔ -an nu 'yename -nu -dhë; =ya kë 'dhö ka -bha pë 'plɛ -dho kë 'slööslö.

⁴²'Yena -wun -dho kë ka 'ka, Falizi -me -nu, 'ö tɔɔ ka ka -bha pë 'gɔɔ- do -naa -bho ka -bha 'too =dheɛ' -pë 'sensen 'plɛ 'ka, 'ö 'kaa ka -zo -kë ka -de 'piö, -kë kpengdhö -sü 'ka waa- -Zlan -dhɔ -ya ka =zuö' 'piö -sü 'ka bhë. Pë 'ö 'ka dho -a kë -bezë 'ö bhë, kö -yaan 'to -an me -nu 'wo to -an -bha.

⁴³'Yena -wun -dho kë ka 'ka, Falizi -me -nu, 'ö tɔɔ ka- -dhɔ -kë -yadhe =bhlözë -nu 'ö 'wo -bhöküëkɔ -nu 'gü bhë -an 'ka 'iin kö me -nu -wo -mɛɛ kë ka 'ka =bhlë 'gü 'dhëédhe -nu 'gü.

⁴⁴'Yena -wun -dho kë ka 'ka, 'ö tɔɔ ka -kë =ne blɔɔn- 'ö me gbe 'yan 'yaa- yö 'ö 'wo =taa -a -ta, 'waa -a =tei' dɔ =ne me =glöö 'buu -ya 'gü bhë -a 'dhö!»

⁴⁵-Dhe -kë 'dhö 'ö tånggõme do -ya pö Yesu -dhë: «N -Gõme, ü 'wun -blëe' -na -në -kõ bhë -a 'dhö kö 'si 'ü- bho -na yi -de 'pö yi -gõ bhë!» ⁴⁶'Ö Yesu -ya -daa -kë -a -gõ 'ö- pö: «'Yena -wun -dho kë tånggõme -nu ka -de 'pö ka 'ka! Bhii 'ö tã ka -kwëe- -va -sü 'ka- dõ me -nu tuõ 'ö 'kaa nu -an -dhë 'bhe 'tee wo kö 'kaan- -an -bha -kwëe- -nu bho -an -ta.

⁴⁷'Yena -wun -dho kë ka 'ka! Bhii 'ö tã -Zlan -wodhiölome -nu 'ö ka 'bhema -nu -wo -an zë bhë ka -blõn- -ta dhuõ -dhe -pë -kë. ⁴⁸-A -kë 'dhö -sü 'gü ka -zõn -në ka 'bhema -nu -bha yuõ kë -kõ 'yi- -kan ka 'dhii! Bhii wo -zë -wo -an -zë, 'ö ka -zë 'ö 'ka 'kõ -nu dõ -an blõn- -ta. ⁴⁹Bhii -Zlan -ya -blëe 'ö -bha 'kpaakpadhe 'ka 'dhiõ -be -nëe: A -dho ma -wodhiölome -nu waa- ma bõme -nu bõ -an -dhë; -wo -dho -a me 'bhaa -nu zë 'ö 'wo- me 'bhaa -nu 'klo bhõ.

⁵⁰'Këe pë dho kë 'ö tã me -nu 'wo -dëe -në -a 'gü bhë, -an 'klo -dho bhõ -Zlan -wodhiölome -nu 'wo -an zë 'ö sü 'kpongtaadhe züdüyi -bha bhë -a -wun 'gü ⁵¹'Ö sü Abelõ zë -yi 'ö -kë me zë -sü -blëezë 'ka 'kpongtaa zõ bhë -a -bha -yõ yõë Zakali 'wo- zë sla- bho -dhe waa- -dhe 'slööslö -dhe -duõ -an ziën bhë -a -wun 'gü. A -blëe ka -dhë giagia 'ka -nëe: Me -nu 'wo -dëe -në, -an 'klo -dho bhõ me zë 'ö -an 'bhema -nu -wa wo bhë -a -wun 'gü.

⁵²'Yena -wun -dho kë ka 'ka, tånggõme -nu, bhii 'ö tã 'ka -lakele 'yõ dho 'kwëe po me -nu -gõ kö -waan -Zlan -bha 'wun -nu dõ bhë, 'ka- sü 'ö ka 'ö ka 'ka 'dho -da kõ bhë, 'ka- -kë 'ö me -nu 'wo- -dho -kaa' kö 'waan- -da kõ bhë, 'kaa 'we -a -bha kö -wo -dakõdhe yõ.»

⁵³-Dhe 'ö Yesu -ya 'go -dhe bhë -a 'gü, tånggõme -nu waa- Falizi -me -nu -wo yõ -ziõ -a 'piõ -sü 'gü -naazuédhe 'ka, 'ö 'wo -dhe'e' -nu kpõ -a -gõ 'wun -nu -plëezë -gen 'ka; ⁵⁴'këe -yõ -kë 'slë 'ka 'wo- -kan -a -gõ -a këdhe -mëe' -sü 'ka kö -waan -a 'kun 'ö -wo -nu -ta.

-Zo -kë -de 'piõ me 'yan -ta -wun kë -me -nu -gõ -sü

(Matiõ 10.26-27)

12 ¹-A 'tõng bhë -a 'ka, me -nu -wo -dho wo 'ko -bhaa -vuu -plëezë 'ka. 'Ö -dhe to zlöõ kö -wo -taa' -na wo 'ko -nu -gen 'dhe -ta, 'ö Yesu -yõ -dhië 'ö bha -guë' -nu 'piõ, 'yõ- pö -an -dhë: «-Ka ka -zo kë ka -de 'piõ Falizi -me -nu 'ö -an -bha 'wun kë -kõ -yõ -kë -në -bluubheepë 'dhö bhë -an -gõ, 'ö tã me 'yan -ta -wun kë -me -nu -mü -an 'ka! ²Pë 'yõ -bin -sü 'ka -a 'plë -yõ -dho yõ -dhegbeadhe 'gü; 'ö 'sloo 'ka -wun 'yõ -bin -sü 'ka 'yõ dho yõ plaan. ³-A -wun 'gü, 'wun -nu 'ka dho -a -blëe' -dhetiídhe 'gü, 'wo dho -a ma -dhe 'po -sü 'gü; 'ö 'wun -nu 'ka dho -an -blëe' -ka 'ko 'toodhõ ka -gõ kõdhe -nu -bha, 'wo dho -a -blëe' -me -nu ziën.»

-Suõ -a -dhë -me

(Matiõ 10.28-31)

⁴«'Wun me 'ö -në a- -blëe me 'ka n 'bhame -nu 'ka ka -dhë: Kö -kun 'ka -suõ me -nu 'wo dho ka zë, 'ö 'go mü waa 'dho pë 'waa gbë kë gbõ bhë -an

-dhë. ⁵A -dho me 'ka dho suö -a -dhë -a -zɔn ka -dhë: -Ka 'suö -Zlan 'ö -ya me 'sü 'ö -kɔ -mɔ 'wun -bha -sü 'dhoë- gɔ kö -yaan me -zuö -glöötiaandhö 'siö 'gü bhë -a -dhë. -Ii-, a- -pö ka -dhë: -Ka 'suö -a -dhë 'dhe!

⁶Kë 'kwa- wo -ne 'waa =zöng' 'sɔɔdhu 'dhɔɔ dɔ 'wëü- 'tama ga -ple -bha -a? 'Kee kö -Zlan -zlö 'yaa trö -a do -de -bha. ⁷'Go mü 'ö ka tuö -wun 'ple 'dho =dhong' -sü 'ka. Kö -kun 'ö 'suö -yö ka -kë, ka -wun -yö 'gbee- 'yö -zië' =zöng' -nu -ta!»

-We Yesu -wun -bha -sü 'iin -kploo -a -wun 'ka -sü
(Matiö 10.32-33; 12.32; 10.19-20)

⁸'Ö- pö: «A- -pö ka -dhë: Me 'oo me 'yö 'dhoë- -a pö me -nu ziën -yö n -ma 'ka, ma 'a Mëgbö 'ka 'pö a -dho -a pö -Zlan -bha bɔme -nu -dhë -yö n -ma 'ka. ⁹'Kee me 'oo me 'ö 'dhoë- pö me -nu ziën 'yaa n dɔ, ma 'a Mëgbö 'ka 'pö, a -dho -a pö -Zlan -bha bɔme -nu -dhë 'maa- dɔ.

¹⁰Me 'oo me 'ö 'dhoë- 'wun yaa =blëe'- ma 'a Mëgbö 'ka n 'ka, -Zlan -dho ziö -a -bha 'wun yaa 'ö 'dhö bhë -a -ta; 'kee me 'ö 'dhoë- 'wun yaa =blëe'- -Zuu 'slööslö -gɔ, yö 'ka 'dho ziö -a -bha 'wun yaa 'ö 'dhö bhë -a -ta.

¹¹=Ya kë =ne =wa ka 'kun, 'to 'ka- wo -na n 'piö bhë -a -wun 'gü, 'ö =wa 'dho ka 'ka Zuifö -nu -bha -bhöküekɔ 'gü, 'iin 'dhiö -sü -me 'ka -me -nu, 'iin 'se =kɔɔnme -nu -an 'dhiö kö -waan 'wun dɔ ka -bha, kö -kun 'ka dɔ pë 'ka dho -a =blëe'- -a -wun =zɔnng' -ta ka -de -gɔ -wun =blëe' -sü 'gü; ¹²bhii -Zuu 'slööslö -dho 'wun 'ka dho -a =blëe'- -a -zɔn ka -dhë 'töng gia- bhë -a 'ka.»

'Wun =zuan' 'yö -gban =bhɔɔme 'ö 'yaa 'wun dɔ -a -bha

¹³'Töng bhë -a 'ka, me do -yö -bɔ me gbung ziën 'ö- pö Yesu -dhë: «N Dëme, -bhö -a pö n dheglu -dhë, pë -nu 'ö yi dë -ya to yi -gɔ bhë 'yi -an -glu!»

¹⁴'Ö Yesu -ya -daa -kë -a -gɔ 'ö- pö: «Gɔɔn- =ne, dö 'ö n -ya kö 'aan- kë ü bha za -nu 'kan -me 'ka, 'iin 'aan- kaa- pë -nu -glu ka 'ka e?»

¹⁵=Dhe =ya kë 'dhö, 'ö- pö -an 'ple -dhë: «Kö -kun 'ka -klu =bhɔɔpë -nu -bha, bhii me -bha -kë -a 'gü -sü yaa 'dho yö =bhɔɔpë -nu -bha -kë -a -gɔ -sü -bha, 'kö -kë =ne -yö =bhɔɔzë =duö 'dhee.»

¹⁶'Yö Yesu -yö 'wun =zuan' do -zɔn -an -dhë 'ö- pö: «Gɔɔn- =bhɔɔzë do 'ö tapë -nu -wo -kë -a -gɔ =va -yö -kë -dhö; 'yö pë -yö -dhi -a -gɔ. ¹⁷'Yö ö -zo -ta 'ö- pö ö =zuö' 'piö -nɛɛ: «A -dho -a kë -kɔklë =oo? =Dhe 'a dho ma pë -nu -lo -a -bha, 'maa- yö -na!» ¹⁸'Yö- pö ö =zuö' 'piö 'zü -nɛɛ: «Pë 'a dho -a kë 'ö =nɛ: A -dho ma 'slëédhe -nu wü 'a- gbe =va kë, 'ö 'a ma -mlü -nu waa- ma pë -sɛɛɔ 'töüdhö 'a -lo -a 'gü. ¹⁹=Ya kë 'dhö kö ma pë 'ple 'dhiö -ya -mɔ, bhii kö n -bhöpë -nu =wa kë =va -kwe =plëézë -bha 'ka, kö n -yaannu -sü -mü 'aan- n 'tɛɛ pa, 'aan- -bhöpë -nu -bhö 'aan- müpë -nu mü =zuögludhi 'ka.»

²⁰'Kee -Zlan -ya -pö me 'ö 'dhö bhë -a -dhë: «Gɔɔn- 'ö 'yaa- 'wun dɔ =nɛ, gbeng -yi do 'ö =dɛɛ =nɛ -a 'gü =nɛ ü bha 'të -sü -yö -dho =gbaannu, =ya kë 'dhö pë -nu 'ü -an =waannu ü -bha 'ka =nɛ, dö 'yö dho to -a -gɔ -e?» »

21'Ö Yesu -ya pö 'zü -næ: «-Kɔ do 'ö -næ 'yö dho kë -a 'ka mæ 'yö ö -bha -bhɔɔpë -nu 'kpue- 'kpɔ -na yö gia- ö -bha 'ka ö -de -yö -bhɔɔzë -sü 'ka bhë -a 'ka, 'kæ kö -yö 'fæzë -Zlan wö 'dhiö.»

-Zo -yö -Zlan -bha -sü
(Matiö 6.25-34)

22=Dhe -ya kë 'dhö, 'ö Yesu -ya pö ö bha -guë' -nu -dhë: «-A -wun 'gü a- -pö ka -dhë: Kö -kun 'ka dɔ -bhöpë 'ka dhoë -bhö 'kaan- -tosiadhe kë -a -ta -a -wun -zɔnnŋ' -ta, 'iin sɔ -nu 'ka dhoë -da ka -bha -an -wun -zɔnnŋ' -ta 'pö, 23 bhii -kë -a 'gü -sü -wun -yö 'gbee- 'ö -zië' -bhöpë -wun -ta, 'ö kwa bun -wun 'dho 'gbee- 'ö -zië' sɔ 'ka dho -a -da ka -bha -a -wun -ta. 24 -Ka mua -nu -ga! 'Waa pë gbe ta -waan 'dho -a 'kan, 'ö -an -bha 'siödhe 'iin 'slëédhe gbe 'yaa -dhö, 'kæ -Zlan -yö -bhöpë -nu -an -dhë 'sa. Ka -wun -yö 'gbee- 'ö -zië' -ma -nu -ta! 25 Dö -mü ka ziën 'yö dho -mɔ -a -bha kö -yaan ö -de -bha yi -da 'dhiö -a -bha -dɔ -de -wun -zɔnnŋ' -ta -sü -wun 'gü i? 26=Dhe 'ö ka -kɔ gbe 'ka 'dho -mɔ pë 'sensen -nu 'wo -næ -an kë -sü -bha -næ, -më -kë 'ka dɔ ka -de -wun -zɔnnŋ' -ta pë -nu 'wo to -a -wun 'gü i? 27 -Ka 'lübin -kë -së -kɔ -nu -ga bhë 'dhe! 'Waa yuö gbe kë 'iin 'waa -yee' -zloo' -waan 'dho sɔ bɔ, 'kæ a- -pö ka -dhë ka gia-, ka Salomɔ 'ö -kë -gludë 'ka 'kpa bhë -a -bha -kë -bhɔɔzë -kɔ -wun -dɔ. -Yö -kë 'dhö 'kæ sɔ 'yö 'yan dho kë -së -næ 'lübin -nu 'wo -næ -an do 'dhö yaa kë -a -gɔ. 28 -Ya kë -næ 'lübin 'ö bhlö- lënnŋ -næ, -Zlan -yaa -kë -së, 'kæ kö -dhia' -wo -dho -a -güö, -më 'yö -kë ka -de 'pö yaa 'dho ö -zo kë ka buënpë -nu -wun 'piö 'pö e? Ka -bha -zo -yö -Zlan -bha -sü bhë, kë 'ö- wo 'tee bhë yö -mü! 29 Kö -kun 'ka dɔ pë 'ka dho -a -bhö waa- pë 'ka dho -a mü -a -wun -zɔnnŋ' -ta -an -mæ' -sü 'ka -kplawo, 'iin kö -kun 'ka ka -zo -ta pë gbe -wun 'gü, 30 bhii 'kpongtaame -nu 'ö 'waa -Zlan dɔ bhë -næ 'ö- -wun 'gü 'wo pë -nu bhë 'wo -an -mæ' -na -kplawo bhë. 'Kæ ka -zë ka Dë -ya -tei' -dɔ -næ pë -nu 'wo bhë ka -bha -wun -ya -bha. 31 'Wun -nu 'wo -gban -Zlan -bha, -kaa -an -mæ' 'dhiö -kun; -ya kë 'dhö, -yö -dho pë -nu 'wo to -an nu ka -dhë.»

=Bhɔɔpë -nu 'wo dhang- 'gü
(Matiö 6.19-21)

32'Ö- pö: «Ma -guézë -nu, 'kö -kë -næ ka 'tee 'dhee, kö -kun 'ö 'suö -yö ka -kë, bhii -yö -kë ka Dë -dhë -së kö 'ka kë -a -bha -gludëdhe 'gü -në -nu 'ka! 33 Ka -bha pë -nu 'wo ka -gɔ, -ka -an 'dhɔɔ dɔ, 'ka- -næɔ -nu nu 'fæmæ -nu -dhë. -Ka ka -bha -næɔ -da -a 'gü -pë -nu 'ö- 'gü 'yaa -siö' -a -yuö kë, 'ka ka -bha -næɔ -nu -da dhang- 'gü -dhe 'ö- 'gü -yö 'ka 'dho -siö' -gbædhö bhë -a 'gü, bhii -kwaanmæ gbe 'ka 'dho -wo 'ma 'iin 'lɔɔn -nu gbe 'yaa 'ma -yaan -a -siö'. 34 Bhii -dhe 'ö ü bha -næɔpë -nu 'dho -a -bha, 'ö ü -zuö' 'dhoë- -bha 'pö.»

Yuökëme -nu 'wo -ya wo 'yaan

35'Ö- pö: «-Ka -zo kë ka -de 'piö, 'ka ka -bha -du kwi dɔ sɔ -ta, 'ka ka -bha -labang dɔ! 36 -Ka kë -næ yuökëme -nu 'wo -ya wo -gɔmæ -gɔ -an

'dhö! 'Ö -ya kë -ne -an -gɔmɛ -ya 'go 'wlaan- -ta -ya nu yi 'oo yi 'ka, 'ö -ya 'kwɛɛ -ta -ma kö -waan 'to mü -waan 'kwɛɛ 'po -a -gɔ. ³⁷Zuögludhi -yö kë yuökême -nu 'ö -an -gɔmɛ -ya nu, 'ö dho -an yö -ya 'yaan -sü 'ka -an -gɔ! Bhii a- -pö ka -dhë 'wun gia- 'ka -an -gɔmɛ -yö -dho ö bha -du kwi dɔ sɔ -ta 'yö -yadhɛ nu -an -dhë kö -waan pɛ -bhö, 'yö -bhöpɛ nu -an -dhë. ³⁸'Ö -ya kë -ne -ya nu gbeng ziën 'iin 'töng gbe 'ka, -ya -an yö -ya 'yaan -sü 'ka, kö -zuögludhi -yö kë mɛ -nu 'wo 'dhö bhë -an -gɔ! ³⁹-Yö kë ka 'yaan -ne 'kɔdɛmɛ -yö -kwaanmɛ nu -yi -dɔ -bezë, yaa 'dho ö -kwaaw' -a -zü kö -yaan -da kɔɔ. ⁴⁰Kö ka -de 'pö, -ka ka -zo kë ka -de 'piö, bhii ma 'a Mɛgbö 'ka, n -yɛ 'zü -yi 'a dho nuë bhë 'kaa- dɔ!»

Yuökême -to -wo 'gü -sü -zë waa- yuökême 'ö 'yaa 'to ö -wo 'gü
(Matiö 24.45-51)

⁴¹-Dhɛ -ya kë 'dhö, Pɛɛ -ya -pö: «N Dɛmɛ, 'wun =zuan' 'ö -ne ü- -zɔn yi -de 'sloo yi -dhë, 'iin ü- -kë mɛ 'saadhö yi -dhë e?»

⁴²'Ö Dɛmɛ -ya -daa -kë -a -gɔ 'ö- pö: «Yuökême 'ö to ö -wo -ta 'yö 'wun dɔ, 'ö tɔɔ mɛ 'ö- -gɔmɛ 'dho 'wun 'plɛ -lo -na -a kwɛɛ kö mɛ -nu 'wo to -yaan -an -bha -bhöpɛ nu -an -dhë 'töng 'wo dho -bhöpɛ =bhöë' -a 'ka bhë. ⁴³-Zuögludhi -yö kë yuökême 'ö- -gɔmɛ -yɛ 'zü 'töng 'ka -yaan nu ö =plöö 'yö dho -a yö yuö -nu 'yö- nu -a -dhë bhë -a 'dhiö bhë -a -gɔ. ⁴⁴A- -pö ka -dhë 'wun gia- 'ka: -A -gɔmɛ -yö -dho ö bha pɛ -nu 'saadhö -a 'kluën bho -a -bha. ⁴⁵'Kɛɛ -ya kë -ne yuökême 'ö 'dhö bhë -yaa- pö ö -de 'gü -nɛɛ: «N -gɔmɛ 'yaa nu -na 'siö-, 'ö -ya -ya yuökêgɔɔn -nu 'iin yuökêdhoo -nu mɛ 'wo to -an -ma -sü 'gü, 'ö -ya ö -de nu pɛ -bhö -sü waa- -drɔɔn 'yi mü -sü -an -dhë, ⁴⁶-a -gɔmɛ -dho nu yi 'ö 'yaa- dɔ 'iin 'lɛlɛ 'yaa- dɔ 'pö -a 'ka. -Yö -dho yuökême 'ö bhë -a 'klo bho 'gbee- 'ka, 'yö- -kë 'yö dho mɛ -nu 'ö 'waa -Zlan -bha mɛ 'ka -an 'piö.

⁴⁷Yuökême 'ö pɛ 'yö- -gɔmɛ 'dho -a 'piö 'yö- dɔ, 'kɛɛ 'ö 'yaa- 'piö kö 'yö -an kë bhë, -a 'klo -dho bho -klaa -yan =plëézë -sü -a -bha -sü 'ka, ⁴⁸'Ö =zië' yuökême 'ö pɛ 'ö- -gɔmɛ 'dho- 'piö 'yaa- dɔ, 'kɛɛ 'ö 'wun -nu 'ö 'waa -së 'ö -an -kë, 'ö- -bha -klaa -yan -dho kë 'tee bhë -a -ta. Mɛ 'ö 'wo pɛ nu -a -dhë =va -nɛ, 'wo dho pɛ -dhɛ -a -gɔ 'pö =va. 'Ö mɛ 'wo pɛ 'kluën bho -a -bha =va, 'wo dho -a -dhɛ -a -gɔ =va 'zü!»

Yesu -yö -kë 'gügludhe 'ö dho -da mɛ -nu ziën bhë -a -bɔa -ta 'ka
(Matiö 10.34-36)

⁴⁹'Yö- pö 'zü: «A -nu 'siö -da =dhia 'kpongtaa. -Më 'kpaan 'ö dho kë n -dhë -së -yaan zië -a -bha 'kun -sü -ta -ɛ! ⁵⁰'Kɛɛ 'dhiö -blëézë a -dho bɔ 'yënnghɔdhe 'gü; n =zuö' -ya -da -dewo -a 'yena 'gü -yaan 'dho -yaan yöë -a 'dhiö -mɔ 'kuë -yi -bha! ⁵¹-Yö -kë ka -zo 'piö -nɛ a -nu =zuöyagluu nu =dhia 'kpongtaame -nu -dhë -a? A- -pö ka -dhë: -Abi!, 'kɛɛ 'gügludhe -da ka ziën -sü -mü =zian!, bhii 'ö tɔɔ mɛ 'bhaa -nu -wo -dho we n -wun -bha, 'ö -an 'bhaa -nu

-wo -ko n -wun 'ka. ⁵²-Dæ -ne -a 'gü zlöö, 'gügludhe -yö -dho -da 'ko do 'gü -me -nu 'wo wo 'kuëdhö 'söodhu -an ziën; me -yaaga -wo -dho -trö me -ple -bha, 'ö me -ple -wo -ya me -yaaga -bha. ⁵³'Nëdë -dho do ö bha 'në -go 'yënnng, 'ö 'në -de 'pö 'yö do ö dë -go 'yënnng; 'ö dhe dho do ö 'dhu -go 'yënnng, 'ö- 'dhu -de 'pö 'yö dho do ö dhe -go 'yënnng. 'Në göön- dhe -dho do ö bha 'në böö -go 'yënnng, 'ö 'në böö -de 'pö 'yö do 'në göön- dhe -go 'yënnng.»

-Duakëpë -nu do -sü

(Matiö 16.2-3)

⁵⁴Yesu -ya -pö 'zü me gbung 'wo -kë mü -an -dhë: «'Së 'ö -ne -a 'gü, -ya kë -ne dha -ya nu lan- -püö =zian', 'ö 'ka to mü 'ka- pö dha 'dhoë- ban; -ya kë 'ö- -de -kë. ⁵⁵'Ö 'ka- ma -ne 'tëë -yö -piö -na lan- 'sian 'piö -kwëë- 'gü =zian', 'ka- pö 'siö 'dhoë- do, -ya kë 'ö- -de -kë. ⁵⁶'Ö, me 'yan -ta -wun kë -me -nu! Ka -ko -yö -mo -a -bha 'ka =duakëpë -nu 'wo dho kë sia- 'iin dhang- 'gü -an do; -dhe -ya kë 'dhö, -më 'yö- -kë 'wun -nu 'wo -dæ -ne -a 'gü bhë 'ö 'kaa- -gen kpinngdhö do =ë?

Dhidhe 'ü dho -a -mëë' kaa- ü yaagüme ka ziën

(Matiö 5.25-26)

⁵⁷-Më -kë ka gia- 'kaa 'wun 'ö kpengdhö -a -bho 'kou do -nëë? ⁵⁸-Ya kë -ne me -ya 'wun do ü -bha, 'ka 'dho -na zakanme -nu 'dhiö, -bhöë këdhe -mëë' ka -wo -yö -mo 'kuë kö ka -tun zian -ta; -yö -kë 'dhö kö -kun 'ö dho ü do zakanme -nu kwëë, kö zakanme -nu -de 'pö -waan ü do 'dhasi -nu kwëë, kö 'dhasi -nu -de 'pö -waan ü -zuö -kanso 'gü. ⁵⁹A- -pö ü -dhë -nëë: 'Ü'ka 'dho go -kanso 'köödhö -a 'ke ü 'ka -su ga 'pë 'ö to ü -bha bhë -a 'dhiö 'to nu -a 'ka!»

-Ka ka -ta yö ka wo -ko yaa -bha 'ka -sië'- -Zlan 'piö

13 ¹Töng 'ö 'dhö bhë -a 'ka, me 'bhaa -nu -wo -nu Yesu 'piö, 'wo- pö -a -dhë: «Pilatö -yö Galile -me 'bhaa -nu -zë 'töng 'ö 'wo sla- bhoë -Zlan -dhë bhë -a 'ka!» ²'Ö Yesu -ya -daa -kë -an -go 'ö- pö: «-Yö -kë ka 'gü -ne me -nu 'wo Galile 'wo -an zë bhë, -an -bha -söön yaa -yö -va 'ö -zië' Galile -me -nu me 'wo to bhë -an -ta, 'ö- -wun 'gü 'ö 'klobhódhe -suu'- bhë 'ö nu -an -ta -a? ³A- -pö ka -dhë: -Abi', 'këë -ya kë -ne kaa ka -bha -kë -a 'gü -sü -dhië' -kwaa, ka 'ple ka -dho ga 'töüdhö -ne -an 'dhö! ⁴'Iin -dhe 'ka- -ga -a 'gü 'sengdhö bhë, me -lü 'göo- do ö ga 'sleaga 'ö böü- 'kplong 'ö Siloe 'ö -an zë 'töng 'ö -loë' -a 'ka bhë 'wun -bha -to -an tuö -sü bhë, -yö -gbaönsü 'yö =zië' me -nu me 'wo to 'wo Zeluzalemë bhë -an -ta -wun -mü -a? ⁵A- -pö ka -dhë: -Abi', 'këë kaa ka -bha -kë -a 'gü -sü -dhië' -kwaa, ka 'ple ka -dho ga -ne -an 'dhö 'pö 'töüdhö!»

'Wun =zuan' 'yö -gban figö -lü 'ö 'wo- ta 'ö- -yö

-a -bha -pë gbë 'yaa 'dhö bhë -a -bha

⁶'Go mü, Yesu -yö 'wun -blëë -an -dhë 'wun =zuan' 'ka 'ö- pö: «Me do -yö 'ö -bha figö -lü do -ta 'ö -bha læzen -dhëëdhö; 'yö nu -kpöo -a bhe -wun 'gü

-dhia, 'kɛɛ yaa- bhe gbe yö -a tuö. ⁷'Yö- pö yuö -kë -a 'gü -mɛ -dhë: «-Bhö -dhe -ga 'dhe! Figö -lü 'ö =ne, =dhe 'a yö -kpɔɔ -a bhe -wun 'gü -sü -bha, -a -kwe kë -yaaga; 'kɛɛ n 'ka- bhe gbe yö -a tuö do. -Bhöë 'kan! -Më 'bhaa 'yö- kë -na -dhe 'ö dɔ -a -bha =ne -a -bha -kplawo bhë =ɛ?» ⁸'Yö yuö -kë -a 'gü -mɛ -ya pö: «N -Gɔmɛ, -bhö ü =kwaa' -a -zü -kwe me 'ö =ne -yö ziö, a -dho 'sɛ pɔn 'a -nië -a 'ka -a -zü 'a 'dunng -lo -a 'piö. ⁹'Ya kë 'dhö 'ma -dhe -ga, -kwe me 'ö 'dhoë- kë =kwea, -yö -dho ö bhe -ya, 'ö =ya kë =ne yaa bha, to 'a- =kaan.» »

Yesu -yö dhebo do 'ö- 'tɔ- -siö, -a -dhe -bo Zuifö -nu -bha -glooyi 'ka

¹⁰Zuifö -nu -bha =glooyi do 'ka, Yesu -yö -kë mɛ -nu =daan' =dhia -an -bha -bhɔkuëkɔ do 'gü. ¹¹Dhebo do 'ö- 'tɔ- -siö -zuu yaa =kwaa', 'ö- -kwe =ya kë 'gɔɔ- do ö ga 'slɛaga, 'ö 'yaa -dɔ zɛnngdhö -dhe yö -yö -kë mü.

¹²⁻¹³=Dhe 'ö Yesu -ya yö, 'yö- =dhɔɔ -kë 'yö ö -kɔ -lo -a tuö -a pö -sü 'ka =nɛɛ: «Dhebo, ü 'tɔsiödhe =ya bo!» -Dhe do bhë 'wo to -a -bha, 'yö -po zɛnngdhö, 'yö yö 'tan -bho -Zlan 'tɔ 'piö -sü -bha. ¹⁴'Kɛɛ Zuifö -nu -bha -bhɔkuëkɔ -gɔmɛ bhë, 'wun bhë yaa kë -a -dhë -së 'ö bhii kö Yesu =ya me -dhe bo 'ö- wo wo -bha =glooyi 'ka bhë. 'Yö- pö mɛ gbung 'wo -kë mü bhë -an -dhë: «-Dhekpɔɔyi 'slado =ne 'ö tɔɔ yuö kë -yi, -ka nu -a -bha kö -waan ka -dhe bo, kö =kun 'ka nu =glooyi 'ka!»

¹⁵'Ö Dëme -ya -daa -kë -a -gɔ 'ö- pö: «Mɛ 'yan -ta -wun kë -mɛ -nu 'ka =nɛ! =Glooyi 'ka, ka ka -bha -du -nu 'iin =soofang -nu -po 'ka dho -an 'ka 'yi mü -dhia! ¹⁶'Yö =dhe 'ö 'dhö =ne, -më -kë 'ö dhebo 'ö Ablaamö =suu' -ta -në 'ka 'ö Satan -ya -lö 'ö -kwe =ya kë 'gɔɔ- do ö ga 'slɛaga =ne, 'yaa -së kö 'a -bhüö' 'wo -löë' bhë -a 'po =glooyi 'ka ɛ?»

¹⁷-A -daa 'ö Yesu -ya -kë bhë, -yö lë- -kpɔ -dɔ -a -gɔ 'yɛnng -mɛ -nu 'wo bhë -an -ta; 'ö mɛ gbung 'wo -kë mü bhë 'yö -an -zuö' 'glu -yö dhi 'wun -sɛɛbo -nu 'ö -an kë bhë -a -wun 'gü.

'Wun =zuan' 'ö -gban mutaadö ga -bha

(Matiö 13.31-32; Maakö 4.30-32)

¹⁸Yesu -dho 'dhiö ö bha mɛ =daan' -sü 'ka, 'ö- pö: «-Më 'ö -Zlan -bha -gludëdhe -yö bhɔ -a -bha -ɛ? 'Iin -më 'a dho -a -zuan' =ɛ? ¹⁹-Yö -kë =ne mutaadö 'ö bhɔ =kplɔɔ' ga -bha, 'ö mɛ do -ya -da 'sɛidhö ö bha pë ta -dhiadhö -a 'dhö; 'yö bhɔ, 'ö =kpɛa 'ö -ma -nu -wo wo 'kɔ dɔ -a -kɔ -nu -ta, -a -bha kë =va -sü -wun 'gü.»

'Wun =zuan' -yö -gban =bluubhɛɛpë -bha

(Matiö 13.33)

²⁰Yesu -ya -pö 'zü =nɛɛ: «-Më 'a dho -Zlan -bha -gludëdhe -wun -zɔn -a 'ka ɛ? ²¹A -dho -a -zɔn =bluubhɛɛpë 'ö dhebo do 'dho -a -da -na 'bluubi 'kilong 'gɔɔ- =plɛ ö ga 'sɔɔdhu 'piö 'ö =yaa- 'yi bho 'ö -da -na bhë -a 'ka.»

'Kodhi 'sɔɔsɔ
(Matiö 7.13-14; 7.21-23)

²²Yesu -yö -bɔ pödhe =vava -nu waa- pödhe 'sɛɛn- -nu -an 'gü me -nu -daan- 'sü 'ka, 'ö dhoë Zeluzalemë =zian'. ²³Yö me do -ya -dhe'e' kpɔ -nɛɛ: «N -Gɔmɛ, mɛ -nu 'wo dho dhasü yö bhë, -wo 'teete -a?» 'Ö Yesu -ya -daa -kë -a -gɔ 'ö- pö: ²⁴«-Ka ka 'gü dɔ ka -de -gɔ 'gbee- 'ka -da kɔɔ 'kodhi 'sɔɔsɔ -bha, bhii a- -pö ka -dhë medhevadhe -wo -dho -a kë -dhë =mɛɛ', 'kɛɛ wo 'ka 'dho -mɔ -a -bha.

²⁵'Kɛɛ =ya kë =nɛ 'kɔ dɛmɛ =ya ö bha 'kodhi ta =lakele 'ka, ka -zë ka -dho to plaan 'ö 'ka yö 'kwɛɛ -ta -ma -sü 'gü -a pö -sü 'ka =nɛɛ: «Yi Dɛmɛ, -bhö 'kwɛɛ 'po yi -gɔ!» 'Kɛɛ -yö -dhoë pö ka -dhë: «Maa ka dɔ!» ²⁶Ya kë 'dhö ka -dho -a pö -a -dhë: «Kwa pë -bhö 'kwa müpë -nu mü kwa 'ko =bhaa, 'ö 'ü yi =daan -kpinngga -nu 'piö yi -gɔ pödhe -nu -bha!» ²⁷-Yö -dhoë pö ka -dhë 'zü =nɛɛ: «A- -pö ka -dhë 'maa ka dɔ; -ka bhɔ n -dhë =taa!» 'Wunyaakɛmɛ -nu -mü ka 'ka!» ²⁸'Ö yi 'ka dho Ablaamö 'dhö, Izaakö 'dhö, Zaköbö 'dhö waa- -Zlan -wodhiölomɛ -nu 'töüdhö 'wo -Zlan -bha -gludödhe -pö 'gü -an yö, ka -zë ka -dho =zong plaan, 'ö -dhe bhë -a -bha 'ka 'gbo -nu bɔ 'ka ka 'sɔn -nu -bhö mü. ²⁹Mɛ -nu -wo -dho go -dhe 'saadhö 'gü 'kpongtaa, 'ö 'wo -yadhe sü -Zlan 'piö -dhe -bha. ³⁰-Kaa dɔa =nɛ mɛ 'bhaa -nu 'wo =dɛɛ =nɛ -a 'gü 'wo zlöö bhë 'wo dho kë mɛ -blɛɛzë 'ka, 'ö mɛ 'bhaa -nu 'wo =dɛɛ =nɛ -a 'gü 'wo mɛ -blɛɛzë 'ka bhë, 'wo dho kë -tozlöömɛ 'ka.»

Yesu -yö Zeluzalemë -wo -kpɔ
(Matiö 23.37-39)

³¹'Töng 'dhö bhë -a 'ka, Falizi -mɛ 'bhaa -nu -wo =yɔɔn Yesu -bha, 'wo -pö -a -dhë: «-Bhö 'go zö 'ü 'dho -dhe gbɛ 'gü, bhii 'ö tɔɔ Elɔdö -ya 'piö kö 'yö ü zë!» ³²'Ö Yesu -ya -daa -kë -an -gɔ 'ö- pö: «-Ka 'dho 'ka- pö 'slëkanme -gɔmɛ bhë -a -dhë: A -zuu yaa bho -na mɛ -nu 'gü, a 'wun -yö 'ko 'dhiö -sü -zë kë -na mɛ -nu -dhe bo -sü 'ka =dɛɛ waa- =dhia', 'ö- -dhekpɔyi kë -yaaga -naa 'ka bhë 'a dho ma yuö 'dhiö to -a 'ka. ³³-Yö -kë -kɔ 'oo -kɔ -ta, a -dho -da zian -ta =dɛɛ waa- =dhia' 'ö dho 'ö yöë -dhekpɔyi mɛ 'ö yö -a 'piö -a -bha. Bhii 'yaa -së kö -wo -Zlan -wodhiölomɛ zë -dhe gbɛ 'gü -a 'ke yaa kë Zeluzalemë plöö -dhe -bha.»

³⁴-Dhe =ya kë 'dhö, 'ö- pö: «Zeluzalemë -mɛ -nu, Zeluzalemë -mɛ -nu, ka 'ka -Zlan -wodhiölomɛ -nu zë, 'ka mɛ -nu 'ö -Zlan -yö -an bɔ ka -dhë 'ka -an zë -an -zuö -guö 'ka -sü 'ka =nɛ, -a -gwaa =ya kë =plëézë, 'ö 'ma- kë kö 'aan- ka =kpaakpa 'kuë- =nɛ -kɔ 'ö -tɔ mu 'dhö ö 'në -nu =kpaakpa -na 'ka 'kuë- ö gban =löö bhë -a 'dhö! 'Kɛɛ kaa 'we -a -bha!» ³⁵=Dhe 'ö 'dhö, -Zlan -dho ö =kwaa' ka -bha 'kɔ -nu -wun -zü zlöö ö 'plɛ 'ka. 'Kɛɛ -yö kë ka 'yaan =nɛ kaa 'dho n yö gbɔ 'ö dho 'ö yöë yi 'ka -dho -a pö -a 'ka =nɛɛ: «-Zlan -yö 'dhuë- 'kpɔ mɛ 'ö 'dhoë- nu -a 'tɔ 'gü -a -bha!» »

Yesu -yö 'yuame do -dhe -bo

14 ¹Zuifö -nu -bha -glooyi 'ka, Yesu -yö -da Falizi -me -nu -gome do -gɔ kɔɔ kö -waan pë -bhö. Me -nu 'wo -kë kɔɔ -an 'yan -yö to -a 'piö. ²Yö me do 'ö -bhla -yua' -ya -kë, 'yö -kë Yesu 'dhiö mü. ³Ö Yesu -yö tonggome -nu waa- Falizi -me -nu 'wo -kë mü bhë -an -dhe'e' kpɔ 'ö- pö: «Kwa -bha tong -ya 'piö kö 'kwa me -dhe bo -glooyi 'ka i, 'iin -dhë -ε?»

⁴Kee -an 'dhi -yö -kun 'ö waa 'we -a -bha -waan -a -daa kë -a -gɔ. =Dhe -ya kë 'dhö, Yesu -yö 'yuame bhë -a -bha 'yua -bo 'ö- pö -a -dhë -yö 'dho. ⁵=Dhe -ya kë 'dhö, 'yö- pö -an -dhë: «Ö -ya kë =ne ka ziën zö, me do -bha 'në 'iin -a -bha -du -ya -püö -klɔng -glu 'gü -glooyi 'ka, yaa 'dho -a gan mü =a?»

⁶Me gbe -kɔ yaa -mɔ -a -bha kö -dhe'e' 'yö- kpɔ bhë -yaan -a -daa kë -a -gɔ.

-Kë 'wlaan- -ta -sü

⁷=Dhe -ya kë 'dhö, me -nu -wo -nu pë -bhö -dhia. Me -nu 'wo -an -dhɔɔ -kë 'wlaan- -ta bhë, -an -bha -yadhe -sɛɛbɔ 'sü -kɔ bhë, Yesu 'yan- -to -a 'piö. 'Yö- pö me -nu 'wo -kë mü 'töüdhö bhë -an -dhë 'wun -zuan' 'ka =ne: ⁸«Me -ya ü -dhe dhe 'sü 'wlaan- -ta, kö -kun 'ü dho 'ü -ya -yadhe -së -bha, bhii -ya kë =ne me do 'bhaa 'ö- 'tɔ 'dhö -a -bha 'ö =zië' ü -ta, =waa- -dhɔɔ kë 'pö, -ya nu ⁹kö me 'ö ka -dhɔɔ -kë bhë -ya pö ü -dhë: «-Bhö -luu' -'ü 'go me =ne -a -gɔ -gbloo 'gü, -yö -ya mü, bhi -zë 'dho 'ü -yaannu zlöö -de!» -Ya kë 'dhö kö lë- -ya 'kpɔ ü -ta. ¹⁰-Ya kë =ne =wa ü -dhɔɔ kë 'wlaan- -ta, -bhö 'dho 'ü -ya -yadhe me 'ö zlöö -a -bha. -Ya kë =ne me 'ö ü -dhɔɔ -kë bhë -ya nu -yaa- pö ü -dhë: «N 'bha, -bhö nu dhuö 'nö 'ü -ya -yadhe -së -dhe -bha!» -Ya kë 'dhö -yö -dho kë ü -bhlë 'kpɔ -wun -va 'ka, me -nu 'wo 'dhoë- kë ü 'piö pë -bhö -a -ta -gba -ta bhë -an -dhë. ¹¹Bhii me 'oo me 'ö ö -de -luu', -yö -dho dho sia-; 'ö me 'yö 'dhoë- ö -de -yɔɔɔn sia-, 'ö dho -luu' 'dhuu.»

¹²'Go mü 'ö Yesu -ya pö me me -dhɔɔ -kë bhë -a -dhë: «Bha me -nu -dhɔɔ kë kö 'kaan- pë -nu -bhö ka 'ko -bhaa, kö -kun 'ü ü 'bhamé -nu, ü dheglu 'në gɔɔn- -nu, me ka -nu 'ka -mɛɛzë -nu 'iin ü dɔme =bhɔɔzë -nu gbe -dhɔɔ -kë, bhii wo -de 'pö -wo -dho ü -dhɔɔ kë 'pö; -ya kë 'dhö kö 'wun -së 'ü- -kë bhë -wa ü -bha -ye 'zü kë. ¹³'Kee ü 'dhoë- me -dhɔɔ kë ü bha 'wlaan- -ta, -bhö 'yename -nu, 'tɔsiöme -nu, 'yënnngtiime -nu -an -dhɔɔ kë. ¹⁴Ü =zuö' 'glu -dho dhi, bhii 'ö tɔɔ waa 'dho -mɔ -a -bha kö -waan ü -bha -ye 'zü kë, 'kee ü -bha -ye 'zü -yö -dho kë yi 'ö me -nu 'wo kpengdhö 'wo dho goë ga 'gü bhë -a 'ka.»

'Wun -zuan' 'yö -gban 'wlaan- -va -bha

(Matiö 22.1-10)

¹⁵=Dhe 'ö 'wun -nu 'wo =ne =wa bhɔ -a ma -sü -bha, me -nu 'wo -kë pë -bhö -dhia bhë 'ö- me do -ya pö Yesu -dhë: «'Gludhi -yö kë me 'ö 'dhoë- -bhöpë -bhö -Zlan -bha -gludëdhe -pö 'gü bhë -a -gɔ!»

16'Ö Yesu -ya pö -a -dhë: «Me do -yö ö bha 'wlaan- =va -yi -da 'dhuu, 'yö me -nu -dhɔɔ -kë -va 'ka kö -waan nu -a -ta. 17-Dhe 'ö pë -bhö 'töng -ya -lo, 'yö ö bha yuökëme bɔ me -nu 'yö -an -dhɔɔ -kë bhë -an 'piö kö -ya pö -an -dhë: «N -gɔme -ya -pö 'ka nu, bhii pë 'ple 'dhiö -ya -mɔ 'kuè!» 18'Ö me 'ö -dhö 'yö- pö -nɛɛ: «A -bha 'gën -mü, n 'ka nu gbɔ.» 'Ö- me -blæzë -ya pö bɔme bhë -a -dhë: «Ma ma -bhlöödhe do 'dho, a -dho dho -wo mü -dhia, -bhea'- 'a- wo -a -dhë -yö 'dho ö 'dhiö!» 19'Ö- me do -ya pö 'zü: «Ma ma -du 'gɔɔ- do 'dho, a 'dho -na yuö kë -kɔ -ga -dhia, -yö 'dho ö 'dhiö!» 20'Ö me do 'bhaa -ya pö 'zü: «A -go ma dhe 'sü -dhia 'piöklöözë =nɛ; =dhe -kë 'dhö n 'ka 'dho nu, -yö 'dho ö 'dhiö!» 21'Ö bɔme -yö -yɛ ö 'zü, 'yö nu -a -yɛ 'zü 'ka ö -gɔme -dhia. 'Ö 'wun -yö na -gɔme -zuè, 'ö- pö ö bha yuökëme bhë -a -dhë: «Bhö 'dho 'siösiö 'dhɔɔkuédhe -nu, plöö -kpinng 'piö -dhe -nu -bha, 'ü nu 'yename -nu, 'tsiöme -nu, 'yënnngtiime -nu -an 'ka!»

22=Dhe 'ö 'töng 'bhe 'tee -ya zió, 'ö- -bha yuökëme -yö nu 'yö- pö -a -dhë: «N -Gɔme, -wo 'ü- pö bhë, -a 'ple -ya kë, 'kɛɛ -yadhe 'bhaa -yö -tun -dhö.»

23'Ö- -gɔme -ya pö 'zü ö bha yuökëme -dhë: «Bhö 'yɛ ü 'zü, 'ü 'dho zian -gbloo -nu 'piö, bhlö- -gbaa -nu 'gü; me 'oo me 'ü 'dhoè- -a yö, -bhö -gban -a -bha -naazë 'ka -yö nu. -Yö -kë 'dhö kö -yadhe me 'wo to bhë -waan pa. 24A- -pö ka -dhë: Me -nu 'a -an -dhɔɔ -kë 'dhiö bhë, -a me gbe yaa 'dho ma -bhöpë 'ö =nɛ -a -bhö gbɔ.» »

Pë Yesu -ya pö ö bha -guè' -nu -dhë -wa kë
(Matiö 10.37-38)

25Me -gbaa =va -wo -kë -ziö Yesu 'piö -dhia. 'Yö Yesu -yö -dhië ö -zü 'yö- pö -an -dhë: 26«Me 'ö nu n 'piö 'ö -ya ö dë 'dhö, ö dhe 'dhö, ö bɔɔ 'dhö, ö bha 'nè -nu 'dhö, ö dheglu 'nè gɔɔn- -nu, 'nédhoo -nu 'dhö, ö -de -wun gia- 'dhö -an -dho kë -yaan zió n -wun -ta, kö yaa 'dho kë ma -guè' 'ka. 27Me 'ö yaa ö bha -gaatalü 'sü, -yaan zió n 'piö, kö yaa 'dho kë ma -guè' 'ka. 28Bhii -ya kë -nɛ me do -yö -dhö ka zién, 'yö dho ö bha 'kɔ =va do dɔ, -yö -dho -yaannu poo -kun 'yö ö -zo -ta -a -sɔnnng' -yö 'ko 'dhiö -sü 'ka; 'ö -ya kë -nɛ -ya -dhe -ga -a 'gü 'sengdhö 'wëü- -ya kë -a -gɔ -va kö -yaan yuö 'ö bhë -a 'dhiö 'to, 'ö- yuö zü dɔ. 29'Yaa 'dhö -yö -dho 'kɔ zü -luu-', 'ö- -kɔ yaa 'dho -mɔ -a -bha kö -yaan -a böü- 'kplong -luu'- .-Ya kë 'dhö me -nu -wo -dho wo 'dhi -sü -a 'gü 'wo- pö: 30«N n, gɔɔn- 'ö -nɛ 'kɔ 'ö- zü dɔ bhë -a -kɔ yaa -mɔ -a 'dhiö 'to -sü -bha gbɔ!»

31-Kɔ do bhë -a 'ka, -gludë -yö 'dhoè- dho -glu gɔn -dhia ö 'bha -gludë 'ka, -yö -yaannu 'yö ö -zo -ta kö -yö -dho -mɔ -a -bha kö waa- ö bha me -lü -vuu 'gɔɔ- do 'wo bhë -wo -dho -mɔ -a -bha kö 'waan- 'ko zë ö yaagüme 'ö nu -na ö -gɔ 'pö me -lü -vuu 'gɔɔ- =plɛ 'ka bhë -an 'ka -a -wun 'gü. 32'Ö -ya kë -nɛ yaa 'dho -mɔ -a -bha, 'yö me -nu bɔ -gludë me 'ö nu -na -a -gɔ bhë -a -dhë kö -yö -tun 'ma -gbiin; -yö kë 'dhö, kö 'yö dhidhe =mɛɛ'- -a 'piö.»

33'Ö Yesu -yö ö -wo -zuö -a -ta dhe -kë, 'ö- pö: «'Yö 'dhö -kɔ do bhë -a 'ka 'dhö: Me gbe yaa 'dho kë -dhö ka zién -yaan kë ma -guè' 'ka -a 'ke yaa ö -kwaal' pë -nu 'ö- -wun 'dho -a -gɔ 'gbee- -a -wun -zü.»

Kweezö 'ö- 'kun -pë gbe 'yaa 'dhö gbo
(Matiö 5.13; Maakö 9.50)

³⁴'Ö Yesu -ya pö 'zü: «Kweezö -yö pë do -së 'ka, 'këe -ya kë -ne -a din -ya 'go -a -bha kö -a këdhe yaa 'dho kë -dhö kö -yö kë -së gbo. ³⁵Wo 'ka 'dho -a -pen sia- 'püë- wo poo kö -yaan kë pëdhipë 'ka, 'këe -a -zong' 'wo dho -a wo 'kpaan 'ka. -Ka ka 'to 'to, 'ö -ya kë -ne ka 'wun ma -to -yö -dhö kö 'kaan- -a -gen d!»

'Wun -zuan' 'ö -gban 'bhla 'yö -dhong -a -bha
(Matiö 18.12-14)

15 ¹'Nii- =sɔŋŋ' 'kun -me -nu waa- me -nu 'ö -an 'tɔ -ya -siö', -wo -yɔɔŋ Yesu -bha kö 'waan- wo 'to 'to -a -wo -bha. ²-Dhe bhë -a -bha Falizi -me -nu waa- tɔŋgɔme -nu -wo 'wun =blɛɛ wo -wo -löö 'wo- pö: «Gɔɔŋ- 'ö =ne -yö 'wunyaakëme -nu 'yi -kan, 'ö wo -nu 'wo pë -bhö wo 'ko =bhaa.»

³'Ö Yesu -yö 'wun =blɛɛ -an -dhë 'wun =zuan' 'ka 'ö- pö: ⁴«Me do -ya kë -dhö ka ziën 'ö 'bhla =këŋg' do -ya kë -a -gɔ, 'ö- do -ya =dhong -an ziën, yaa 'dho -a 'gɔɔ- 'seisië ö ga 'seisië 'wo bhë -an to -an këdhe -bha -yaan 'dho -a do 'ö =dhong bhë -a =mɛɛ' -dhia -yaan 'dho -yaan -a yö =a? ⁵-Ya kë =ne =yaa- yö, =zuögludhi -yö -kë -a -gɔ, -ya kë 'dhö, 'ö 'bhla bhë 'yö -da ö -gban -ta, ⁶'yö nuë ö -gɔ kɔɔ, 'yö ö 'bhamɛ -nu, ö dɔme -nu -dhɔɔ -kë 'yö- pö -an -dhë: <-Kwa =zuö' 'glu -yö dhi, bhii 'ö tɔɔ ma 'bhla 'ö -dhong bhë 'ma- yö!> ⁷-Kɔ do bhë -a 'ka, a- -pö ka -dhë: =Zuögludhi -yö -dho kë dhang- 'gü me do 'yö 'dhoë- go ö bha =sɔɔŋ yaa 'gü -a -bha 'ka 'ö -ziö me -lü 'gɔɔ- 'seisië ö ga 'seisië 'wo wo -de -sü kpengdhö 'ö 'waa wo -bha -kë -a 'gü -sü -dhië' -Zlan 'piö bhë -an -ta!»

'Wëü- 'yö -dhong 'go mü 'ö yö

⁸'Ö- pö: «'Go mü 'zü -ya kë -ne dheɔ do -ya ö bha 'wëü- 'tama 'gɔɔ- do =waannu, 'ö- do -ya =dhong, -yö -dho -labang dɔ 'yö -dhe -go 'kɔɔbhongtodhe -nu 'plɛ -bha 'ö- =mɛɛ =naazë 'ka, 'yö dho 'ö- yö. ⁹-Ya kë =ne =yaa- yö, 'yö ö 'bhamɛ -nu, ö dɔme -nu -dhɔɔ -kë 'ö- pö -an -dhë: <Kwa =zuö' 'glu -yö dhi, bhii 'ö tɔɔ ma 'wëü- 'tama ga 'yö -dhong bhë, 'ma- yö!> ¹⁰-Kɔ do bhë -a 'ka, a- -pö ka -dhë: =Zuögludhi -yö -dho kë -Zlan -bha bɔmɛ -nu -gɔ, me do 'kpaan 'yö 'dhoë- go ö bha =sɔɔŋ yaa -nu 'gü bhë -a -wun 'gü!»

'Në dho 'sɛ 'piö

¹¹'Ö Yesu -ya pö 'zü -an -dhë: «Me do -yö -kë -dhö, 'ö- -bha 'në -nu =plɛ -wo -kë -dhö. ¹²'Ö- 'teezë -ya pö ö dë -dhë: <N dë, pë -nu 'ü dho -a nu n -dhë 'dhiö =zian' bhë, -bhö -an nu n -dhë -klöödhö!> 'ö -an dë -yö pë 'ö- -bha pë 'ka bhë 'yö- -glu ö bha 'në -nu -peedë 'wo bhë -an 'ka. ¹³-Dhe

'töng pë 'bhle -ya ziö, 'ö- 'teezë -yö ö bha pë -nu 'wo bhë 'yö -an 'ple sü, 'yö dho -a 'ka 'sego -gbiin gbe 'gü. 'Se bhë -a 'gü 'yö -ya -nao 'ö bhë -a 'gü -siö' -sü -bha 'wun yaya -nu 'gü. ¹⁴Dhe pë -nu 'wo- -go -yaa- 'ple 'gü -siö' 'töüdhö, 'ö din -yö -da 'sego 'ö bhë -a 'gü, 'ö pë -wun -saan -yö yö -a kè -sü -bha. ¹⁵'Ö dho 'ö -da yuö 'gü 'se bhë -a 'gü mi do 'piö, 'ö 'wo- bɔ -bhlöö- kö -yaa- -bhotii -nu -maa kè. ¹⁶-Ya -dho -kè -a 'ka kö -bhöpë -nu 'wo- nu -na -a 'ka -bhotii -nu -dhia bhë kö -waan ö -bha nu, 'keë me gbe 'yaa- nu -a -dhë. ¹⁷Dhe -kè 'dhö, 'ö -ya ö -zo 'ta -sü -bha ö -de kè -ko -wun 'gü, 'yö- pö ö =zuö' 'piö =nɛ: <-Bhöpë -yö n dë -bha yuökëme -nu -go =va, 'ö 'waa- 'ple -bhö, 'ö ma 'pö 'a 'dhoë- ga din -dhë zö 'kpaan =ne! ¹⁸A -dho dho n dë 'piö kö 'a- pö -a -dhë =nɛ: N dë, 'ma -sɔɔn yaa kè -Zlan 'ka, 'go mü, 'ma- kè ü 'ka, ¹⁹yaa n -ma 'kun gbɔ kö 'üën- n -dhe ü bha 'në, -bhö n 'sü zlöö =ne ü bha yuökëme do 'dhö! ²⁰Dhe -ya ö -zo 'ta 'dhö, 'ö -luu 'ö dho ö dë 'piö.

-Yö -to =gbiin, 'ö- dë -ya yö, 'ö- 'yena -yö -da -a 'gü, 'yö dho -a -go zian- -bla 'ka 'ö wü -a -bha -a 'kpeng mü -sü 'ka.

²¹Dhe -ya kè 'dhö, 'ö- gbö -ya pö -a -dhë: <N dë, 'ma -sɔɔn yaa kè -Zlan 'ka, 'go mü 'ma- kè ü 'ka, yaa n -ma 'kun gbɔ kö 'ü n -dhe ü bha 'në! ²²'Yö- dë -ya -pö ö bha yuökëme -nu -dhë: <-Kaa kè 'siösiö 'ka nu sɔ -së do 'ka kö 'a- -da -a -bha, 'ka -vaaga do yö -a -ko -bha, 'ka -sakpa -nu yö -a -gen -bha! ²³-Ka nu -du -gbong 'ö 'kwa- -to bhë -a 'ka, 'ka- zë, 'kwa 'wlaan- kè! ²⁴Bhii ma 'në 'ka- -ga -na =ne, -yö -kè =ne me =ya ga -a 'dhö, 'keë =ya 'go ga 'gü; -yö -dhong 'keë 'ma- yö! ²⁵'Ö =zuögludhi 'wlaan- zü -yö dɔ.

²⁵Dhe 'wo- kè -na 'dhö kö me bhë -a -bha 'në -blëezë -yö -bhlöö-. =Dhe 'yö 'go -na -bhlöö-, 'ö =yɔɔn -na 'kɔ 'sɔɔ, 'ö 'tan bho -wo -nu, =troo' -drinnng -nu ma. ²⁶'Ö yuökëme do -dhɔɔ -kè, 'yö- =dheë' kpo pë 'wo- kè -na bhë -a -gen 'ka. ²⁷'Ö yuökëme -ya -daa -kè -a -go =nɛ: <Ü dheglu 'yö nu bhë, 'yö ü dë -yö -du 'në -gbong 'ö 'kwa- -to bhë 'yö- zë, 'ö tɔɔ -yö ö gbö -yö -potaasü 'ka. ²⁸'Ö 'wun -yö na -a gbö -blëezë -zuë, 'yö- pö ö 'ka 'dho -da kɔɔ. 'Ö- dë -yö yö plaan, 'yö =bheä -a -dhë kö -yö nu kɔɔ. ²⁹'Keë -a gbö -ya -pö -a -dhë: <-Bhö ü 'to 'to, -a -kwe =plëezë 'ö -ne 'ö 'a yuö kè -na ü 'dhiö, 'ö ü -wo -nu 'ü- pö n -dhë 'ö n 'ka- gbe 'to, 'ö ü 'ka -bho 'në do gia- nu n -dhë kö yië- n 'bhamë -nu 'yiën- 'wlaan- kè yi 'ko -bhaa -a 'ka, ³⁰'keë =ya kè ü gbö 'ö nu, 'ö ü bha 'kɔɔpë -nu 'ple =siö -sɔɔnkédhe -nu -bha 'töüdhö bhë -a -bha 'ka, 'ü -du -gbong 'ö 'kwa- -to bhë 'ü- zë -a -dhë!>

³¹'Ö- dë -ya pö -a -dhë: <Ma 'në, bhi 'pö ü n 'piö zö -kplawo, 'ö pë -nu 'wo n -ma 'ka, 'ö- 'ple 'dhö ü bha pë 'ka. ³²'Keë kwa =dua' -mü kö 'kwa =zuögludhi 'wlaan- kè, 'go mü kwa =zuö' 'glu -yö dhi, bhii ü dheglu 'ü- -ga -na 'ö -kè =ne me =ya ga -a 'dhö bhë, =ya 'go ga 'gü, -yö -dhong 'keë 'ma- yö! >>

-Zo -kë -naɔpë 'piö -sü

16 ¹Yesu -yö 'wun -blëe 'ö -bha =guë' -nu -dhë 'wun =zuan' 'gü 'zü 'ö- pö: <=Bhɔɔme do -bha -zo -kë -naɔpë 'piö -me do -yö -kè -dhö. 'Ö

me -nu -wo nu 'wo- -pö -bhɔɔme -dhë: <Ü -bha -zo -kë ü -bha -naɔpë 'piö -me 'yö bhë -yö ü -bha pë -nu -siö' -na.> ²'Yö- -dhɔɔ -kë 'ö- pö -a -dhë: <Më -wun -nu 'a- ma -na ü 'piö -nɛɛ -ɛ? -Bhö pë -nu 'a- to ü -gɔ 'töüdhö bhë -kɔ 'ü- -kë -a 'ka -a 'kluën bho n -ma, bhii ü 'ka 'dho kë 'yan -to ma -naɔpë -bha -me 'ka gbɔ.> ³'Ö -zo -kë -naɔpë 'piö -me -ya pö ö -de -zuö' 'piö -nɛɛ: <N 'gü 'yaa 'gbee- -duö kö 'aan- yuö -nu kë -bhlöödhe -nu -bha, 'ö pë -gba -dhe me -nu -gɔ -sü dho kë n -dhë lëzë -nɛɛ. 4'Yö bhë! Pë 'a dho -a kë 'ö -ya kë -nɛ -wa n bho ma -yadhe bhë -a -bha kö me -nu -waan wo -kɔ 'kpɔ n -gɔ 'ma- yö!>

⁵'Ö me -nu 'ö- -gɔme -bha 'pë 'dho -a -bha, 'yö -an -dhɔɔ -kë do do; 'yö-pö -a me -blëzë -dhë: <N -gɔme -bha -më 'ö 'pë 'dho ü -bha -ɛ?> ⁶'Ö- pö -a -dhë: <'Yɔn -baligo -këng' do.> 'Ö -zo -kë -naɔpë 'piö -me -ya pö -a -dhë: <'Pë 'yö ü -bha bhë -a 'sëédhe 'ö -nɛ, -bhö -yaannu 'siösiö 'ü 'gɔɔ- 'sɔɔdhu -ya!>

⁷'Go mü 'yö- pö -a me do 'bhaa -dhë -nɛɛ: <'Bhi -de 'pö, ü -bha -yö -dhë -ɛ?> 'Ö- pö -a -dhë: <'Blee- 'kaa -bhɔɔ' -këng' 'sɔɔdhu.> 'Ö -zo -kë -naɔpë 'piö -me -ya pö -a -dhë 'pö: <Ü bha 'pë 'ü dho -a bho 'ö bhë -a 'sëédhe 'ö -nɛ, -bhö -këng' -yiisië -ya!> ⁸'Ö -zo -kë -naɔpë 'piö -me 'ö -flüübhöme 'ka bhë, -a -gɔme -yö yö -a 'tɔ dhi -sü -bha -a -bha -kë -glengzë -sü -wun 'gü, bhii 'ö tɔɔ me -nu 'waa -Zlan dɔ bhë, -wo wo -bha 'wun -nu -yö 'ko 'dhiö këdhe -dɔ wo 'ko -nu ziën 'wo -zië' me -nu 'wo -Zlan -bha 'ka -an -ta.>

⁹'Ö Yesu -yö ö -wo -zuö -a -ta dhe -kë -nɛɛ: <«Ma 'pö, a- -pö ka -dhë: -Ka 'bhadhe 'kun -bhɔɔpë -nu 'wo 'kpongtaa zö -an 'ka, -yö -kë 'dhö kö yi 'ö dho yën -a 'ka ka -gɔ, kö -Zlan -yö ö -kɔ 'kpɔ ka -gɔ -toëpö -tosiadhe këdhe -bha.>

¹⁰Me 'ö -to ö -wo 'gü -me 'ka 'wun pë 'sɛɛn- -nu 'gü, -yö -to ö -wo 'gü 'pö 'wun -vava -nu 'gü; 'ö me 'yaa 'to ö -wo 'gü 'pö 'wun pë 'sɛɛn- -nu 'gü bhë, 'ö 'yaa 'to ö -wo 'gü 'pö 'wun -vava -nu 'gü. ¹¹'Ö -ya kë -nɛ kaa kë 'kpëdhö -naɔ -nu 'wo 'kpongtaa zö -a kë -kɔ -wun 'gü, dö 'yö dho -Zlan -bha -naɔ -nu giagia 'kluën bho ka -bha -ɛ? ¹²'Ö -ya kë -nɛ kaa kë 'kpëdhö me gbe -bha pë -nu -wun 'gü, -Zlan -yö -dho pë 'ö- -ya ka -bha 'ka -a nu ka -dhë -kɔklë -ɛ?

¹³Yuökëme yaa 'dho -mɔ -a -bha kö -yö yuö kë -gɔme -plë 'piö; -yö -dho 'yan -ziö' kë -a me do 'ka, 'ö- me do -dhɔ -ya -kë; -yö -dho to ö -wo 'gü me do -dhë, 'ö- 'yan -yö -ziö -a me do 'gü. Me gbe yaa 'dho -mɔ -a -bha kö -yö -Zlan waa -naɔ -an -dhɔ kpa 'kuë- do ö -zuö' 'gü.>

Yesu -bha 'wun -gwaa -plëzë -blë' -sü
(*Matiö 11.12-13; 5.31-32; Maakö 10.11-12*)

¹⁴=Dhe Yesu -wo bhë 'ö Falizi -me -nu -waa- ma, 'wo -kaan -a -wo -bha, bhii 'ö tɔɔ -wo -kë me 'dönggö -dönggö -nu 'ka. ¹⁵'Ö Yesu -ya pö -an -dhë: <«Ka me -nu 'wo wo -de sü 'wun kpengdhö kë -me 'ka -an 'ka me -nu wö 'dhiö, 'këɛ kö -Zlan -yö ka -zuögüdhe -dɔ; bhii pë 'ö me -nu 'dho -a -ga -na>

-ne pë -wun 'gbeezë 'dhö bhë, -Zlan -ya -san -zë. 16'Töng 'ö -Zlan -yö täng nu -a 'ka Moizö -dhë bhë waa- -Zlan -wodhiölome -nu -bha me =daan' -wo -yö -glɔɔ 'ö dho 'ö yöë Zan Batisö -bha nu -yi -bha. 'Ö sü 'töng 'ö 'dhö bhë -a -bha, 'wuntaasë 'yö -gban -Zlan -bha -gludëdhe -wun -bha -yö =blæ' -sü 'gü; -a kë 'dhö -sü 'gü, me 'ö -dhö -ya këdhe =mæ' -na 'gbee- 'ka kö -yö -da -Zlan -bha -gludëdhe -pö 'ö bhë -a 'gü. 17'Kee dhang- waa- 'se -an -bha ziö -sü -yö -dho kë 'pëpë 'ö =zië' täng 'bin pë 'tee do -bha ziö -sü -ta. 18'Gɔɔn- 'oo gɔɔn- 'ö 'dhoë- ö bɔɔ kë, 'go mü -yaan dhe gbe 'sü kö =ya -da dhe 'piö; 'ö gɔɔn- 'ö 'dhoë- dhebo 'ö- =gɔɔn -ya -kë -a sü ö bɔɔ 'ka kö =ya -da dhe 'piö 'pö.»

'Wun =zuan' 'ö -gban =bhɔɔme waa- Lazaa -an -bha

19'Ö- pö: «=Bhɔɔme do -yö -kë -dhö, 'yö =ya kë 'ö ö dhu sɔ -sɛɛbɔ 'ka. 'Ö yi 'saadhö -a 'ka, 'yö -kë ö bha 'gludhi kë =dhia 'wlaan- kë -sü 'ka -kplawo. 20'Gɔɔn- 'yenazë do 'wo- -dhe Lazaa 'ö bhüö -yö -kë -lo -sü 'ka -a kwi -dhe 'saadhö 'gü, -yö -kë wɔ =dhia 'pö =bhɔɔme 'ö bhë -a -gɔ 'kɔ 'dhiö. 21-Bhöpë 'peepee -nu =ya kë 'wo 'go -na =bhɔɔme -gɔ pë -bhö -a -ta =gba -ta, 'wo -piö -na sia- bhë =ne =ya kë 'yö- -bhö. 'Go mü gben- -nu -wo -nu 'wo- -bha bhüögüdhe -nu pa. 22'Yename 'ö bhë =dhe 'yö ga, -Zlan -bha bɔme -nu -wa sü 'wo dho -a 'ka Ablaamö 'piö dhang- 'gü. 'Ö =bhɔɔme -de 'pö, 'yö ga 'wo- -bin. 23=Bhɔɔme 'klo -yö -kë bhɔ =dhia =glööbɔɔ, 'yö -dhe =ya -ga dhuö =zian', 'yö -dhe -ga 'ma =gbiin, 'yö Ablaamö yö kö Lazaa -ya 'piö. 24'Yö -gbla 'gbee- 'ka =ne: «N dë Ablaamö, -bhö n 'yena yö, 'ü Lazaa bɔ n -dhë kö -yö ö -kɔnëga zë 'yi 'ka -ya 'ye n ne- -bha kö -yaan n -zuötadhe pë 'tee kë -saa, bhii n 'klo -yö bhɔ -sü 'gü 'siö 'gü zö yaa 'ka.» 25'Ö Ablaamö -ya -pö -a -dhë: «Ma 'në, ü -zo -yö -büö =ne ü -bha -kë -a 'gü -sü 'ka 'kpongtaa, ü pë -sɛɛbɔ -nu -yö, 'kee Lazaa -bha 'ka 'yena -yö -kpɔ -a -ta =va; 'kee =dɛɛ -yi 'ö =ne 'ö tɔɔ -a 'yënnng =dhuë' -yi kö bhi 'pö, ü 'klo -yö bhɔ -na. 26'Go mü 'zü, 'ö -glu 'kpa 'dhi =va 'dho kwa ziën; me 'ö dho go zö -yaan nu ka 'piö 'yaa 'dhö, 'iin me gbe yaa 'dho kë -dhö -yaan 'go ka 'piö 'ma -yaan nu -dhe 'yi- -bha 'nö =ne -a -bha.» 27'Ö =bhɔɔme -ya pö: «Dhe 'ö 'dhö bhë, -bhea' -a- wo ü -dhë, n dë, -bhö Lazaa bɔ n dë -gɔ kɔɔ 28-dhe 'ö n dheglu 'në gɔɔn- 'sɔɔdhu -nu 'wo- -bha bhë -a 'gü, kö -yö -an -zo -büö kö -kun 'wo dho nu -dhe 'ö n 'klo 'dho bhɔ -na -a -bha =ne -a -bha.» 29'Ö Ablaamö -ya pö -a -dhë: «Ü dheglu 'në gɔɔn- -nu 'wo 'ma bhë, -Zlan -bha täng 'ö Moizö -ya nu waa- -Zlan -wodhiölome -nu -bha 'sëédhe -nu -wo -an 'piö kö -waan -an -zo -büö; -wo wo 'to 'to -an -wo -bha!» 30'Ö =bhɔɔme -ya pö: «Yaa 'dho -mɔ, n dë Ablaamö, 'kee =ya kë =ne me do =ya 'go =glööbɔɔ zö =ya 'dho =ya -an yö, =ya kë 'dhö -wo -dho wo -bha -kë -a 'gü -sü -dhië' -kwaa.» 31'Kee Ablaamö -ya -pö -a -dhë: «'Ö =ya kë =ne waa wo 'to 'to Moizö waa- -Zlan -wodhiölome -nu -bha 'sëédhe -wo -bha, 'ö me do -yö go =glööbɔɔ 'ö dho -an 'piö 'dhee, waa 'dho we -a -wo -bha.» »

-Ziö me -bha 'wun -zaa' -sü -ta -sü
(Matiö 18.6-7; 7.21-22; Maakö 9.42)

17 ¹Yesu -ya -pö ö bha -guë' -nu -dhë: «Pë 'yö dho kë me 'bhee- -nu -da -sɔɔn yaa 'gü -pë 'ka, -yö -dho kë -kplawo, 'kɛɛ 'yena -wun -yö -dho kë me 'ö dho bɔ -a -ta -a 'ka! ²Yö -së -a -bha 'ka kö -wo -guökpö -va do dun -a bhɔ -bha, -wa -zuö 'yoo -bhaa 'yö -zië' ma me -nu 'wo -nɛ -a me do -piüö 'wun yaa 'gü -sü -ta. ³-Ka ka -zo kë ka -de 'piö -së 'ka! -Ya kë -nɛ ü dheglu -ya 'wun yaa kë ü 'ka, -bhö 'wun -blɛɛ' -a -dhë -së 'ka. 'Ö -ya kë -nɛ -ya 'gën nu ü -dhë, -bhö ziö -a -bha 'wun yaa -nu bhë -an -ta. ⁴'Ö -ya kë -nɛ -ya 'wun yaa kë ü 'ka -gwaa 'slaplezë -dhekpaɔyi do 'ka, 'ö go mü -gwaa 'slaplezë -ya nu -yaa- pö ü -dhë: «Ü bha 'gën -mü», -bhö ziö -a -bha 'wun yaa -nu bhë -an -ta!»

-Zo -yö -Zlan -bha -sü

⁵'Ö Yesu -bha bɔmɛ -nu -wa pö -a -dhë: «-Bhö yi -bha -zo -yö -Zlan -bha -sü -taɔ' kë!»

⁶'Ö Dëmɛ -ya -daa -kë -an -gɔ 'ö- pö: «Kö kë -nɛ -zo -yö -Zlan -bha -sü pë 'tee 'ö -kë -nɛ mutaadö ga 'dhö -ya kë ka -gɔ, ka -dho -a pö 'lü -va 'ö -nɛ -a -dhë: «Lü -va dɔ -nɛ, -bhö wo 'ü 'dho 'ü -gban 'yoo -bhaa!», -yö -dho kë ka -wo 'ka.»

Pë 'ö yuökëmɛ dho -a kë

⁷'Ö Yesu -ya pö 'zü -nɛɛ: «-Ya kë -nɛ ka ziën mɛ do -bha yuökëmɛ -ya kë -dhö, -yö -kë -dheyamɛ 'ka o, 'iin -tuëmaakëmɛ 'ka o, -ya kë -nɛ -ya 'go -bhlöö- -ya nu, -yö -dho -mɔ -a -bha 'yö- pö -a -dhë: «-Bhö nu 'siösiö 'ü pë -bhö» -a? ⁸'Kɛɛ -abi', -yö -dho -a pö -a -dhë -zian' -nɛɛ: «-Bhö ma -bhöpë -yuö kë 'ü sɔ gbe 'sü 'ü- -da 'ü nu ma -bhöpë 'ka! -Ya kë -nɛ 'ma pë -bhö, 'ma 'yi mü 'ma yën 'üën- -tun pë -bhö -na 'pö!» ⁹Yaa 'dho yuö 'ö- nu ö bha yuökëmɛ -dhë 'ö- kë bhë -a zuö pö -a -wun 'gü, -sua -mü -a? ¹⁰-Kɔ do bhë 'ö dho kaa ka -bha 'ka. -Ya kë -nɛ pë 'wo- pö 'ka- kë bhë, 'ka yën -a -bha, -kaa pö: «Yuökëmɛ 'kpaan -mü yi 'ka, pë yi -bha kö 'yiën- -a kë 'yi- -kë bhë.»»

Yesu -yö -weemɛ 'gɔɔ- do -dhe -bo

¹¹-Dhe Yesu -ya -da zian -ta kö -yö 'dhoë- Zeluzalemë, -yö -bɔ Samali -se waa- Galile -sɛ -an ziën. ¹²-Yö -kë -da pödhe do 'gü -dhia, 'ö -weemɛ 'gɔɔ- do -wo dɔ -gbiin 'wo- yö, ¹³'wo yö 'gbla -sü 'gü -nɛɛ: «Yesu, yi -Gɔmɛ, -bhö yi 'yena yö =e!»

¹⁴'Ö Yesu -ya pö -an -dhë: «-Ka 'dho 'ka ka -de -zɔn slabhomɛ -nu -dhë!» -Dhe 'wo 'dho -na, 'ö -an 'plɛ -dhe -yö bo zian-. ¹⁵-Dhe 'ö- mɛ do -yaa- yö -nɛ ö -dhe -ya bo, 'yö -yɛ ö 'zü 'ö nu -Zlan zuö pö -sü 'ka ö -wo -ta dhuö

'gbee- 'ka, ¹⁶'yö- -püö Yesu =geendhö 'yö -gblü 'sei -a zuö pö -sü 'ka. Me 'ö 'dhö bhë -yö -kë Samali mi 'ka. ¹⁷'Ö Yesu -ya pö me -nu 'wo -kë mü -an -dhë: «Me 'gɔɔ- do 'wo bhë -an 'plɛ -dhe -yö -bo -kɛ, 'kɛɛ -a me 'seisië 'wo to bhë, -wo më =ɛ? ¹⁸-A me gbɛ -zo yaa -büö giawo -yaan 'ye ö 'zü yaa nu -yaan -Zlan zuö pö -a 'ke yaa kë -niagɔɔn 'ö =nɛ -a 'ka a?»

¹⁹-Dhe =ya kë 'dhö, 'ö Yesu -ya pö -a -dhë: «-Bhö -luu- 'ü 'dho, ü -bha -zo -yö n -ma -sü =ya ü -dhe bo!»

-Zlan -bha -gludëdhe -bha nu -sü

(Matiö 24.23-28, 37-41)

²⁰Falizi -me -nu -wo Yesu =dhɛɛ' -kpɔ 'wo- pö: «-Zlan -bha -gludëdhe -yö -dho nu yi -mlë 'ka ɛ?» 'Yö- pö -an -dhë: «-Zlan -bha -gludëdhe -bha nu -sü bhë 'yan -ɔɔ -a -bha -pë 'yaa -mü. ²¹Waa 'dhoë- pö: «-Ka -dhe -ga, -yö zöl' 'iin «-yö -dhe 'ö -de -a 'gü!, bhii -kaa =ɔɔa' =nɛ -Zlan -bha -gludëdhe -yö ka ziën.»

²²-Dhe =ya kë 'dhö, 'ö Yesu -ya pö ö bha =guë' -nu -dhë: «'Yi do -yö nu -na 'ö 'ka dho -a -dho kë kö ma 'a Megbö 'ka, 'ka ka 'yan ɔɔ n -ma 'zü -dëüwo, 'kɛɛ ka 'ka 'dho n yö. ²³-Wo -dho -a pö ka -dhë: «-Ka -dhe -ga, -yö zöl' 'iin: «-ka -dhe -ga, -yö -del', 'kɛɛ kö =kun 'ka 'dho, kö =kun 'ka ziö -an 'piö! ²⁴-Kɔ 'ö dha 'dhö 'yan bhɔ -na -a 'ka, 'ö- 'bhü 'dho yö -na dhang- -dhe 'saadhö 'gü bhë, -kɔ do bhë 'ö ma 'a Megbö 'ka 'ö n nu -sü dho kaa. ²⁵'Kɛɛ 'dhiö =kun -yö n -ma kö n 'yënnɔ -yö bhɔ =va; me -nu 'wo =dɛɛ =nɛ -a 'gü -wo -dho n -zuö wo -kɔ 'yan =taa. ²⁶Pë 'ö -kë Noe -bha 'töng 'ka bhë, 'ö dho kë ma 'a Megbö 'ka n nu -yi 'ka 'pö. ²⁷Me -nu -wo -kë pë -bhö -dhia, müpë -nu mü -dhia, dhe -nu 'sü -dhia, 'go mü 'wo -kë wo -bha 'nëdhoo -nu -ɔɔ gwaan -dhia, 'ö dho 'ö yöë Noe -bha -da 'yitagɔ =va 'gü -yi -bha; 'ö -dhe 'yi pa -sü =ya nu, 'ö -an 'plɛ 'gü -yö =siö. ²⁸-Yö -dho kë 'zü =nɛ Lotö -bha 'töng 'dhö: Me -nu -wo -kë pë -bhö -dhia, 'yi mü -dhia, pë -nu 'dho =dhia, pë -nu 'dhoɔ ɔɔ =dhia, pë -nu ta -dhia, 'iin 'kɔ -nu ɔɔ =dhia. ²⁹'Kɛɛ yi 'ö Lotö -yö go -a 'ka Sodömë, 'siö waa -blɔɔn -wo -go dhang- 'gü 'wo -lo -an -ta =nɛ dha -bha ban -sü 'dhö, 'ö -an 'plɛ 'gü- =siö. ³⁰-Kɔ do bhë 'yö dho kaa ma 'a Megbö 'ka, ma nu -yi 'ka 'pö.

³¹-A yi 'dhö bhë -a 'ka, me 'ö 'dhoë- kë ö -gɔ 'kɔ tuö, yaa 'dho =yɔɔ- -yaan 'dho kɔɔ ö bha pë -nu 'sü -dhia. -Kɔ do bhë -a 'ka 'ö me 'ö 'dhoë- kë ö -gɔ =bhlöö- bhë, yaa 'dho ye ö 'zü -yaan nu ö -gɔ kɔɔ. ³²Ka -zo -yö -büö Lotö bɔɔ -wun 'ka! ³³Me- 'piö kö -yö ö -de dha, yö 'ka 'dho -mɔ -a -bha; 'kɛɛ me 'ö dhoë ö =kwaa' ö -bha -tosiadhe -zü, -yö -dho -a yö. ³⁴'Ö 'a- =blɛɛ ka -dhë =nɛɛ: -A gbeng 'ö 'dhö bhë -a 'ka, me =plɛ -wo -dho kë =sɛɛ' do -ta, -a me do -yö -dho sü 'ö- me do -yö to. ³⁵Dhebo =plɛ -wo -dho kë pë zɔɔn -dhiadhö, -a me do -yö -dho sü 'ö- me do -yö to. ³⁶((Gɔɔn- -nu -plɛ -wo -dho kë =bhlöö-, -a me do -yö -dho sü, 'ö- me do -yö to.))»

³⁷'Ö- -bha =guë' -nu -wa pö -a -dhë: «'Yi Dëme, -dhe -mlë 'ö pë -nu 'wo =nɛ 'wo dho kë -a -bha -ɛ?»

'Ö- -daa -kë -an -gɔ 'ö -pö: «-Dhe 'ö pë -glöö 'dhoë- kë -a -bha bhë, 'ö 'gblübhaa -nu dho dho wo 'kuë- -a -bha.»

'Wun -zuan' 'ö -gban -geandhe waa- zakanme -an -bha

18 ¹Dhe -ya kë 'dhö, Yesu -yö 'wundankuédhe do -kë -an -dhë 'wun -zuan' 'ka, -yö kë 'dhö kö -wo -bhea' -sü -wun 'kun 'gbee- 'iin kö -kun 'ö -an 'gü -yö ga; 'ö- pö -an -dhë: ²«Pödhe do 'gü, me do 'ö -kë zakanme 'ka 'ö 'yaa kë 'suö -dhia -Zlan -dhë 'iin 'yaa kë me gbe -bhlë -ya -dhia, -yö -kë mü. ³Ö pödhe bhë -a 'gü, -geandhe do -yö -kë mü 'pö. 'Ö -ya kë 'yö nu -a 'piö -kplawo kö -yaan ö bha za 'kan 'ö- pö -a -dhë: «A- 'piö 'ü za 'kan yië- n yaagüme -nu yi ziën.» ⁴Ö- wo 'dhö -kplawo, 'kë zakanme 'ö bhë 'yaa- -daa kë -a -gɔ 'gbædhö; 'yö -dhe 'ö yö mü 'ö zakanme bhë 'yö- pö ö -zuö' 'piö -në: «'Wun gia- 'ka, 'maa 'suö -Zlan -dhë 'iin 'maa me gbe -bhlë -ya, ⁵'kë -dhe -kë -në -geandhe 'ö -në -yö n 'piö kë -na -kplawo -në, a -dho -a -bha za 'ö -në -a kan, 'yaa 'dhö -yö -dho nu 'dhö -kplawo 'ö n -kë 'muamua.» »

⁶Ö Dëme -ya pö 'zü -në: «'Wun 'ö zakanme yaa -ya -blë bhë ka- -ma! ⁷Dhe -ya kë 'dhö, me -nu 'ö -Zlan -yö -an -ya ö -bha 'ka, -wa 'we -a 'piö -kplawo bhë, yaa 'dho -an -bha pë -nu kë -an -dhë -në -kɔ 'ö- 'ka kpengdhö -a 'dhö -a? -Yö -dho -an -wo bho ö 'tou -kplawo -a? ⁸A- -blë ka -dhë -në: -Abi', -yö -dho -an -bha 'wun -nu kë kpengdhö -an -dhë 'zodhö. 'Kë ma 'a Mëgbö 'ka, n nu -yi 'ka, a -dho -zo -yö n -ma -sü gia- do yö 'kpongtaa 'gbödhö -a?»

'Wun -zuan' 'yö -gban Falizi -me -nu waa- 'nii- -sönnng' 'kun -me -an -bha

⁹Me -nu 'wo -kë mü bhë, -an me 'bhaa -nu 'wo wo -de yö kpengdhö -Zlan wö 'dhiö, 'wo -zië' me -nu 'wo to -an -ta -wo -kë -an ziën mü 'pö, 'wo yö -an -san zë -sü -bha. 'Ö Yesu -yö 'wun -gban -an -bha, ö- pö: ¹⁰«Me -ple -wo -kë -Zlan -gɔ kɔɔ -bhea' -dhia. -A me do -yö -kë Falizi -me 'ka, 'ö- me do -yö -kë 'nii- -sönnng' 'kun -me 'ka. ¹¹Falizi -me -yö -dɔ -gean, 'ö -bhea ö -zuö' 'piö -në: «Oo -Zlan, a ü zuö -pö, kë n 'ka- wo -në me -nu 'wo to 'wo -kë -kwaanme -nu, me këwunyaazë -nu, 'iin -dadhepiöme -nu -an 'dhö bhë -a -wun 'gü. A ü zuö -pö 'zü, kë n 'ka- wo -në 'nii- -sönnng' 'kun -me 'ö -në -a 'dhö bhë -a -wun 'gü. ¹²A n -ben -to -dhekpacyi -ple 'ka 'dhɔɔgɔ do 'gü, 'go mü pë -nu 'wo n -ma 'ka 'a- kë 'gɔɔ- do -naa -nu ü -dhë.»

¹³Ö 'nii- -sönnng' 'kun -me -de 'pö 'yö dɔ zian gbe 'ka, 'yaa ö wö -luu'- -dewo dhang- 'gü, 'yö ö -tong -ta -ma 'ö -pö: «Oo -Zlan, ma 'pö a 'wunyaakëme 'ka, -bhö n 'yena yö!» ¹⁴Ö Yesu -yö ö -wo -zuöatadhe -kë -në: «A- -pö ka -dhë: Me 'ö bhë -Zlan -yö -ziö -a -bha këwun yaa -nu -ta -yaan -tun 'dho -na ö -gɔ kɔɔ, 'kë Falizi -me -bha 'ka, -a -bha këwun -yö -to -a -bha. Bhii 'ö tɔɔ me 'yö ö -de -luu'-, -a -gɔ -yö -dho dho sia-, 'ö me 'yö ö -de 'dho sia-, 'ö- -gɔ dho -luu'-.»

Yesu -yö 'dhuë- -kpɔ 'në 'sɛɛn- -nu -bha
(Matiö 19.13-15; Maakö 10.13-16)

¹⁵Me -nu -wo -nu 'në 'sɛɛn- -nu 'ka Yesu -dhia kö -yaan 'dhuë- 'kpɔ -an -bha. -Dhe Yesu -bha -guë' -nu -wa -an yö, 'wo yö 'wun -blɛɛ -an 'ka -sü 'gü. ¹⁶Ö Yesu -ya -pö ö bha -guë' -nu -dhë: «Ka ka -kwaan' -an -zü, -wo nu n 'piö! Kö -kun 'ka -an -kë! Bhii 'ö tɔɔ mɛ -nu 'wo wo -de -kë 'tee -nɛ 'në 'sɛɛn- -nu 'wo -nɛ -an 'dhö, -wo -dho -da -Zlan -bha -gludëdhe 'gü. ¹⁷A- -blɛɛ ka -dhë 'wun gia- 'ka: Me 'ö yaa 'we -Zlan -wun -bha ö -de -kë 'tee -sü 'ka -nɛ 'në 'sɛɛn- -nu 'wo -nɛ -an 'dhö, yaa 'dho -da -Zlan -bha -gludëdhe 'gü.»

'Wun 'ö -gban gɔɔn- -bhɔɔzë -bha -a -blɛɛ'- 'ö Yesu -ya wo
(Matiö 19.16-30; Maakö 10.17-31)

¹⁸Zuifö -nu -kɔɔnmɛ do -yö Yesu -dhɛɛ' -kpɔ 'ö- pö: «N -Gɔmɛ këwunsëzë, a -dho -a kë -dhë kö 'a -toëpö -kë -a 'gü -sü yö -ɛ?»

¹⁹Ö Yesu -ya pö -a -dhë: «-Më 'yö -kë 'ü n -dhe këwun -së -mɛ -ɛ? Me gbɛ këwun 'yaa -së -a 'ke yaa kë -Zlan dosen 'ka. ²⁰Tɔng -nu 'wo -bɛɛn' -sü 'ka 'wo -nɛ: Kö -kun 'ü -da dhe 'piö; kö -kun 'ü mɛ gbɛ -bha gɔɔn- -mɛɛ; kö -kun 'ü mɛ zë; kö -kun 'ü -kwaan; kö -kun 'ü -sua -kë mɛ gbɛ -gɔ; -bhö ü dë waa- ü dhe -an -bhlë 'kpɔ, ü -an -dɔ -a?»

²¹Ö gɔɔn- bhë 'ö- -daa -kë 'ö- pö: «Tɔng -nu 'wo bhë 'ö sü n 'tee 'gü -bha a -an 'plɛ -kun.»

²²Ö Yesu -ya pö -a -dhë -nɛɛ: «Pë do 'bhaa -wun -yö -tun ü -bha: -Bhö ü -gɔ pë -nu 'plɛ 'dhɔɔ dɔ 'ü- 'wëü- -nu bhë 'ü- -glu 'fɛɛmɛ -nu 'ka; 'go mü 'ü nu 'ü ziö n 'piö! -Ya kë 'dhö ü -dho -bhɔɔpë -nu yö dhang- 'gü.»

²³Kɛɛ gɔɔn- 'ö bhë, -dhe -wo 'ö -nɛ -yaa- ma, 'ö- wö -yö -siö, bhii 'ö tɔɔ -yö -kë -bhɔɔmɛ -va 'ka. ²⁴-Dhe 'ö Yesu -yaa- yö -nɛ gɔɔn- 'ö bhë -a wöödhe -ya -siö', 'yö- pö: «-Yö 'gbee- -bhɔɔmɛ -nu -bha 'ka kö -waan -da -Zlan -bha -gludëdhe -pö 'gü. ²⁵-Yö 'pëëpë -yɔɔnmia -bha 'ka kö -yaan bɔ miiga 'dhi 'gü 'ö -zië' -bhɔɔmɛ -bha -da -Zlan -bha -gludëdhe 'gü -sü -ta.»

²⁶Yö mɛ -nu 'wo -kë wo 'to 'to -dhia bhë 'wo- pö: «-Ya kë 'dhö kö dö 'yö dho dha -a 'gü 'sa?»

²⁷Yesu -ya -daa -kë 'ö- pö: «Pë 'ö mɛ -kɔ yaa -mɔ -a -bha bhë, -Zlan -kɔ -yö -mɔa.»

²⁸Ö Pɛɛ -ya pö -nɛɛ: «-Dhe -ga, yi yi -bha pë -nu 'plɛ -to 'yi ziö ü 'piö!»

²⁹Ö Yesu -ya pö -an -dhë -nɛɛ: «A- -blɛɛ ka -dhë 'wun gia- 'ka: Me -ya ö bha 'kɔ 'dhö 'iin ö bha dhebɔ, ö 'zlaa- -nu, ö -mɛ -nu, ö bha 'në -nu 'to -Zlan -bha -gludëdhe -wun 'gü, ³⁰-yö -dho -a -truën -va yö 'töng 'ö -nɛ -a 'gü, 'go mü 'yö dho -toëpö -kë -a 'gü -sü yö -dhe -kpaɔ -dhia' -bha.»

**Yesu -yö ö -bha ga -sü waa- ö -go ga 'gü -sü -wun -blæe
-gwaa kë -yaaga -naa wo
(Matiö 20.17-19; Maakö 10.32-34)**

³¹Yesu -yö ö bha =guë' -nu 'gɔɔ- do ö ga =ple 'wo bhë -an -sü ö 'piö 'ö- pö -an -dhë: «Kwa -da -sü -mü Zeluzalemë kö pë 'ö -Zlan -wodhiölomë -nu -wa =been ma 'a Mëgbö 'ka n -wun 'gü bhë, -a 'dhiö -yaan -mɔ 'kuë. ³²-Wo -dho n dɔ mɛ -nu 'waa -Zlan dɔ -an kwɛɛ, 'wo 'yee to n -ma, 'wo 'si bho n -gɔ, 'wo wo 'dhee -nu bho n -ma, ³³-wo -dho n -ma -klaa 'ka, 'go mü 'wo n zë; 'ö- -dhekpaɔyi kë -yaaga -naa bhë 'a go -a 'ka ga 'gü.»

³⁴'Kɛɛ -a -bha =guë' -nu waa- -gen gia- dɔ; bhii -yö -kë -bin -sü 'ka -an -gɔ, 'go mü 'ö 'wun 'ö Yesu -ya =blæe bhë waa- -gen 'zü dɔ.

**Yesu -yö 'yënnngtiime do -dhe -bo
(Matiö 20.29-34; Maakö 10.46-52)**

³⁵-Wo -kë =yɔɔn -dhia Zeliko -dhe 'sɔɔ. 'Yënnngtiime do 'ö -kë -gba -dhe mɛ -nu -gɔ =dhia, -yö -kë =yaannu -dhia zian 'sɔɔ. ³⁶-Dhe 'ö mɛ -gbaa -nu 'dho ziö -na, 'yö -an =dheɛ' kpɔ -an ziö -gen 'ka. ³⁷'Wo- pö -a -dhë: «Yesu 'go Nazaletë =nɛ 'ö nu -na bhë.» ³⁸'Yö -gbla 'gbee- 'ka =nɛɛ: «Yesu Davidö gbö, -bhö n 'yena yö =ee!»

³⁹'Ö mɛ -nu 'wo -kë 'ta =dhia Yesu 'dhiö bhë 'wo 'wun =blæe -a 'ka -a pö -sü 'ka- -dhë -yö ö 'dhi yö 'kuë-, 'kɛɛ -yö -gbla 'zü 'gbee- 'ka =nɛɛ: «Davidö gbö, -bhö n 'yena yö =ee!»

⁴⁰'Ö Yesu -yö =gbaannu 'ö- -pö -an -dhë -wo nu -a 'ka ö =dhia. =Dhe 'ö 'yënnngtiime 'ö bhë =ya nu -a 'sɔɔ, 'ö Yesu -ya =dheɛ' kpɔ 'ö- pö: ⁴¹«-Më 'ü- 'piö kö 'a- kë ü -dhë -ɛ?»

'Ö 'yënnngtiime -ya pö -a -dhë: «N Dëmɛ, a- 'piö kö n 'yan -yö -dhe yö 'zü -dëüwo.»

⁴²'Ö Yesu -ya pö -a -dhë: «Ü 'yan 'dhi -yö 'po! Ü -bha -zo -yö n -ma -sü =ya ü -dhe bo!»

⁴³-Dhe do bhë -a 'gü, 'ö- 'yan -yö -po, 'ö -dhe yö, 'yö -ziö Yesu 'piö -Zlan 'tɔ kë =va -sü 'ka. =Dhe 'ö mɛ -gbaa -nu -de 'pö 'wun 'ö =nɛ =waa- yö, 'wo yö -Zlan zuö pö -sü 'gü.

Zase -yö -kpën Yesu -bha

19 ¹=Dhe 'ö Yesu =ya -da Zeliko plöö, -yö -kë ziö -sü 'gü, ²gɔɔn- -bhɔɔzë do 'wo- -dhe Zase 'yö -kë 'nii- =sɔnnng' 'kun -mɛ -nu -gɔmɛ 'ka bhë 'yö -kë mü. ³'Yö- këdhe =mɛɛ kö mɛ 'ö Yesu 'ka 'yaan- -a dɔ. 'Kɛɛ =dhe 'ö kë =nɛ -yö -kë =klöö', yaa 'dho Yesu yö mɛ -gbaa -nu 'wo bhë -an -dhë bhë, ⁴'Ö -bla sü 'ö dho -an 'dhiö 'ö -da 'lü do tuö, kö =ya kë =nɛ Yesu -yö ziö -na -dhe bhë -a -bha kö 'yaan- -a yö. ⁵=Dhe Yesu =ya -lo -dhe bhë -a =tei' 'ka, 'yö ö 'yan =luu 'ö- pö Zase -dhë: «-Bhö =yɔɔ'- 'siösiö, Zase, =dɛɛ tɔɔ =dɛɛ, a -dho dho ü -gɔ kɔɔ!»

6'Ö Zase -yö =yɔɔ -bla 'ka, 'yö- -nia kun =zuögludhi 'ka ö -gɔ kɔɔ. 7Mε -nu 'wo -kë mü -wo 'wun -blɛɛ wo -wo =löö 'wo- pö: «Gɔɔn- 'ö =nɛ =ya 'dho =ya wɔ 'wunyaakëme -gɔ kɔɔ!»

8'Ö Zase -yö =luu 'ö- pö Dëmɛ -dhë: «N -Gɔmɛ, -bhö ü 'to 'to 'dhe! A -dho ma pë -nu 'wo n -gɔ, -a -kɔ 'pian do nu 'fɛmɛ -nu -dhë, 'go mü 'ö =ya kë =nɛ mɛ -yö -dhö 'a pë kun -a -gɔ =flüü 'ka, 'a dho -a -bha -ye 'zü kë -gwaa -yiisië -zë.»

9'Ö Yesu -ya pö -a -dhë: «Dha -sü =ya -da ü -gɔ kɔɔ =dɛɛ bhii 'ö tɔɔ ü Ablaamö =suu'- -ta -mɛ do 'ka 'pö. 10Bhii ma 'a Mɛgbö 'ka, a -nu mɛ -nu 'ö -an nii =ya dɔ 'gü =siö' -zian -ta -an =mɛɛ' =dhia kö 'a -an dha.»

'Wun =zuan' 'yö -gban 'sënnɔg 'tama -nu -bha
(Matiö 25.14-30)

11Yesu -yö 'wun -blɛɛ 'wun =zuan' 'ka mɛ -nu 'wo go 'wun 'ö- =blɛɛ bhë -a ma =dhia bhë -an -dhë. =Dhe 'ö -kë =nɛ kö =ya =yɔɔn Zeluzalemë -dhe 'sɔɔ bhë, -yö -kë -an -zo 'piö =nɛ -Zlan -bha -gludëdhë -dhö to mü 'ö -lo wo -ta =klöödhö.

12'Kɛɛ pë 'yö- pö =ga =nɛ: «-Gludë =suu'- -ta do 'gü -mɛ -yö -dho 'sɛ do =gbiin 'gü kö -waan -a kë -gludë 'ka. =Ya kë 'dhö kö -yaan 'yɛ ö -zü -yaan nu ö -gɔ 'sɛ 'gü. 13-A kë -sü 'ka kö -yaan 'dho, -yö ö bha yuökëme -nu 'gɔɔ- do =dhɔɔ -kë, 'yö mɛ 'ö -dhö 'ö 'sënnɔg 'wëü- 'tama ga do do nu -a -dhë -a -pö -an -dhë -sü 'ka =nɛɛ: «-Ka pë -nu 'dho 'ka -an 'dhɔɔ dɔ 'wëü- 'a- nu ka -dhë bhë -a 'ka -yö 'dho -yö yöë n nu -yi -bha!» 14'Kɛɛ -a -bha 'sɛgüme -nu -wa -san -zë, 'ö 'wo wo -bha bɔmɛ -nu bɔ -a 'piö kö -waan -a pö -a -dhë =nɛɛ 'waa- 'piö kö -yö kë -gludë 'ka wo -gɔ 'dhiö.

15=Dhe 'ö =ya 'yɛ ö 'zü =ya nu kö =waa- =ya -gludë 'ka ö -gɔ 'sɛ 'gü, 'yö ö bha yuökëme -nu 'ö 'wëü- nu -an -dhë bhë -an -dhɔɔ -kë kö mɛ 'ö -dhö pë 'yö- yö -yaan -a -zɔn.

16'Ö mɛ =bleezë -yö nu 'ö- pö: «N -Gɔmɛ, 'sënnɔg 'tama 'gɔɔ- do 'a- yö, -a mɛ 'ü- nu n -dhë bhë -a -yö -a 'piö 'ka.» 17'Ö -gludë -ya pö -a -dhë: «Yö -së, ma yuökëme këwunsëezë. =Dhe -kë =nɛ -wa -mɔɔa 'wo wo -zo tɛn ü -dhë pë -nu 'ö -an 'tɔ 'gian 'yaa -an -bha -an 'gü bhë, a -dho ü -ya pödhe 'gɔɔ- do =kɔɔnme 'ka.»

18'Ö yuökëme kë =plɛ -naa -yö nu 'ö- pö: «N -Gɔmɛ, 'sënnɔg 'tama 'sɔɔdhu 'a- yö -a mɛ 'ü- nu n -dhë bhë -a -yö -a 'piö 'ka.» 19'Ö -gludë -ya pö -a -dhë: «Bhi -de 'pö, a -dho ü -ya pödhe 'sɔɔdhu =kɔɔnme 'ka.»

20'Ö- -bha yuökëme do 'bhaa -yö nu 'ö- pö: «N -Gɔmɛ, ü bha 'sënnɔg 'wëüga bhë 'ö =nɛ; a- -bin -ta wöödhö -sɔ 'gü, 21bhii a -suö ü -dhë, 'ö tɔɔ ü gɔɔn- 'dhiözë 'ka, pë 'ö ü 'ka- =waannu ü -de =kwaaw' 'ü- -sü, 'ö pë 'ö ü 'ka- ta ü -de =kwaaw' 'ü- kan.» 22'Ö -gludë -ya pö -a -dhë: «Yuökëme yaa, ü -de -wo 'ü- pö bhë 'a dho ü -bha za kan -a -bha; bhi gia- ü- =tei' dɔ =nɛ a mɛ 'dhiözë 'ka, 'ö pë 'yaa n -ma 'ka, 'a- sü, 'iin pë 'ö n 'ka- ta n -de =kwaaw' 'a-

-kan! ²³Dhe 'ö 'dhö -ne, -më -kë ü 'ka dho ma 'wëüga bhë -a 'ka ü 'ka -da 'wëüko 'gü kö n nu -yi 'ka ma gia- 'aan- -a bho mü n -de -kwa' kö n -truën -yaan kë -dhö -e?)

²⁴Dhe -kë 'dhö 'ö -gludë -ya pö me -nu 'wo -kë mü -an -dhë: <'Sënnng 'wëüga do 'yö- -gö bhë, -kaa 'kun -a -gö 'ka- nu me 'ö 'sënnng ga 'gö- do 'dhö -a -gö bhë -a -dhë!> ²⁵Wo- pö: <Yi -Göme, me 'ö bhë -a 'gö- do =ya nu -a -dhë 'saadhö!> ²⁶Ö -gludë -ya pö: <A- -pö ka -dhë me 'ö pë 'dhoë- -gö, -a -tao -dho kë; 'këe me 'ö pë 'yaa- -gö =va, -a 'bhe 'tee -de 'ö bhë -yö -dho kun -a -gö. ²⁷Ö go mü, -ka me -nu 'wo n yaagüme 'ka 'ö waa 'we -a -bha kö a -kë wo -bha -gludë 'ka bhë, -ka nu -an 'ka 'ka -an zë n 'dhiö zö!> »

Yesu -yö -da Zeluzalemë

(Matiö 21.1-11; Maakö 11.1-11; Zan 12.12-19)

²⁸Dhe Yesu =ya yën 'wun =blëe' -sü -bha 'dhö, 'ö zian 'ö dho Zeluzalemë 'yö -da -a -ta. ²⁹Dhe 'ö =yöön -na Betefaze -dhe waa- Betani -dhe, 'ö -tön 'ö mü 'wo- -dhe Olivie -tön bhë -a 'sö, 'yö ö bha =guë' =plë bö ö 'dhiö, ³⁰Ö- pö -an -dhë: <«-Ka 'dho pödhe 'ö kwa 'sian 'piö zö -ne -a 'gü. 'Ka -lo =sia, ka -dho =soofang 'në do 'ö me gbe yaa -ya -a =taa do =kun -a yö kö -yö -klu -sü 'ka, -kaa 'po 'ka nu -a 'ka! ³¹Ö =ya kë =ne me 'bhaa =ya ka =dhe' 'kpo =sia =në: <-Më -kë 'ka- po =e?, -kaa pö -a -dhë: <Yi Dëme -bha -wun -ya -bha.>»

³²Yö böme -nu -wo -dho; 'ö pë -nu 'wo bhë 'wo- yö =ne -kö -de gia- 'ö Yesu -ya =blëe -a 'ka -an -dhë bhë -a 'dhö. ³³Wo -to =soofang 'në bhë -a 'pö -dhia, 'ö- dëme -nu -wa pö: <«-Më -kë 'ka =soofang 'në bhë 'ka- po =e?»

³⁴Wo- pö -an -dhë: <«Yi Dëme -bha -wun -ya -bha.»

³⁵Ö 'wo nu =soofang 'në bhë -a 'ka Yesu -dhia, 'ö 'wo wo -bha gblang -nu -po -a =taa, 'ö 'wo Yesu sü 'wo- -yaa =taa. ³⁶Yö -kë 'dho -dhia, 'ö me -nu -wo wo -bha gblang -kpo zian -gblöoga -ta -a 'dhiö. ³⁷Dhe 'ö =guë' -nu -gbaa bhë 'wo =yöön -na Zeluzalemë plöödhe 'sö, zian 'yö =yöön Olivie -tön 'piö =zian' -a 'ka bhë, 'yö =zuögludhi -yö -an pa; 'yö 'wo yö 'gei kë -sü 'gü -Zlan 'to 'saa -blü -sü 'ka 'gbee- 'ka -dhidhaapë -nu 'yö -an -kë 'wo- yö bhë -an -wun 'gü, ³⁸wo- pö: <«Kwaa- 'yoo -mü! Kwaa- 'yoo -mü! 'Dhuë- -yö 'kpo -gludë 'ö nu Dëme 'to 'gü -a -bha, =zuöyagluu -yö kë dhang- 'gü, 'go mü -Zlan 'to- kë =va!>»

³⁹Ö Falizi -me 'bhaa -nu 'wo -kë me -gbaa -nu 'wo -kë mü -an ziën bhë, 'wo- pö Yesu -dhë: <«Yi -Göme, -bhöë pö ü bha =guë' -nu -dhë -wo wo 'dhi yö 'kuë- -e!>»

⁴⁰Ö Yesu -ya pö -an -dhë: <«A- -pö ka -dhë: =Wa wo 'dhi -yö 'kuë- =sia, -guö -nu -wo -dho gbla!>»

Yesu -yö 'gbo -bö Zeluzalemë -dhe -wun 'gü

⁴¹Dhe 'ö Yesu =ya =yöön pödhe 'sö, 'ö =ya ö 'yan -da pö- -ta 'ö yö 'gbo bö -sü 'gü Zeluzalemë -wun 'gü, ⁴²Ö- pö: <«Ö =ya kë =ne do 'ö 'kwa- wo =dëe =ne, pë 'yö dho ü

gbaa -zuöyagluu 'ka ü- -dɔ -bezë, kö -yö -së -dhɛɛ, 'kɛɛ yö -ga -ya -bin ü -gɔ bhë, ⁴³bhii yi -nu -wo -dho nu ü -bha 'ka, ü yaagüme -nu -wo -dho -nië' ü -zü, 'wo pë -nu dɔ 'kuëdhö -waan bɔ böü- 'kplong -zü; -wo -dho sɔ ü -ta 'ö 'wo ü -nëng zian 'saadhö 'ka. ⁴⁴Bhi 'dhö, ü 'gü -mɛ -nu 'dhö, -wo -dho ka 'gü -siö' -'fëfedhö, -guö gbe yaa 'dho to 'ö 'bha -guö -ta zö. Bhii 'töng 'ö -Zlan -yö nuë ü -dhë bhë ü 'ka -dɔ!»

Yesu -yö 'dhɔɔdɔmɛ -nu -kë -Zlan -gɔ kɔɔ
(Matiö 21.12-17; Maakö 11.15-19; Zan 2.13-22)

⁴⁵Yesu -yö -da -Zlan -gɔ kɔɔ, 'ö yö 'dhɔɔdɔmɛ -nu 'wo -kë mü -an kë -sü 'gü ⁴⁶-a pö -sü 'ka =nɛɛ: «Pë 'ö =bɛɛn' -sü 'ka -Zlan -bha 'sëëdhɛ 'gü -ya pö: Ma 'kɔ -yö -dho kë -bheɛ -a 'gü -kɔ 'ka, 'kɛɛ ka 'pö, 'ka- -kë ka -bha -kwaanpë -bin -a 'gü -guö =duudhe 'ka!»

⁴⁷=Dhe -ya kë 'dhö, Yesu -yö -ya mɛ -nu -daan' -sü -bha -dhekpaɔyi 'saadhö 'ka -Zlan -gɔ kɔɔ. Slabhomɛ -gɔmɛ -nu, Zuifö -nu -bha tɔnggɔmɛ -nu waa- mɛtɔzë -nu -ya kë, -wa këdhɛ -mɛɛ kö 'waan- Yesu zë, ⁴⁸'kɛɛ -a kë -kɔ 'wo dho -a kaa waa- dɔ, bhii 'ö tɔɔ mɛ -nu 'saadhö -wo wo 'to -to Yesu -wo -bha kpinngdhö wo -zo -kë -a 'piö -sü 'ka.

Yesu -bha -wogbiindhe 'godhe
(Matiö 21.23-27; Maakö 11.27-33)

20 ¹Dhekpaɔyi do 'ka Yesu -yö -kë mɛ -nu -daan' -dhia -Zlan -gɔ kɔɔ 'wuntaɔsë =blɛɛ' -sü 'gü. 'Yö slabhomɛ -nu -gɔmɛ -nu, Zuifö -nu -bha tɔnggɔmɛ -nu waa- mɛ ziizii -nu -wo -nu, ²'wo- pö -a -dhë: «Pë -nu 'ü- kë -na =nɛ, dö 'ö- pö ü -dhë 'ü- kë -ɛ?»

³'Ö Yesu -ya -daa -kë -an -gɔ 'ö- pö: «Ma -de 'pö, a -dho -dhɛɛ' do kpɔ ka -gɔ: ⁴Dö 'ö Zan bɔ kö -yaan mɛ bɔ yiö =e? -Zlan -mü -i, 'iin mɛ -nu -mü -i?»

⁵'Kɛɛ -wo -yö 'wun -blɛɛ' -sü 'gü wo 'ko -dhë 'wo- pö: «Kwa- -daa kë =sia =nɛ -Zlan 'yö- bɔ, -yö -dhoë pö kwa -dhë -më -kë kwaa- -wo -dhe 'wun gia- -ɛ? ⁶'In 'kwa- pö =sia 'zü =nɛ mɛ -nu 'wo- bɔ, mɛ -nu 'töüdhö -wo -dho kwa -zuö -guö 'ka 'wo kwa zaa, bhii 'ö tɔɔ mɛ 'plɛ -wo Zan -ya 'ti -kë -Zlan -wodhiölome 'ka.»

⁷=Dhe -ya kë 'dhö, 'wo- pö: «Mɛ 'ö- bɔ kö -yaan mɛ bɔ yiö bhë 'yiëë- dɔ.» ⁸'Ö Yesu -ya pö -an -dhë: «=Dhe 'ö 'dhö bhë kö ma -de 'pö, mɛ 'ö- pö n -dhë 'a pë -nu 'wo =nɛ -an kë bhë, n 'ka 'dho -a 'tɔ pö ka -dhë 'pö.»

'Wun -zuan' 'ö -gban lezen =dheedhe yuökëme 'gluyaazë -nu -bha
(Matiö 21.33-46; Maakö 12.1-12)

⁹=Dhe -ya kë 'dhö, Yesu -yö 'wun -blɛɛ mɛ -nu -dhë 'wun -zuan' 'ka 'ö -pö: «Gɔɔndë do -yö 'ö bha lezen =dheedhe -kë, 'ö- -lo lezen =dheedhe yuökëme -nu kwɛɛ, 'ö- to 'ö dho 'ta 'gü -glɔɔ 'ma -dhiadhö.

¹⁰=Dhe 'ö lezen bho -yi -ya -lo, 'yö 'ö bha yuökëme do bɔ lezen =dheedhe yuökëme -nu -dhë kö -waan 'ö -bha -kpa bɔ 'ö -dhë. 'Kɛɛ lezen =dheedhe -yuökëme -nu -wa -kun 'wo- -ma 'wo- -yɛ 'zü 'ö -kɔ 'kpaan 'ka.

11'Ö lezen =dheedhe dème -yö ö bha yuökème do bɔ 'zü, 'ö lezen =dheedhe -yuökème -nu -wa kun, 'wo- -ma, 'wo 'si -nu bho -a -gɔ, 'wo- -ye 'zü ö -kɔ 'kpaan 'ka 'pö.

12'Yö ö -bha yuökème -gwaa kë -yaaga -naa bɔ; -a mɛ bhè -wa -gi 'wo- bho lezen =dheedhö, 'wo- -zuö zian gbe 'ka.

13'Ö lezen =dheedhe dème -ya pö: «-Mè 'a dho -a kë =o? Dɔ, 'a n gbö -dhɔkaasüzè =duö =nɛ -a bɔ, -yö -kè yö -zè -wo -dho lè- -kè -a -gɔ.»

14'Kɛɛ =dhe 'ö yuö -kè lezen =dheedhö -mɛ -nu =waa- yö, 'wo- pö wo 'ko -nu -dhè: «Me 'ö pè -nu 'wo =nɛ 'wo dho to -a -gɔ 'dhiö -zian' ö -ga 'ö =nɛ! -Kwaa zè kö lezen =dheedhe 'ö =nɛ -yaan 'to kwa -gɔ!» 15'Ö 'wo- kun, 'wo- bho lezen =dheedhö 'wo- zè.»

'Ö Yesu -yö -an =dheɛ' kɔ 'ö- pö: «=Ya kë 'dhö, lezen =dheedhe dème =ya nu, -mè 'yö dho -a kë =ɛ? 16'A- -pö ka -dhè: Pè 'ö dho -a kë 'ö tɔɔ -yö -dho nu 'ö lezen =dheedhe -yuökème -nu 'wo bhè 'yö -an zè, 'yö lezen =dheedhe bhè 'yö- nu mɛ 'waa gbe -nu -dhè.»

=Dhe 'ö me -nu =waa- -wo 'ö bhè -a ma 'wo- pö: «'Wun me 'ö =suu' -'dhö bhè kö =kun 'ö- -kè!»

17'Kɛɛ Yesu -yö -an -ga -piindhö 'ö- pö -an -dhè: «=Dhe 'ö -kè 'dhö, -mè -kè 'ö -Zlan -bha 'sèédhe =bɛɛn' -wo -ya pö: -Guö 'ö 'kɔdɔmɛ -nu -wa =zong 'dhiö -be bhè, yö gia- bhè 'ö -kè 'kɔ kuènnu -guö 'ka zlöö bhè =ɛ?» 18'Ö Yesu -yö =yɔɔn ö -wo -ta 'ö- pö: «Me 'oo me 'ö 'dhoè- -piüö -guö 'ö bhè -a -ta, -yö -dho ö -de ye, 'ö me 'oo me 'ö -guö bhè -ya -piüö -a -ta, -yö -dho -a =wüü'-.»

'Nii- sɔnnɔg' -bho 'segɔ =kɔɔnme -dhè -sü

(Matiö 22.15-22; Maakö 12.13-17)

19Zuifö -nu -bha tɔnggɔmɛ -nu waa- slabhome -gɔmɛ -nu -wa këdhe -mɛɛ kö 'waan- Yesu 'kundhe gia- bhè -a 'gü, bhii 'ö tɔɔ wo gia- -wa =dɔa' =nɛ 'wun =zuan' 'ö Yesu -ya -kè bhè -ö -gban lezen =dheedhe waa- ö dème -nu -an -bha bhè, -yö -gban wo gia- wo -bha, 'kɛɛ 'suö -yö -an -kè 'següme -nu -dhè. 20'Yö 'wo yö naɔ -kè Yesu -bha -sü 'gü; 'wo me -nu bɔ kö -waan naɔ kë -a -bha. Me -nu 'wo bhè -wo wo -de -kè me -nu këwunsèézè 'ka kö 'waan- 'slè 'kan -a -gɔ =dheɛ' -nu -kɔɔ -a -gɔ -sü 'ka. Bhii pè 'yö dho kë -a -bɔ -a -ta 'ka kö 'waan- -a dɔ 'sɛ =kɔɔnme kwɛɛ bhè =nɛ 'wo- =mɛɛ'. 21'Ö 'wo =dheɛ' kɔ Yesu -gɔ 'wo- pö: «Yi -Gɔmɛ, yi- =dɔa' =nɛ 'wun -nu 'ü- =blɛɛ' -na bhè o, 'iin ü -bha me =daan' -wo bhè o, -an 'plɛ -wo kpengdhö; 'ö 'bhaa me -nu zè 'gü kë, 'kɛɛ ü me =daan 'ko 'trüün 'piö 'wun giagia 'ö -Zlan -bha zian -ta -a 'ka. 22'Kwa -bha tɔng -ya -pö 'kwa -nii- sɔnnɔg' bho -gludè Sezaa -dhè e, 'iin kö -kun 'kwa- bho -a -dhè e?»

23'Kɛɛ Yesu -yö -an -bha 'slèkanwo bhè -a =tei' -dɔ; 'yö- pö -an -dhè: 24«-Ka dönɛ ga do -zɔn n -dhè! Dö 'ö- 'tɔ waa- -a -gɔ 'bin 'dho -ya -sü 'ka -a -ta =nɛɛ?» 'Ö 'wo- pö: «Sezaa -mü.»

25=Dhe =ya kë 'dhö, 'ö Yesu -ya pö -an -dhè: «=Dhe 'ö 'dhö, pè 'ö Sezaa -bha 'ka, -kaa bho -a -dhè; 'ka pè 'ö -Zlan -bha 'ka, 'ka- bho -Zlan -dhè 'pö!»

²⁶Waa- 'kundhe yö gbo ö -wo -ta 'wun 'yö- -blæe me -nu wö 'dhiö bhë -a -wun 'gü, 'kæe pë 'ö -kë -zian' 'ö tɔɔ -an 'te 'yö tun 'wun -daa kë -kɔ -suu' -'ö Yesu -ya -kë bhë -a -wun 'gü; 'ö -dhe -yö ga -an -ta diindhö.

-Dhee' do 'ö -gban -go ga 'gü -sü -bha
(Matiö 22.23-33; Maakö 12.18-27)

²⁷Saduse -me 'bhaa -nu -wo -nu Yesu 'piö; wo =ne 'wo- pö me =ya ga ö 'ka 'dho go ga 'gü gbo bhë, 'ö 'wo yö -a =dhæe' 'kɔɔ -sü -bha ²⁸'wo- pö: «Yi -Gɔme, tɔng 'ö Moizö -ya nu yi -dhë 'ö =bæen' -sü 'ka 'ö =næe: =Ya kë =ne gɔɔn- do 'ö- dhe 'dho -a -gɔ =ya kë -dhö, -a dheglu 'në gɔɔn- ya kë -dhö; waa- ö bɔɔ waa 'në 'kɔɔ gbo, =ya 'to 'dhö =ya ga kö -a bɔɔ =geandhe bhë -yö -dho to -a dheglu 'piö, 'ö 'wo 'në kɔɔ -a pin =taa. ²⁹'Kæe kö 'tɔng do 'ka bhë, dhegluzë 'slaple -wo -kë -dhö; 'ö- me -blæezë -yö dhe sü, 'ö waa 'në gbe 'kɔɔ 'ö ga. ³⁰'Ö- bɔɔ =geandhe -yö to -a me kë =ple -naa bhë -a 'piö, ³¹'ö to -a me kë -yaaga -naa 'piö 'pö. -Kɔ do bhë -a 'ka 'ö -dhe 'wo- -bha 'slaple 'wo- -kë -a 'ka, 'ö waa 'në gbe 'kɔɔ, 'ö -an 'ple -wo ga. ³²'Ö dhebɔ -de 'pö 'yö ga.

³³=Ya kë 'dhö, yi 'ö game -nu dho go -a 'ka ga 'gü, -a dö 'yö dho kë -a =gɔɔn 'ka kpinngdhö =e? Bhii 'ö tɔɔ -dhe 'ö 'wo- -bha 'slaple -wo -kë -a =gɔɔn 'ka!»

³⁴'Ö Yesu -ya -daa -kë -an -gɔ 'ö- pö: «Gɔɔn- -nu, dhoo -nu -wo 'kpongtaa zö -wo wo 'ko -sü, ³⁵'kæe gɔɔn- -nu, dhoo -nu, me 'ö -an -ma -kun kö -waan 'go ga 'gü kö -waan -kë -a 'gü -sü me 'ö zlöö -toëpö 'ka -a yö bhë, waa 'dho wo 'ko sü, ³⁶wo 'ka 'dho ga gbo, bhii kö waa- -Zlan -bha bɔme -nu -an -suu' -ya kë do; kö =wa kë -Zlan -bha 'në -nu 'ka, bhii 'ö tɔɔ =wa 'go ga 'gü. ³⁷'Go mü 'zü Moizö -ya -zɔɔn 'wun gia- 'ka =ne game -nu -wo -dho go ga 'gü, bhii pë 'ö =bæen' -sü 'ka -a -bha 'sëedhe 'gü, 'wun 'ö -gban 'ginngkɔɔ -bha, 'ö tɔɔ -yö kwa Dëme -dhe Ablaamö -bha -Zlan, Izaakö -bha -Zlan waa- Zakɔbö -bha -Zlan. ³⁸Kö -kaa dɔa =ne -Zlan -yö me 'bhee- -nu -bha -Zlan 'ka, 'yaa game -nu -bha -Zlan 'ka, bhii me 'wo 'bhee- bhë -wo 'bhee- 'dhö -a -bha 'ka.»

³⁹'Yö Zuifö -nu -bha tɔnggɔme -nu me 'bhaa -nu -wa pö: «Ü- -blæe -së, yi -Gɔme!»

⁴⁰Bhii 'ö tɔɔ =dhæe' gbe 'kɔɔ -dho yaa -an kë -a -gɔ zlöö gbo.

-Dhæekpɔdhe -nu 'wo -gban -Zlan -bha -Yame -bha
(Matiö 22.41-46; Maakö 12.35-37)

⁴¹'Ö Yesu -ya pö -an -dhë: «=Yö -kɔklë 'wo- pö -Zlan -bha -Yame 'pö -yö -go Davidö =suu' -ta 'gü i? ⁴²'Kæe kö Davidö gia- -ya -pö 'Tan 'sëedhe 'gü =næe: N Dëme (-Zlan) -ya -pö n Dëme -dhë: -Bhö -ya -yadhe =bhlëzë 'gü =zian' ⁴³-yö 'dho -ö yöë yi 'a dho ü yaagüme -nu kaa ü -gen -ta -a -ta dhuö -pë 'ka -a -bha. ⁴⁴=Dhe Davidö gia- -ya -dhe ö Dëme, -yö -kɔklë 'ö -Zlan -bha -Yame -yö -go -a =suu' -ta 'gü 'zü i?»

-Kë 'slë 'ka -sü 'ö Zuifö -nu -bha tånggöme -nu 'piö
(*Matiö 23.1-36; Maakö 12.38-40*)

⁴⁵Me gbung 'wo -kë mü bhë -an 'plë 'to -ya -wo -bha. 'Yö Yesu -ya pö ö bha -guë' -nu -dhë: ⁴⁶«Ka ka -zo kë ka -de 'piö Zuifö -nu -bha tånggöme -nu 'wo- -dho kë -na -nië gblang -gbiin -nu 'ka -sü 'ka, 'ö 'wo- 'piö kö -wo -mæ -nu kë wo 'ka -bhlë 'gü 'dhëedhe -vava -nu -bha, 'ö 'wo -ya -gbloo -sæbo -ta -an -gö -bhökuëkö -nu 'gü, 'wo -yadhe -sæbo sü 'wlaan- -nu -ta; ⁴⁷wo bhë -wo -geandhoo -nu -bha pë -nu 'ö -an -gö -a kun -an -gö, 'ö -wa 'go mü 'wo -bhæa -gbiin kö 'waan- kë mæ -nu këwunsëzë 'ka mæ -nu wö 'dhiö. Bhii -wo -dho 'klobhodhe -va -ziögöüsüzë yö.»

-Gbaapë 'yö go -geandhe 'fæzë kwëe
(*Maakö 12.41-44*)

21 ¹Yesu -yö -dhe -ga ö -zü 'to, 'ö- 'yan -yö -da -bhöome -nu 'wo wo -bha -gbaapë -da -na -Zlan -gba -a 'gü -pë 'gü, -Zlan -gö köo bhë -an -ta. ²'Ö- 'yan -yö -da 'zü -geandhe 'fæzë do 'bhaa -ta kö -yö 'wëü- 'sëen- ga -ple -da -na -Zlan -gba -a 'gü -pë 'ö bhë -a 'gü 'pö.

³-Dhe -ya kë 'dhö, 'ö Yesu -ya pö mæ -nu 'wo -kë mü bhë -an -dhë: «A- -pö ka -dhë 'wun gia- 'ka: Dhebo 'fæzë 'ö -në 'wëü- 'ö- -da mü bhë, -yö -va 'ö -zië' mæ -nu 'wo to 'saadhö -an -bha -ta. ⁴Bhii mæ -nu 'wo bhë 'wëü- 'ö- nu -sü 'yaa 'më -an 'ka bhë -në 'wo- -kë gbaö 'ka; 'këe yö 'pö, -a -bha 'fædhe 'gü pë 'ö to -a -gö -tosiadhe këpë 'ka bhë 'ö- 'plë -nu bhë.»

Yesu -yö -Zlan -gba -a 'gü -kö 'wü -wun -blee
(*Matiö 24.1-2; Maakö 13.1-2*)

⁵Me 'bhaa -nu -wo 'wun -blee -Zlan -bha 'kö bhë -a -bha 'wo- pö: «-Guö -nu 'wo 'kö döa -në -wo -së -dhëe! 'Ö pë -nu 'wo- nu -gbaapë 'ka 'wo- 'gü bhë, -wo -së 'pö -dhëe!» ⁶'Ö Yesu -ya pö: «Pë -nu 'ka -an -ga -na bhë, yi do -yö nu -na, -guö gbe yaa 'dho to ö 'ko -ta dhuö mü, -an 'plë -wo -dho -lo.»

'Yena -wun -nu -dho kë 'kpongtaa yën -yi 'dhiö
(*Matiö 24.3-14; Maakö 13.3-13*)

⁷Wo- pö -a -dhë: «Pë -nu 'wo 'dhö bhë -wo -dho kë yi -mlë 'ka ë? -Duakëpë -mlë 'yö dho pë -nu 'wo bhë -an yi -zön -ë?»

⁸'Ö Yesu -ya pö: «-Ka ka -zo kë ka -de 'piö! Kö -kun 'ka ka -kwaa' 'ka -de -zü 'wo ka -püö! Bhii medhevadhe -wo -dho nu n 'tö 'gü, 'wo- pö: «Ma 'pö, -Zlan -bha -Yame -mü n 'ka! Ma nu 'töng -ya -lo!», 'këe kö -kun 'ka -ziö -an 'piö! ⁹'Ka -glu gön -wun -nu 'iin -dö 'ko -gö 'yënnng -wun -nu ma, kö -kun 'ö 'siö -yö -kan ka 'gluu! Pë -nu 'wo 'dhö -wo -dho kë 'dhiö -blëezë, 'këe yaa 'dho kë 'kpongtaadhe 'dhiö 'to -sü 'ka.»

¹⁰'Go mü 'yö- pö 'zü -næe: «'Sëgögüme -nu -wo -dho 'kö zë wo 'bha 'sëgögüme -nu 'ka, ö -gludë dho -glu -da ö 'bha -gludë -ta; ¹¹'së -bha -zluun

-sü 'gbee- -dho kë -dhö, 'ö din -nu, -sü 'kuë- -yua' -nu dho nu 'sego 'bhaa -nu 'gü, 'siö -kan me 'gluu -pë waa- =duakëpë -wo -dho kë dhang- 'gü. ¹²Kεε -a kë -yië' kö pë -nu 'wo 'dhö bhë -waan kë, me -nu -wo -dho ka kun, 'wo pë 'dhiö- -nu kë ka 'ka, 'wo ka dɔ me -nu kwεε Zuifö -nu -bha -bhöküëkɔ -nu 'gü, 'wo dho ka -zuö -kanso 'gü -waan za dɔ ka -bha -gludë -nu waa- 'se -kɔɔnme -nu -an 'dhiö n -wun 'gü. ¹³-Yö -dho kë ka -bha bɔdhe 'ka kö 'kaan- kë n =goo- -nu 'ka. ¹⁴-Ka ka -zo -gban kö -kun 'ka dɔ ka -de -wun =zɔɔng' -ta za 'ö dɔ ka -bha bhë, ka -bha =blee' -sü -wun 'gü, ¹⁵bhii -ya kë =ne me -nu =wa 'dho ka 'ka zakanme -nu 'dhiö, ma gia-, a -dho -wo 'ö 'kpaakpadhe 'ö ka yaagüme gbe 'ka 'dho -mɔ -a -bha 'iin -yaan dɔ -a -gɔ -a dɔ ka 'dhii. ¹⁶Ka dë -nu, ka dhe -nu, ka dheglu -nu, ka me -nu, ka 'bhamé -nu -de gia-, -wo -dho ka dɔ me -nu kwεε, 'wo me 'bhaa -nu zë ka 'gü. ¹⁷Me 'saadhö -wo -dho ka -san zë n -wun 'gü, ¹⁸'kεε ka tuö -wun ga dɔ 'ka 'dho =dhɔng. ¹⁹-Ka ka 'gü dɔ 'gbee-, 'ka- kë 'dhö, 'ka dho ka -bha =toëpö -kë -a 'gü -sü yö.»

Yesu -yö Zeluzalemë -siö' -wun -blee
(*Matiö 24.15-21; Maakö 13.14-19*)

²⁰'Ö- pö: «Yi 'ka dho Zeluzalemë -dhe yöë kö -glugɔnme -nu =wa =nië' -a -zü bhë, -kaa dɔa =ne -a 'gü =siö'- -yi =ya yö =klöö'. ²¹-Ya kë 'dhö me -nu 'wo Zude -wo -dho =duë, -wo 'dho -tɔn -nu 'piö =zian'; me -nu 'wo dho kë Zeluzalemë plöödhe -bha, -wo -dho go wo pin -bha; me -nu 'wo dho kë zian -gbloo -nu 'piö, kö -kun 'wo -da plöö, ²²bhii -yö -dho kë 'klobhɔdhe -yi 'ka. -Yö kë 'dhö, kö pë -nu 'wo =bεen' -sü 'ka -Zlan -bha 'sëédhe 'gü -an 'dhiö -nu -waan -mɔ 'kuë. ²³-Më 'yena -wun 'ö dho kë yi 'ö 'dhö bhë -a 'ka, dhoo -nu 'wo 'guzë waa- dhoo -nu 'wo 'bëë- 'ka -an -bha 'ka -oo! Bhii =zuö' -da 'yenagüdhe =va -yö -dho kë 'se 'ö =ne -a 'gü, 'ö 'wun -yö na -Zlan -zuë -a 'gü -me -nu buëndhö. ²⁴-Wo -dho -an zë -blaan 'ka, 'wo -an kun 'gan 'ka, 'wo dho -an 'ka 'sego 'gü -dhe 'saadhö -bha, 'ö me -nu 'waa -Zlan -bha me -nu 'ka 'wo dho Zeluzalemë -pö =siö' -yaan 'dho -yaan yöë 'töng 'ö -Zlan -ya nu -an -dhë bhë -a yën -yi -bha.»

Megbö -dho nu
(*Matiö 24.29-31; Maakö 13.24-27*)

²⁵'Ö- pö: «=Duakëpë -nu -dho kë lan- 'gü, 'yö -kë 'su 'gü, 'yö -kë 'susongga -nu 'gü; 'ö sia- zö, 'kpongtaame -nu =zuö' dho -da =wabhödhe 'gü, 'ö 'suö =va dho -da me -nu 'gü, 'yoo -drinng 'gbee- -bha dɔ -sü waa- 'yoo kpö -bha -ma -sü -wun 'gü. ²⁶Me -nu -dho ga 'suö -dhë, -zo -ta -a 'gü -pë 'ö dho kë 'kpongtaa zö bhë -a -wun 'gü, bhii 'piigbeedhe -nu 'wo dhang- 'gü -wo -dho =zluun. ²⁷-Ya kë 'dhö -wo -dho ma 'a Megbö 'ka n yö kö a nu -na dha kpö -ta 'piigbeedhe waa- 'tɔbhɔdhe =va 'ka. ²⁸'Töng 'ö pë -nu 'wo bhë 'wo dho kaa, -ka ka -zo -gban 'ka ka -gɔ -nu =luu-', bhii kö ka -bha -go 'gan 'gü -sü =ya yö =klöö.»

Me -daan' -wo 'ö -gban figö -lü -bha
(Matiö 24.32-35; Maakö 13.28-31)

²⁹Yesu -yö 'wun =zuan' do -zɔn -an -dhë 'ö- pö: «-Ka figö -lü waa- 'lü me -nu 'wo to -an -ga! ³⁰'Ka -an 'dhe -dëü -nu yö, kö -ya kë ka 'yaan =ne -kpɔɔ -ya yö =klöö'. ³¹-Kɔ do bhë -a 'ka pë -nu 'wo bhë 'ka -an yö, -kaa dɔa =ne -Zlan -bha -gludëdhe -bha nu -sü =ya yö =klöö'. ³²A- -blɛɛ ka -dhë 'wun gia- 'ka: Pë -nu 'wo 'dhö -wo -dho kë kö me -nu 'wo 'töng =ne -a 'gü =ne -an 'ple waa ga -kun. ³³Dhang- waa- 'se -wo -dho ziö, 'kɛɛ n -wo 'ka 'dho ziö 'gbɛɛdhö.»

-Ya 'yaan -gen

³⁴'Ö- pö: «-Ka ka -zo kë ka -de 'piö! Kö -kun 'ö 'ka ka -de 'bɔn -kan -bhöpë =vava -bhö -sü -nu, yö 'yi =vava mü -sü -nu waa- -zo -ta 'kpongtaapë -wun 'gü -sü -an =kwaä, 'yaa 'dhö n nu -yi -dho -wo ka tii 'ka. ³⁵Bhii -yö -dho -lo ka -ta =ne 'kplö 'dhö 'kpongtaame 'ple -ta. ³⁶-Ka -ya ka 'yaan, -ka -bhea'- 'töng 'saadhö -a 'ka, kö ka 'gü -yaan kë 'gbee- 'kaan- dha pë -nu 'wo 'dhoë- nu 'töüdhö bhë -an -gɔ, 'iin 'kaan- dɔ ka -gean ma 'a Mɛgbö 'ka n 'dhiö.»

³⁷-Dhe =ya kë 'dhö yi 'saadhö 'ka, Yesu -yö me -nu -daan -Zlan -gba -a 'gü -kɔ 'gü; 'yö 'bin =ya 'më, 'yö dho Olivie -tɔn tuö -wɔ 'ma =dhia. ³⁸'Ö -dhiadhö 'ö me -nu -wo -so 'wo nu -Zlan -gba -a 'gü -kɔ 'gü -waan wo 'to 'to -a -wo -bha.

Slabhöme -nu -gɔme -nu waa- tɔnggɔme -nu -wo -dho wo 'kuë- Yesu -gɔ
(Matiö 26.1-5; Maakö 14.1-2; Zan 11.45-53)

22 ¹'Bluu- 'ö- =bhɛɛpë 'yaa- 'piö bhë -a 'wlaan- kë -yi 'wo- -dhe Paakö bhë, =dhe 'ö- yi =ya yö =klöö', ²'Ö slabhöme -gɔme -nu waa- Zuifö -nu -bha tɔnggɔme -nu -wa këdhe =mɛɛ kö 'waan- Yesu zë, 'kɛɛ 'suö -yö -an -kë 'següme -nu -dhë.

Zuda -mɔ -a 'gü -sü -mü kö -yaan Yesu dɔ me -nu kwɛɛ
(Matiö 26.14-16; Maakö 14.10-11)

³'Ö Zuda 'wo- -dhe Ikalitö, 'yö -kë Yesu -bha -guë' -nu 'gɔɔ- do ö ga =ple 'wo bhë -a me do 'ka bhë, 'ö Satan -yö -da -a =zuö' 'gü. ⁴'Yö Zuda -yö -luu 'yö dho 'yan -to -Zlan -bha 'kɔ -bha -mɛ -nu -gɔme 'piö 'ö -kɔ 'ö dhoë kaa kö 'yaan- Yesu dɔ -an kwɛɛ bhë, 'yö- =blɛɛ -an -dhë. ⁵'Ö -an =zuö' 'glu -yö -dhi giagiawo, 'wo 'wëüga 'tɔ go -a -dhë. ⁶Zuda -yö -we -a -bha; 'yö yö -a 'slë =mɛɛ' -sü 'gü kö -yaan Yesu dɔ -an kwɛɛ -ziö -a 'piö -mɛ -nu tii.

Yesu -yö me -bɔ kö pë 'ö dho -bhö Paakö -ta -waan -a -yuö kë
(Matiö 26.17-25; Maakö 14.12-21; Zan 13.21-30)

⁷Paakö 'ö 'wlaan- -yi do 'ö =ya kë 'wo 'bhlanë -gbɔng zë 'wo- -bhö -bluu- 'ö- =bhɛɛpë 'yaa- 'piö -a yi 'ka bhë, =dhe =ya -lo, ⁸'Ö Yesu -yö Pieɛ waa- Zan

-an bɔ 'ö- pö: «Ka 'dho 'ka kwa -bha pë 'kwa dho -a -bhö Paakö -ta, -a -yuö kë!»

⁹Ö 'wo- pö -a -dhë: «=Dhe -mlë 'ü- 'piö kö 'yi- -yuö kë -a -bha -ε?»

¹⁰Yö- pö -an -dhë: «Ka ka 'to 'to! Ka -bha -da Zeluzalemë plöö -sü 'ka, ka -dho -kpën gɔɔn- do 'ö 'yi -gbɔ 'dho -a -gɔ -a -bha. -Ka 'to -a 'piö, 'ka 'dho 'kɔ 'ö 'dhoë- -sɔ -a 'gü bhë, 'ka -sɔ -a 'gü ¹¹'ka- pö 'kɔ dëmε -dhë: 'Yi -gɔmε -yö =dhækpɔdhe do -dɔ yi -gɔ kö 'yiën- -a 'kpɔ ü -gɔ; -ya -pö 'kɔdhi -mlë 'ö waa- ö -bha =guë' -nu 'wo dho Paakö -pë -bhö -a 'gü i?» ¹²-Yö -dho 'kɔdhi do =va 'ö -dɔ kɔɔpë 'plε =ya -mɔ -a 'gü -a -zɔn ka -dhë 'kɔ -ta dhuö -kɔ 'gü. -Dhe bhë 'ka dho -bhöpë -nu -yuö kë -a -bha.»

¹³Ö 'wo dho 'wo pë -nu 'wo bhë 'wo -an yö =nε -kɔ 'ö Yesu -ya =blεε -a 'ka -an -dhë bhë -a 'dhö; 'ö 'wo -bhöpë 'ö dho kë Paakö -ta bhë 'wo- -yuö -kë.

-Bhöpë 'slööslö

(Matiö 26.26-30; Maakö 14.22-26; 1 Kolentö 11.23-25)

¹⁴-Dhe 'ö 'töng =ya -lo, 'ö Yesu waa- ö bha bɔmε -nu -wo dho pë -bhö -dhia, ¹⁵yö- pö -an -dhë: «-Yö -kë n -dhë -së -duö kö 'kwa Paakö -bhöpë 'ö =nε 'kwa- -bhö kwa 'ko =bhaa n 'klo yaa =tun bhɔ -na. ¹⁶Bhii a- -pö ka -dhë: N 'ka 'dho -a gbe -bhö gbɔ 'ö dho 'ö yöë Paakö sla- bho -sü 'ö bhë -a -gen -yö 'ko 'dhiö -yi -bha -Zlan -bha -gludëdhe -pö 'gü.»

¹⁷-Dhe =ya kë 'dhö, 'ö -drɔɔn -kɔɔ -yaan do sü 'ö -Zlan zuö pö -a -ta 'ö- nu -an -dhë 'ö- pö: «Pë =nε, -kaa -a 'sü 'ka- -glu ka 'kuë 'ka- mü, ¹⁸bhii a- -pö ka -dhë 'ö sü -dεε -bha n 'ka 'dho -drɔɔn mü gbɔ 'ö dho 'ö yöë -Zlan -bha -gludëdhe nu -yi -bha.»

¹⁹-Dhe =yaa- pö 'dhö, 'yö 'bluu- sü; =dhe =ya -Zlan zuö pö -a -ta, 'yö- 'klu -kan 'yö- nu -an -dhë 'ö- pö: «Pë =nε tɔɔ n bun, 'a- nu ka -wun 'gü. Ka- -bhö -na, ka -zo -yö -büö n -wun 'ka!»

²⁰-Kɔ do bhë -a 'ka; 'ö -drɔɔn -kɔɔ -yaan do nuë -an -dhë kö =wa yën pë -bhö -sü -bha, 'ö- pö -an -dhë: «-Drɔɔn -kɔɔ -yaan 'ö =nε 'ö tɔɔ -Zlan -bha -dhikuëdhe -dëü 'ö bɔ n fei -ta 'ö -lo ka -wun 'gü. ²¹'Kεε -ka -dhe -ga, mε 'ö dho n 'dhɔɔ dɔ, -yö n 'piö pë -bhö -dhia zö! ²²Ma 'a Mεgbö 'ka, a -dho ga =nε -kɔ 'ö -Zlan -ya yö -a 'ka 'ko 'dhiö kö -yaan kaa -a 'dhö; 'kεε gɔɔn- 'ö 'dhoë- n 'dhɔɔ dɔ bhë 'yena -wun =ya kaa =dheε!»

²³Ö- -bha =guë' -nu -wo yö wo 'ko -nu =dhεε' 'kpɔ -sü -bha, mε 'ö dho 'wun =suu' -ö 'dhö bhë -a kë -a -wun 'gü.

Dö 'yö tɔɔ mε =va =ε?

²⁴-A -bha =guë' -nu -wo za -ya wo 'ko -bha, mε dho kë mε =va 'ka wo ziën -a -wun =blεε' -sü 'ka. ²⁵Ö Yesu -ya pö -an -dhë: «'Kpongtaa zö, -gludë -nu -wo mε -nu -kɔɔn, mε -nu =nuadhε -kë wo -sü 'ka, 'ö mε -nu 'ö -wogbiindhε 'dho -an -gɔ, 'wo -an -dhe mε këpësëëzë -nu, ²⁶'kεε ka -bha

'ka, yaa 'dho kë 'dhö. Pë 'ö dho kë =zian' 'ö tɔɔ mə 'ö mə =va 'ka ka ziën, kë 'ö dho -a wo =nɛ 'nè 'tee 'dhö; 'ö mə 'ö mə =kɔɔnme 'ka, 'yö dho kë =nɛ yuö -kè mə 'dhiö -mə 'dhö. ²⁷=Dhɛ -kè 'dhö =nɛ dö 'ö tɔɔ mə =va =ɛ? Mɛ 'ö pë -bhö -dhia =i, 'iin mə 'ö -an gbaa -na -bhöpë 'ka i? Mɛ 'ö pë -bhö -dhia 'yaa -mü -a? 'Kɛɛ ma 'pö, a ka ziën =nɛ mə 'dhi gbaɛ 'dhö. ²⁸'Ka -glɔɔ n 'piö piindhö 'wun 'gbee- -nu 'wo nu n -ta -a 'gü. ²⁹-Kɔ do 'ö n Dë -yö ö -bha -gludëdhɛ -wun -lo -a 'ka n kwɛɛ bhë, 'ö 'a dho ka -da -a 'ka n 'piö, ³⁰kö 'kwa pë -nu -bhö, 'kwa müpë -nu mü kwa 'ko =bhaa -Zlan 'piö; 'go mü 'ka dho -ya 'gɔ -gbloo 'gü 'ö 'ka Izlaelö 'gunng -gɔ 'gɔɔ- do ö ga =plɛ 'wo bhë -an -bha za kan.»

Yesu -yö -kploo 'ö Pieɛ dho -a wo ö -wun 'ka bhë -a -wun -blɛɛ
(*Matiö 26.31-35; Maakö 14.27-31; Zan 13.36-38*)

³¹'Ö Yesu -ya pö Pieɛ -dhë: «Simɔ, Simɔ, -bhö ü 'to 'to! Satan =yaa- -dhɛ kö -yaan ka =zaan 'zan =nɛ mə -mlü -piö, ³²'kɛɛ 'ma =bheä'- ü -wun 'gü, -yö kë 'dhö kö =kun 'ö ü -bha -zo -yö n -ma -sü dho go ü -gɔ. =Ya kë =nɛ 'bha 'yɛ ü 'zü 'bha nu n 'piö, -bhö ü dheglu -nu =faan' 'mè!»

³³'Ö Pieɛ -ya pö -a -dhë: «N Dëmə, n -mɔ -a 'gü -sü -mü kö mə 'plɛ -waan ko -da -kanso 'gü kö 'koën- ga ko 'kuë.»

³⁴'Ö Yesu -ya pö -a -dhë: «A- -pö ü -dhë, Pieɛ, -a kë -sü 'ka gbeng do 'ö =nɛ -a 'gü kö -tɔɔɔn -yaan 'we, ü -dho -a pö -gwaa -yaagazë =nɛ 'bhaa n dɔ.»

Yesu -bha 'wun 'ö -gban 'wëü- -da -a 'gü -pë 'dhö,
-bhɔɔ' 'dhö, -blaan 'dhö -an -bha -a =blɛɛ' -sü

³⁵'Ö Yesu -ya pö -an -dhë: «Ka bɔ 'a- wo 'dhiö -be, 'a- pö kö =kun 'ka 'wëü- -da -a 'gü -pë -nu, -bhɔɔ' -nu, -sakpa -nu gbɛ sü bhë, -dhɛ 'ka 'dho, -mè 'ö- -wun -yö ka -kè -ɛ?» 'Wo- pö -a -dhë: «Daa 'dee-!»

³⁶=Dhɛ =ya kë 'dhö, 'yö- pö -an -dhë: «'Kɛɛ zlöö =nɛ bhë, mə 'ö- -bha 'wëü- -da -a 'gü -pë 'dhö -dhö -ya 'sü. -Kɔ do bhë 'ö mə 'ö- -bha =bhɔɔ' 'dhö -dhö -ya 'sü, mə 'ö -blaan 'yaa- -gɔ, -yö ö bha gblang 'dhɔɔ dɔ, -yö -blaan do 'dhɔ! ³⁷Bhii a- -blɛɛ ka -dhë -yö =bɛɛn' -sü 'ka -Zlan -bha 'sëédhɛ 'gü =nɛɛ: -Wa -kpa kèpëyaame -nu -bha. 'Wun -nu 'wo bhë -an 'plɛ 'dhiö -dho -mɔ 'kuë; pë 'ö =bɛɛn' -sü 'ka n -wun 'gü, -a 'plɛ 'dhoë- kë.»

³⁸'Ö- -bha =guë' -nu -wa pö -a -dhë: «Yi Dëmə, -blaan =plɛ 'wo =nɛ!» 'Ö Yesu -ya pö -an -dhë: «-Yö 'to 'pö.»

Yesu -yö -bheä Olivie -tɔn tuö
(*Matiö 26.36-46; Maakö 14.32-42*)

³⁹Yesu -yö -yö plaan, 'yö dho Olivie -tɔn tuö =nɛ -kɔ 'yö- =kaa' -kplawo bhë -a 'dhö. -A -bha =guë' -nu -wo -ziö -a 'piö. ⁴⁰=Dhɛ =wa 'dho =wa -lo -dhɛ bhë -a -bha, 'yö- pö -an -dhë: «-Ka =bheä'-, -yö -kè 'dhö kö =kun 'ö Satan dho ka -püö!»

⁴¹-Dhe =ya kë 'dhö, 'yö bhö -an -dhë =taa' 'dëde 'ka, 'yö -lo ö kpon 'gü 'yö -bhea ⁴²-wo 'ö -ne -a 'ka 'ö- pö: «N Dë, 'ö =ya kë -ne 'bha 'we -a -bha, -bhö 'yi 'güüzë 'ö -ne -a bhö n -dhë =taa', 'këe n 'ka- pö ma 'pö n -dhöobhaa -yö kë, bhi -zë, ü -zo 'kun -wun -yö kë =zian!»

⁴³(('Ö -Zlan -bha bome do -yö go dhang- 'gü 'yö nu kö -yaan =faan' nu -a -dhë.)) ⁴⁴'Ö- =zuö' -yö -da ga 'siö -bha më 'sü -sü 'gü, 'yö -bhea ö =faan' 'plë 'ka, =dhe 'to -na zlöö kö föyi 'yö go -na -a -bha, 'yö ban -na sia- bhë, =ya kë fei 'ka.

⁴⁵-Dhe 'ö =ya yën =bhea' -sü -bha, 'ö =luu 'ö nu 'zü ö bha =guë' -nu 'piö, 'yö -an yö kö =wa yi zë -an =zuö' 'yö -kaan 'kuë bhë -a -wun 'gü, ⁴⁶'yö- pö -an -dhë: «-Më -kë 'ka yi zë =ε? -Ka =luu- 'ka =bhea'-, -yö kë 'dhö kö =kun 'ö Satan dho ka -püö!»

Yesu 'kun -sü

(Matiö 26.47-56; Maakö 14.43-50; Zan 18.3-11)

⁴⁷Yesu -yö -to 'wun =blëe' =dhia, 'ö më -gbaa =va -wo nu. -A -bha =guë' -nu 'göw- do ö ga =plë 'wo bhë -a më do 'wo- -dhe Zuda =ne 'ö yö më -gbaa 'wo bhë -an -dhë 'dhiö, 'ö =yöw Yesu -bha 'ö- 'kpeng mü (-a -zön -an -dhë -sü 'ka). ⁴⁸'Ö Yesu -ya pö -a -dhë: «Zuda, ma 'a Mëgbö 'ka n -püö -kö 'ö töw n 'kpeng mü -sü -a?»

⁴⁹-Dhe më -nu 'wo -kë Yesu 'piö =waa- döa =ne -wo -nu -a 'kun =dhia, 'wo- =dhe'e kpo =nëe: «Yi Dëme, 'yi -an -zë yi -bha -blaan -nu 'ka a?»

⁵⁰'Ö to mü -a më do -yö slabhome -nu -göme =va -bha yuökëme zë -blaan 'ka, 'ö- =kwëe- 'gü 'tonëga -kan. ⁵¹'Ö Yesu -ya pö: «Ü =kwaa' -a -zü, 'wun më bhë -yö 'to 'dhö!»

'Ö Yesu -yö pa göw- bhë -a 'to 'ka 'yö- bo.

⁵²-Dhe =ya kë 'dhö, 'ö Yesu -ya pö slabhome -nu -göme -nu, -Zlan -bha 'kö -maakëme -göme -nu, waa- më ziizii -nu, 'wo nu -a 'kun -dhia bhë -an -dhë: «-Më 'ö -kë 'ka nu n -gö -blaan waa- 'lü 'klu -nu 'ka =ne -dhe 'wo- pö -a -bha 'kpa 'wunyaakëme -mü n 'ka -a 'dhö e? ⁵³-Dhekpäyü 'saadhö a -kë ka 'piö -Zlan -gö köw, 'ö kaa n =mëe' 'iin kaa n 'kun; 'këe yi 'ö -ne 'ö töw yi 'ö -Zlan -ya -ya kö 'kaan- n kuën, -yö -dhetiidhe -bha 'piigbeedhe -zön -yi 'ka 'pö.»

Piëe -yö -kploo Yesu -wun 'ka

(Matiö 26.57-58, 69-75; Maakö 14.53-54, 66-72; Zan 18.12-18, 25-27)

⁵⁴-Wo Yesu -kun 'wo dhoë slabhome -göme =va -gö köw. Piëe -yö -ziö -an 'piö -gentozlöödhe 'ka. ⁵⁵-Wo 'siö 'gba -ya 'kweandhe bhë -a ziëndhe gia- -bha. Piëe -yö -kë më -nu 'wo -kë -ya 'siö -blü =dhia mü bhë -an 'piö. ⁵⁶Yuökëdhe do -ya -yö kö -yö -ya -sü 'ka 'siö 'piö. =Dhe 'ö- 'yan =ya -da Piëe -ta, 'ö- pö: «Göw- 'ö =ne -yö -kë -a 'piö 'pö!»

⁵⁷'Ö Piëe -yö -kploo 'ö- pö: «Dhebo, më 'ü 'we -na -a 'ka bhë 'maa- dö!»

58=Dhe 'ö- -dhe pë 'tee =ya =głɔɔ, 'ö mɛ do 'bhaa 'yan -yö -da Piɛɛ -ta, 'yö-pö: «Bhi -de 'pö, -a -bha mɛ do -mü ü 'ka!»

'Ö Piɛɛ -ya pö gɔɔn- bhë -a -dhë: «-Abi, 'maa -mü!»

59=Dhe 'ö pë 'yö -mɔ 'łɛɛ do -bha =ya ziö, 'ö mɛ do 'bhaa -yö pë do bhë 'ö- pö -wo 'gbee- 'ka =nɛɛ: «'Wun gia- 'ka, gɔɔn- 'ö =nɛ -yö -kë -a 'piö 'pö, bhii Galile mi -mü -a 'ka!»

60'Ö Piɛɛ -ya -daa -kë 'ö- pö: «Gɔɔn- =nɛ, pë 'ü- =blɛɛ' -na bhë 'wun gia- 'yaa -mü!» -Yö -to 'wun =blɛɛ' =dhia 'ö -tɔɔn -yö -we. 61'Ö Dɛmɛ -yö =dhië 'ö -zü 'ö Piɛɛ -ga piindhö. 'Ö Piɛɛ -zo -yö -büö Dɛmɛ -wo 'ö- pö -a -dhë 'dhiö bhë -a 'ka =nɛɛ «-a kë -yi 'ka gbeng do 'ö =nɛ -a 'gü kö -tɔɔn -yaan 'we, ü -dho -a pö -gwaa -yaagazë =nɛ 'bhaa n dɔ» 'ka. 62'Ö Piɛɛ -yö yö plan 'gbo 'yenazë bɔ -sü 'ka.

'Si 'wo- bho Yesu -gɔ waa- -a -ma 'wo- wo
(Matiö 26.67-68; Maakö 14.65)

63Mɛ -nu 'wo wo 'yan -kë Yesu -bha bhë, -wo 'yee -nu -to -a -bha 'wo- ma -nu wo, 64'Ö 'wo sɔ -klu -a 'yan -bha 'wo- =dhɛɛ' kpɔ 'wo- pö: «Mɛ 'ö ü ma bhë, -bhöë 'tɔ pö!»

65'Go mü 'wo 'si -nu bho -a -gɔ =plëëzë 'ka.

Yesu -yö zakanmɛ =vava 'dhiö
(Matiö 26.59-66; Maakö 14.55-64; Zan 18.19-24)

66=Dhe 'ö -dhe =ya 'po, Zuifö -nu -bha mɛ ziizii -nu 'wo 'sɛgɔ bhë 'wo- 'gü, slabhome -gɔmɛ -nu waa- tɔnggɔmɛ -nu -wo -dho wo 'kuë- do 'wo- pö -wo 'dho Yesu 'ka zakanmɛ =vava 'dhiö. 67'Ö 'wo yö Yesu =dhɛɛ' 'kpɔ -sü -bha 'wo- pö: «=Ya kë =nɛ -Zlan -bha -Yamɛ -mü ü 'ka, -bhö -a =blɛɛ' -yi -dhë!»

'Ö Yesu -ya pö -an -dhë: «'Ö =ya kë =nɛ 'ma- pö ka -dhë -ii-, ka 'ka 'dhoë- -dhe 'wun gia-, 68'iin 'ma =dhɛɛ' do 'kpɔ ka -gɔ 'wun 'ö =nɛ -a -wun 'gü, ka 'ka 'dho -a -daa kë n -gɔ. 69'Ö sü =dɛɛ -bha, ma 'a Megbö 'ka, n -ya -sü -mü -Zlan 'piigbeeze -bha -yadhe =bhlëzë -bha.»

70=Dhe -kë 'dhö 'yö -an 'plɛ -wa pö -a -dhë: «=Ya kë 'dhö kö -Zlan Gbö -mü ü 'ka a?»

'Ö- -daa -kë -an -gɔ 'ö- pö: «=Ii-, -a Gbö -mü n 'ka.»

71=Dhe =ya kë 'dhö, 'wo- pö: «=Aa! Kwa gia- 'kwa- -de -wo ma; kwa 'ka 'dho =goo- gbe =mɛɛ' gbɔ!»

-Wo -dho Yesu 'ka Pilatö 'dhiö
(Matiö 27.1-2, 11-14; Maakö 15.1-5; Zan 18.28-38)

23 1=Dhe -kë 'dhö mɛ -nu 'wo dho wo 'ko =bhaa bhë -wo -luu 'wo dho Yesu 'ka Pilatö 'dhiö. 2=Dhe 'wo -lo, 'wo yö 'wun -dɔ -a -bha -sü -bha -a pö -sü 'ka =nɛɛ: «Gɔɔn- 'ö =nɛ, yi -yö kö =ya kwaa- wɔ -kɔ 'plɛ bho

zian; -ya -pö me -nu -dhë kö -kun 'wo 'nii- -sɔnnɔ' bho -gludë Sezaa -dhë
'iin 'go mü -ya -pö yö gia- 'ö tɔɔ -Zlan -bha -Yame 'ö -gludë 'ka.»

3'Ö Pilatö -ya -dhe'e' kpɔ 'ö- pö: «Zuifö -nu -bha -gludë -mü ü 'ka a?»

'Ö Yesu -ya -daa -kë 'ö- pö: «-Ii-.»

4=Dhe =ya kë 'dhö, Pilatö -ya -pö slabhome -nu -gɔme -nu waa- me gbung
'wo bhë -an -dhë: «Mɛa-, 'wun yaa 'ö me 'ö -ne dho -a kë kö -yaan kë -a
'klo bho -gen 'ka 'yaa 'dhö!»

5'Kee -wo -yö 'wun =blee' -sü 'gü -wo =faan' 'ka 'wo- pö: «-Ya 'següme -nu
-bli dö 'yënnɔ -sü 'ka ö bha me =daan' -wo bhë -a 'ka, -ya zü -dɔ Galile 'ö
bɔ -a 'ka Zude 'segɔ 'saadhö 'gü, ö =ga 'ö =ya nu =ya =loë' zö bhë.»

Yesu -bha -dho Elödö 'dhiö -sü

6=Dhe 'ö Pilatö =ya -an -wo ma, 'yö -an -dhe'e' kpɔ 'ö- pö: «Gɔɔn- ne
Galile mi -mü -a?»

7'Ö =dhe 'ö =yaa- ma =ne -yö go 'pian 'ö Elödö -ya =kɔɔn bhë -a 'ka, 'ö- bɔ
Elödö 'yö -kë Zeluzalemë 'töng 'ö 'dhö bhë -a 'ka bhë -a -dhë. 8Elödö =zuö'
'glu -yö -dhi kö waa- Yesu -waan -kpën wo 'kuë-, bhii 'ö tɔɔ -yö Yesu 'tɔ
-ma 'ö- -dhe =ya =glɔɔ. -Ya -ya =zuö' 'piö kö -yaan -kpën -a -bha, -yö kë
'dhö kö -yaan -dhidhaapë do kë ö 'yaan 'ka. 9'Ö =dhe'e' =plëëzë kpɔ -a -gɔ,
'kee Yesu yaa- gbe -daa kë. 10Slabhome -gɔme -nu waa- Zuifö -nu -bha
tonggɔme -nu 'wo -kë mü, -wo -kë 'wun dɔ =dhia Yesu -bha 'gbee- 'ka.
11Elödö waa- ö bha 'dhasi -nu -wo 'yan =ziö' =kaa', 'wo lë- kpɔ -a -ta. =Dhe
'ö =wa sɔ do 'gianzë -së -da -a -bha, 'yö 'wo- bɔ Pilatö -dhë 'zü. 12Yi gia- 'ö
bhë -a 'ka, 'ö Elödö waa- Pilatö 'wo kaa 'bhazë 'ka, 'kee 'dhiö -bezë, -siödhe
-kë -an ziën.

=Wa 'wun -lo Yesu tuö kö -waan -a zë

(Matiö 27.15-26; Maakö 15.6-15; Zan 18.39–19.16)

13Pilatö -yö slabhome -gɔme -nu, 'dhiö -sü me 'ka -me -nu, waa- 'següme
-nu -an 'plë =dhɔɔ -kë wo 'ko =bhaa, 14'yö- pö -an -dhë: «Gɔɔn- 'ö -ne ka-
-kun 'ka nuë n -dhia, 'ö 'ka- pö =ne'e' =ya 'següme -nu bho zian -ta, 'kee n dë,
-a -dhe'e' 'a- kpɔ ka 'plë ka wö 'dhiö -ne pë yaa 'yö dho -a kë kö -a -wun
-yaan -lo -a tuö 'maa- yö -na. 15Elödö -de 'pö yaa 'wun yaa gbe yö -a -bha.
Pë -kë 'yö- bɔ kwa -dhë bhë. Kö gɔɔn- 'ö -ne 'wun yaa gbe 'ö dho kë -a 'kun
-gen -waan zë 'yaa 'dhö. 16=Dhe 'ö 'dhö kö -yö -dho -ma -klaa 'ka kö 'aan- n
-kwaal- -a -zü.»

17(('Töng bhë -a 'ka, Paakö -yi 'saadhö 'ka, Pilatö =dua' -mü kö -yö me do
bho -an -dhë -kanso 'gü.))

18'Yö -an 'plë -wo -gbla wo 'kuë =ne'e' «Me 'ö -ne, -bhö -a zë 'ü Balaba -zë
bho mü =zian' yi -dhë!»

19Balaba 'ö bhë -yö -dho -kanso 'gü dɔ 'yö- wo me -nu -gɔ 'yënnɔ pö- do
'gü waa- me zë 'yö- wo bhë -an -wun 'gü. 20=Dhe kë =ne Pilatö -ya -kë kö

'yö ö -kwaaw' Yesu -zü bhë, 'yö 'wun -blëe 'zü -dëüwo me gbung 'wo bhë -an -dhë. ²¹'Këe -an 'ple -wo -we -a 'piö 'gbla -sü 'ka 'wo- pö: «-Bhö -a dɔ -gaatalü -bha! -Bhö -a dɔ -gaatalü -bha!»

²²'Ö Pilatö -ya pö -an -dhë -gwaa kë -yaagazë -nëe: «Pë yaa -mlë 'ö -kë -ë? 'Wun yaa gbë 'ö dho kë -a zë -gen 'ka, 'maa- yö -na. A -dho -a kë 'wo- ma -klaa 'ka kö 'aan- n -kwaaw'- zü.»

²³'Këe -wa -pö -kplawo wo -wo 'gbee- 'ka -në Yesu -yö dɔ -gaatalü -bha. 'Ö -an -wo -yö dho 'ö to -a -bha. ²⁴'Ö Pilatö -yö -we -a -bha -an -gɔ kö pë 'wo- -dhe 'yaan- -a nu -an -dhë. ²⁵'Ö gɔɔn- 'ö dɔ 'yënnng 'go mü 'yö me zë 'wo- 'tɔ pö bhë 'yö ö -kwaaw- zü, 'yö Yesu dɔ -an kwëe kö pë 'yö -dhi -an -dhë -waan kaa.

Yesu -dɔ -gaatalü -bha -sü

(Matiö 27.32-44; Maakö 15.21-32; Zan 19.17-27)

²⁶-Dhe 'wo 'dho -na Yesu 'ka, -wo -kpën me do 'wo- -dhe Simɔ 'ö go Silënë -a -bha kö -yö 'go -na -bhlöö-; 'wo- kun 'gbeetadhe 'ka 'ö Yesu -dɔ -a -ta -lü bhë 'wo- nu -a -dhë kö -ya bun -a 'piö.

²⁷Me -gbaa =va -wo -ziö -a 'piö, 'ö dhoo -nu 'wo -kë -an 'piö 'wo 'gbo bɔ wo -de =maa 'ma -sü 'ka Yesu -wun 'gü. ²⁸Yesu -yö =dhië dhoo -nu bhë -an 'piö, 'yö- pö -an -dhë: «Zeluzalemë dhoo -nu, kö -kun 'ka 'gbo bɔ n -wun 'gü! -Ka 'gbo bɔ =zian 'ka gia- waa- kaa- 'në -nu ka -wun 'gü, ²⁹bhii yi -nu -wo -dho nu, 'ö 'töng 'dhö bhë -a 'ka me -nu -dhoë pö: «Dhoo -nu 'wo 'bhüödhe 'ka 'ö waa 'në 'kpɔ 'ö waa 'yɔn -da 'në 'dhii -an 'glu -yö dhi!» ³⁰-A yi 'ö 'dhö bhë -a 'ka, me -nu -wo -dho -a pö -tɔn -nu -dhë: «-Ka -püö yi -ta zö!» 'Wo- pö 'zü goo -nu -dhë: «-Ka yi -ta -kpa!» ³¹Bhii 'wun -suu'- -në -a kë 'wo- wo -na 'lü -saa 'ka -në kö 'lü 'kpeazë, -më wo 'ka 'dho kë -a 'ka ë?»

³²-Wo -kë 'dho -dhia gɔɔn- -nu -plë këpëyaazë 'ka, 'wo -an kpa Yesu -bha kö -waan -an zë 'pö. ³³-Dhe 'ö =wa -lo -dhe 'wo- -dhe «me -gɔ -klëë» -a -bha, 'wo Yesu dɔ -gaatalü -bha, 'wo -taan -gban -a -kɔ -nu waa- -a -gen -nu -ta. -Wo këpëyaame =plë 'wo bhë -wo -an -dɔ -gaatalü -bha 'pö, -a me do -yö -kë -a -kwëe- 'gü, 'ö- me do -yö dɔ -a -kwaaw- 'gü. ³⁴'Ö Yesu -ya pö: «N Dë, -bhö ü -zo bho -an -bha -sɔɔn yaa -nu 'piö, bhii pë -nu 'wo- kë -na bhë 'waa- dɔ wo -de -gɔ.»

'Wo- -bha sɔ -glu wo 'kuë 'töü- -bhö -sü 'ka. ³⁵Me -nu -wo -kë mü -a -ga -sü 'gü, 'ö Zuifö -nu -gɔmë -nu -wo yö duö 'luu -sü -a -bha -sü 'gü, 'wo- pö: «Yö 'ö me 'waa -nu dha -në, -ya kë -në -Zlan -bha -Yame 'ö- sü yö -mü -a 'ka kö -yö ö -de dha 'pö ee!»

³⁶'Dhasi -nu -de 'pö -wo duö 'luu -sü -a -bha, 'wo -drɔɔn -gliisü 'yi sü 'wo =yɔɔn -a 'ka, -a 'dhi 'sɔɔ, ³⁷'wo- pö -a -dhë: «'Ö =ya kë -në Zuifö -nu -bha -gludë -mü ü 'ka, -bhö ü -de dha 'kwa- -ga!»

³⁸-A -gɔ -ta dhuö -gaatalü -bha, pë 'wo- =bëen 'ö tɔɔ: «Me -në 'ö tɔɔ Zuifö -nu -bha -gludë».

³⁹Këpëyaame -nu 'wo -an do -gaatalü -bha bhë 'yö- me do -yö ö 'dhi sü Yesu 'gü 'ö- pö: «Ü 'ka- pö -Zlan -bha -Yame -mü ü 'ka a? -Bhö ü -de dha 'ü yi dha 'pö ee!»

⁴⁰'Yö- me do -yö 'wun -blæ ö 'bhamë bhë -a 'ka 'yö- pö -a -dhë: «Bhi 'ö 'klobhódhe do bhë 'ü- 'gü -ne -a 'dhö, 'suö 'yaa ü kè -Zlan -dhë -a? ⁴¹Ko -bha 'ka, köë- 'klobhódhe -yö ko -ma -kun, bhii 'ö tɔɔ pè -nu 'ko- -kè bhë 'ko- -truën yö -na bhë; 'kæ yö -zè, yaa pè yaa gbë kè.»

⁴²=Dhe =ya kè 'dhö, 'yö- pö Yesu -dhë: «Yesu, ü -zo -yö -büö n 'ka 'töng 'ü 'dhoë- nuë ü bha 'tɔɔbhódhe 'gü bhë -a 'ka!»

⁴³Ö Yesu -ya -daa -kè -a -gɔ 'ö- pö: «A- pö ü -dhë 'wun gia- 'ka- -Dhekpaayi gia- 'ö -dæ =ne -a 'ka, 'ü dho kaa n 'piö 'tæpadhe 'ö -Zlan 'piö -a -bha.»

Yesu -bha ga -sü

(Matiö 27.45-56; Maakö 15.33-41; Zan 19.28-30)

⁴⁴⁻⁴⁵=Dhe 'ö lan- =ya do 'dhëë ziën, 'ö- -bha 'bhü -sü -yö =gbaannu, 'ö -dhe -yö -trö 'sè -ta 'ö dho 'ö yöë 'wo 'yè -lan -bha; 'yö -dun 'kodhi -bha -sɔ 'ö -kè -Zlan -gɔ kɔɔ bhë 'yö -pè ziën. ⁴⁶Ö Yesu -yö -gbla -wo 'gbee- 'ka 'ö- pö: «N Dë, 'ma n nii -lo ü kwëe!»

=Dhe 'ö =ya ö bo -wo 'ö bhë -a pö -sü 'ka, 'ö- -bha 'tè -sü -yö =gbaannu.

⁴⁷=Dhe 'wun bhë 'dhasi -gɔmë =yaa- yö, 'ö yö -Zlan 'tɔ 'saa -blü -sü -bha 'ö- pö: «'Wun gia- 'ka, gɔɔn- 'ö =ne 'wun 'kpaan 'wo- do -a -bha!»

⁴⁸Ö me -gbaa 'wo kè mü bhë 'ö 'wun -nu bhë 'ö -kè -an 'yaan. =Dhe 'go mü, -wo -yè wo 'zü 'wo dho wo -gɔ kɔɔ wo -tong -ta -ma -sü 'ka. ⁴⁹Yesu 'bhamë -nu waa- dhoo -nu 'wo -kè -a 'piö kö -yö Galile bhë, -wo -do =gbiin 'ö pè -nu 'wo -kè bhë 'wo -an yö.

Yesu -da -gluudhö -sü

(Matiö 27.57-61; Maakö 15.42-47; Zan 19.38-42)

⁵⁰⁻⁵¹Me do -yö -kè mü, 'wo- -dhe Zozefu 'yö go Zuifö -pö do 'wo- -dhe Alimate -a 'gü. Me 'ö bhë -yö -kè me këwunsëëzè 'ö kpengdhö -a 'ka 'ö do me 'ö -Zlan -ya -ya Mëdhame 'ka, -a -bha nu -sü -gɔ. -Yö -kè zakanme -nu -vava bhë -an me do 'ka, 'kæ -a -wo yaa kè zakanme -nu 'wo 'dhö -an -wo 'yö kpɔ 'wun 'ö bhë -a kè -sü -bha bhë -an 'piö. ⁵²Ö -ziö 'ö dho Pilatö 'piö, 'ö Yesu =glöö -dhe -a -gɔ. ⁵³=Dhe =ya kè 'dhö, 'ö Yesu =glöö bho -gaatalü -bha, 'ö sɔ do =ploö -a 'ka 'ö- sü 'yö- -da -guö -du do 'ö 'pɔn -sü 'ka, 'ö waa me =glöö gbë -da mü do -kun -a 'gü. ⁵⁴-Yö -kè Zuifö -nu -bha =glooyi -waamayi 'ö -an -bha =glooyi züdüyi 'ka bhë -a 'ka.

⁵⁵Dhoo -nu me 'wo go Galile -sè 'gü 'wo -ziö Yesu 'piö bhë, -wo -ziö Zozefu 'piö, 'wo -dhe -ga -glu 'ö bhë -a 'gü, 'ö -kɔ 'ö Yesu =glöö -yö =wɔa' bhë 'wo- yö. ⁵⁶=Dhe =ya kè 'dhö, 'wo nu wo =plöö 'wo 'yɔn -nu, pè 'yi 'tëë -sëëzè -nu -pè -kè kö 'waan- -lo Yesu =glöö -ta. 'Ö =glooyi 'ka 'wo wo 'tæ pa =ne -kɔ 'ö -an -bha tɔng 'dhö -a 'ka -a 'dhö.

Yesu -bha -go ga 'gü -sü
(Matiö 28.1-10; Maakö 16.1-8; Zan 20.1-10)

24 ¹Dhe Zuifö -nu -bha -glooyi -ya ziö, -dhekpacyi me 'ö yö -a 'piö bhë -a -dhiadhiö tii 'gü, dhoo -nu 'wo bhë -wo -dho -a blöcn- -taa; -wo -dho 'yön -nu, pë 'yi 'tëë -sëëzë -nu, 'wo- -yuö -kë bhë -a 'ka; ²yö -dhe -wa -lo 'ma, 'wo -guö 'fa 'yö yö -glu bhë -a 'dhiö bhë 'wo- yö kö -ya 'go -glu 'dhi 'dhiö. ³Ö 'wo -da -gluudhö mü, 'këe waa Dëme Yesu -glöö yö.

⁴Dhe 'ö -wa -dhe -ga 'wun bhë -a 'gü 'sengdhö 'ö 'waa- 'slë gbe yö -na wo -de -gö, 'ö göcn- -nu -ple 'ö sö 'bhü -sü 'dhö -an -bha bhë, 'wo -wo -an 'dhiö mü. ⁵Ö 'suö -yö -da -an 'gü, 'ö 'wo wo -gö -gblü 'sei. 'Ö göcn- -nu 'wo bhë 'wo- pö -an -dhë: «-Më -kë 'ö me 'ö 'bhee- 'ka- -mëe game ziën -ë? ⁶'Yaa zö gbö -ya 'go ga 'gü, ka -zo -yö -büö 'wun 'ö- -blëe ka -dhë kö -yö -tun Galile bhë -a 'ka. Kë- wo bhë -ya pö: ⁷Mëgbö -dho dö 'wunyaakëme -nu kwëe kö -wa dö -gaatalü -bha. 'Go mü kö -yaan 'go ga 'gü -dhekpacyi kë -yaaga -naa 'ka!»

⁸Dhe -ya kë 'dhö, 'yö -an -zo -yö -büö Yesu -wo 'ö bhë -a 'ka. ⁹Ö 'wo go -glu bhë -a 'gü, 'wo dho 'wo- -blëe -guë' -nu 'gö- do ö ga do 'wo bhë waa- me 'bhaa -nu 'wo to -an -dhë. ¹⁰Dhoo -nu 'wo bhë 'wo tö Mali 'ö go Madala 'dhö, Zanë 'dhö waa- Mali Zakö dhe 'dhö, 'iin dhoo -nu 'bhaa -nu 'wo -kë ziö -dhia -an 'piö bhë, wo 'ple 'wo 'wun 'ö -në 'wo- -blëe Yesu -bha böme -nu -dhë. ¹¹'Këe 'yö -kë -a -bha böme -nu -zuö' 'piö -në pë 'kpaandhö, waa -an -wo -dhe 'wun gia-. ¹²Ö Pïëe -yö -luu 'ö dho -bla 'ka blöcn- -taa 'ma, 'yö -kloo ö -dhe -ga kö söpen 'wo- -ploö Yesu 'ka bhë -a 'flëë -në 'ö mü. 'Yö -yë ö 'zü 'yö nu ö -gö kö 'tetundhe -va 'ka, pë 'yö -kë bhë -a -wun 'gü.

Yesu -yö ö -de -zön ö bha -guë' -nu -ple -dhë -kö 'ö -kaa' Emaisö -zian 'piö
(Maakö 16.12-13)

¹³Yi gia- bhë -a 'ka 'ö Yesu -bha -guë' -ple -wo -da zian 'ö dho Emaisö plöö -dhe 'ö 'go mü 'dho Zeluzalemë 'yö dho -mä 'kilong 'gö- do ö ga do -bha bhë -a -ta. ¹⁴-An -bha 'dho -sü 'ka, 'wun -nu 'wo -kë 'saadhö bhë, -wo kë -a -ta 'döc dö -dhia. ¹⁵-Wo -to 'wun -blëe' -dhia, 'ö Yesu gia- -yö -yöcn -an -bha 'ö 'wo 'ta -da -bhüö 'gü. ¹⁶-Wa -yö, 'këe pë do 'bhaa -ya -kë 'ö waa- dö -a -bha -kë Yesu 'ka -sü 'ka. ¹⁷Ö Yesu -yö -an -dhëe' kpö 'ö- pö: «-Më -wun 'ö 'ka- -blëe' -na ka 'ko -dhë 'ka 'ta 'sü -sü 'ka -nëe?» 'Ö me -ple 'wo bhë, -an -zuö' -yö -da 'yena 'gü, 'yö 'wo -gbaannu.

¹⁸Ö- me do 'wo- -dhe Kleopa bhë 'yö- pö -a -dhë: «Ü -dho kë do 'ö Zeluzalemë plöö, 'ö pë -nu 'wo kë yië -ple -në 'ö 'bhaa- -tei' dö -a?» ¹⁹'Yö- pö -a -dhë: «-Më -wun -nu 'wo -kë -ë?»

'Ö 'wo- pö -a -dhë: «Pë 'ö -kë Yesu 'go Nazaletë 'yö -kë -Zlan -wodhiölome 'piigbeeze' 'ka ö bha yuö -nu waa- 'wun -blëe' -wo -nu 'gü -Zlan waa- 'següme -nu -an 'dhiö bhë 'bhaa- dö -a?» ²⁰Yi -bha slabhome -nu

-gɔme -nu waa- 'dhiö -sü yi 'ka -me -nu -wa -kun 'wo- do 'se -kɔɔnme -nu kwɛɛ 'wo- zê -a -do -gaatalü -bha -sü 'ka. ²¹Yi yi -zo -gɔn -be -ne, me 'ö dho Izlaelö bho 'gan 'gü 'yö -mü -bezê; 'kɛɛ -dhe pè -nu 'wo bhê 'wo -kê -ne -a -dhekpaɔyi -yaaga 'ö -ne. ²²Ö dhoo -nu 'bhaa -nu 'wo yi 'piö 'wo yi do -gbɔudhò 'zü -nɛɛ, 'ö bhii -dhe -wa -so -dhiadhiö tii 'gü -wa 'dho -a blɔɔn-taa, ²³waa- -glöö yö; 'yö 'wo nu 'wo- pö yi -dhê wo -Zlan -bha bɔme -nu -yö, 'ö 'wo- pö wo -dhê -ne -ya 'go ga 'gü. ²⁴Yö do bhê 'zü, gɔɔn- 'bhaa -nu 'wo yi kpö 'gü -wo dho 'wo -lo -a blɔɔn- -taa 'ma 'ö pè -nu 'wo bhê 'wo- yö -ne -kɔ 'ö dhoo -nu -wa -blɛɛ -a 'ka bhê -a 'dhö, 'kɛɛ Yesu 'pö waa- yö.»

²⁵-Dhe -ya kè 'dhö, 'ö Yesu -ya pö -an -dhê: «Oo gɔɔn- -nu 'ö 'wunbhokoudɔdhe gbe 'yaa -an -gɔ, 'ö pè -nu 'ö -Zlan -wodhiölome -nu 'dho -a -blɛɛ' -na, 'ö 'kaa- -dhe 'wun gia- 'siö-! ²⁶'Yaa 'dhö -ne -Zlan -bha -Yame 'yënnng -dho bho -yaan -tun -da -na ö -bha 'tɔbhɔdhe 'gü a?»

²⁷-Dhe -ya kè 'dhö, 'ö 'wun 'ö -gban ö -bha 'ö -bɛɛn' -sü 'ka 'ö- zü -yö do Moizö -bha 'sëédhe 'gü 'ö dho 'ö yöé -Zlan -wodhiölome -nu 'saadhö -an -bha 'sëédhe -be -bha, 'yö- -gen pö -an -dhê.

²⁸-Dhe 'ö 'wo -yɔɔn -na pödhe 'wo 'dho -na -a 'gü bhê -a 'sɔɔ, 'ö Yesu -ya kè -ne me 'ö 'dhoë- pödhe gbe 'gü -a 'dhö. ²⁹'Yö 'wo- -gban -a -bha 'wo- pö -a -dhê: «-Bhö 'to yi 'piö, lan- -ya -püö 'saadhö, 'bin -ya bho 'mê -sü -bha!» 'Ö to -an 'piö 'wo dho -an -gɔ kɔɔ. ³⁰-Dhe -wa 'dho pè -bhö -dhia, 'ö -bluu- sü, 'yö -Zlan zuö pö -a -ta, 'yö- 'klu kan 'ö- nu -an -dhê. ³¹-Dhe -ya kè 'dhö, 'ö -an 'yan 'dhi -yö -po, 'ö 'wo- dɔa Yesu 'ka. 'Yö to mü 'yö -dhɔng -an wö 'dhiö mü. ³²'Wo yö -a -pö wo 'ko -dhê -sü -bha -nɛɛ: «Pè -nu 'wo -bɛɛn' -sü 'ka, -dhe 'ö -an -gen pö -na ko -dhê zian -gbloo 'piö -sia bhê, pè 'ö -kê -ne -zuögludhi 'dhö -a 'siö -yö -ya n -zuö' 'gü, (=yaa- kè ü -gɔ 'dhö 'pö a)?»

³³-Dhe -ya kè 'dhö, 'wo -luu 'wo dho Zeluzalemë plöö, 'ö- -bha -guë' -nu 'gɔɔ- do ö ga do 'wo bhê waa- wo 'bhame -nu 'wo -an yö wo 'ko -bhaa mü, ³⁴'wo- pö me -ple 'wo bhê -an -dhê: «Dème -ya 'go ga 'gü giagiawo, -yö ö -de -zɔn Simɔ -dhê!»

³⁵Ö wo -de 'pö pè -nu 'wo -kê zian -gbloo 'piö waa- -kɔ 'wo Yesu do -a 'ka kö -ya -bluu- 'klu 'kan bhê, 'wo- -blɛɛ -an -dhê 'pö.

Yesu -yö ö -de -zɔn ö bha -guë' -nu -dhê

(Matiö 28.16-20; Maakö 16.14-18; Zan 20.19-23; Këyuö -nu 1.6-8)

³⁶-Wo -to 'wun -blɛɛ' -dhia, 'ö Yesu gia- -yö -wo -an ziën mü, 'yö- pö -an -dhê: «=Zuöyagluu -yö kè ka -gɔ!»

³⁷'Yö 'siö -yö -kan -an 'ple 'gluu, 'ö 'suö -yö -da -an 'gü, bhii pè 'ö -kê -an -zuö' 'gü -bezê 'ö tɔɔ 'wa me -zii yö. ³⁸Ö Yesu -ya -pö -an -dhê: «-Mê -kê 'ö 'siö -yö -kan ka 'gluu i? -Mê -kê 'ka do 'dudhò =e? ³⁹-Ka n -kɔ -nu waa- n -gen -nu -an -ga 'dhe! =Taanga pin -nu 'waa -mü -a? Ma gia- -mü! -Ka 'pa n 'ka, 'ka n -ga, bhii me -zii kwi waa- -a ga 'waa -dhö -ne -kɔ 'a- 'ka -ne -a 'dhö!»

40 'Wun bhë -ya -blæ -an -dhë ö -kɔ -nu, ö -gen -nu -a -zɔn -an -dhë -sü 'ka. 41=Dhë 'ö- =tei' dɔ =nɛ ö -wun -dhe 'wun gia- -sü yaa kē -an -gɔ -së 'ka -kun bhë, =zuögludhi =va waa- 'tetundhe 'yö -kē -an 'gü bhë -a -wun 'gü, 'yö- pö -an -dhë: «-Bhöpë 'bhaa -yö ka -gɔ zö =a?»

42 'Ö 'wo 'yuö- -pla -sü 'klu do nu -a -dhë. 43 'Yö- sü 'ö- -bhö -an wö 'dhiö mü. 44=Dhë =ya kē 'dhö, 'yö- pö -an -dhë: «Pë 'a- pö ka -dhë kö a =tun ka 'piö yö =ga 'ö =nɛ: Pë 'yö =bæen' -sü 'ka n -wun 'gü tɔng 'ö Moizö -ya nu -a 'gü, -a mɛ 'ö -Zlan -wodhiölome -nu -bha 'sëedhe 'gü, -a mɛ 'ö 'Tan 'sëedhe 'gü, -an 'ple 'dhiö -dho -mɔ 'kuë.»

45 'Ö -an =zuö' 'dhi -po 'wunbhokoudɔdhe -gɔ kö -waan pë -nu 'wo =bæen' -sü 'ka bhë -an -gen dɔ. 46 'Ö- pö -an -dhë: «Pë 'yö =bæen' -sü 'ka -Zlan -bha 'sëedhe 'gü, yö kun tɔɔ: -Zlan -bha -Yamɛ 'yënnɔ -dho bhɔ, 'ö ga, 'ö -dhekpaɔyi kē -yaaga -naa bhë 'yö goë ga 'gü. 47 Pë 'ö dho kē 'ö tɔɔ mɛ -nu -dho 'wuntaɔsë =blæ' -a 'tɔ 'gü 'sɛgüme 'saadhö -an -dhë; -a zü -dho dɔ Zeluzalemë plöö -waan mɛ -nu =dhɔɔ kē kö -waan wo -bha -kē -a 'gü -sü =dhië' -Zlan 'piö kö -yaan ziö -an -bha -wun yaa -nu -ta. 48 Ka 'ka tɔɔ pë -nu 'wo =nɛ -an =goo-. 49 'Ö ma gia- 'a dho pë 'ö -Zlan -ya 'tɔ go ka -dhë bhë -a bɔ ka -dhë. 'Kɛɛ -ka 'to plöö zö -yö 'dho -yö yöë 'piigbeedhe 'ö go -Zlan 'piö -a -bha -yɔɔ ka -ta -yi -bha.»

Yesu -dho dhang- 'gü

(Maakö 16.19-20; Këyuö -nu 1.9-11)

50=Dhë =ya kē 'dhö, 'ö Yesu -yö -an sü 'ö go -an 'ka plöö 'ö dho -an 'ka 'pian 'ö bɔ Betani =zian' -a 'ka. -Dhë bhë -a -bha 'yö ö -kɔ =luu 'ö 'dhuë- kpɔ -an -bha. 51 -Yö -to 'dhuë- -kpɔ -an -bha =dhia, 'ö go -an 'piö mü 'ö dho dhang- 'gü. 52 Wo 'pö -wa 'tɔ 'saa -blü, 'wo -yɛ wo 'zü, 'wo nu Zeluzalemë =zuögludhi =va 'ka; 53 -wo -to zlöö -Zlan -gba -a 'gü -kɔ 'gü -a 'tɔ 'saa -blü -sü 'ka.